

BIBLIOTECA NAZ.
Vittorio Emanuele III

XLVIII

A

49

NAPOLI

g. 19






2
HISTORIA
Pontificatûs
GREGORII XIII.
SUMMI PONTIFICIS.

AUTHORE
P.IGNATIO BOMPLANO
SOC. JESU.

Post Editionem Romanam
PRIMA IN GERMANIA.

Cum Grat. & Privileg. Sac. Cas. Majest.
Et facultate Superiorum.



DILINGÆ,
Typis JOANN. CASPARI BENCARD,
Bibliopolæ Academici.
Per JOANNEM FEDERLE.

Anno M. DC. LXXXV.


1140714

1140714

1140714



1140714



Goswinus Nickel Soc. JESU
Præpositus Generalis.

CVM Historiam Pontificatus Summi Pontificis Gregorij XIII. à P. Ignatio Bomplano, nostræ Societatis Sacerdote conscriptam, aliquot ejusdem Societatis Religiosi recognoverint, & in lucem edi posse probaverint, potestatem facimus, ut typis mandetur, si ijs, ad quos pertinet, ita videbitur, cujus rei gratia has literas, manu nostra subscriptas, Sigillóque nostro munitas damus.
Romæ 7. Augusti 1654.

Goswinus Nickel.

Imprimatur, si videbitur Reveren-
diss. P. Mag. Sac. Pal. Apost.

*M. Anania Episc Sutr.
& Nep. Vicesgerens.*

Imprimatur.

*F. Dominicus Manettus Re-
verendiss. P. Mag. Sac.
Pal. Apost. Socius.*

P R Æ.



P R Æ L U D I A

A D

PONTIFICATUM GREGORII XIII.

Ejusdem Natales, studia, munera, & res tum ante, tum in Cardinalatu, ab eodem gestæ.



MORTALES omnes ea oportet, agere, quibus incl. rescat sua cuique magnitudo; Nam ideò ex lege naturæ infantes orimur, ac modici: ut paulatim animo augeamur non minùs quàm corpore; per artus nimirum & lineamenta corpus increfcit, animus per bonas artes. At plerique non tam evadunt magni, quàm mali; dum opibus, honoribus, pravisque consilijs nituntur; quippe ambitione ducti, præstare volunt fortunâ: & habent

tur infra cæteros , quòd virtute non præstant,quâ solâ superamus. Et sanè fortuna non est magnitudo, sed umbra magnitudinis,quâ polet animus. Quod cognoscere licet in Romanâ, hoc est in principe Christiani Orbis Aulâ, ubi excellere creduntur, ac supremæ propiùs accedere dignitati , qui probæ, doctæq; mentis viribus ad magnitudinem grassantur. Contrà verò qui affectu, & industriâ iniquiore aucupantur incrementa, miserescentes censentur, quò majores. Verùm hæc perpendere , alijs in promptu sit , mihi proum est hisce abstinere, aque illa potiùs facta gestit animus promere, quibus in aperto positis, haud difficulter quisque intelliget, veram optimi Civis, Principisque magnitudinem & obtineri probitate, sapientiæ immistâ , & obtentam sustineri æquitate animi , nulli seruiantis rei, nisi justitiæ. Quinimò vehementiùs in id consilij feror, quòd Summus Pontifex non minùs Civium lex est, quàm Principium ; Neque mihi observatur Pontificis forma omnibus absolutior partibus , quàm Tertij. decimi Gregorij Pontificatus , non modò quia exhibuit omnia

omnia Virtutum officia, operaque, quibus
 eminere, par est Romanum Antistitem;
 sed etiam inciderunt tempora tam varia,
 & perplexa: ut nosse, quàm sapienter se
 gesserit is Pontifex, publicæ intersit rei, de
 qua nemo moretur meliùs, quàm Princeps
 sapiens & justus. Sed antequam hunc de-
 scribam, operæpretium & erit primùm
 cognoscere Gregorij originem, & reliqua
 veluti summæ dignitatis rudimenta.

Gregorius igitur anno ab instaurata sa-
 lute 1502. vij. Idus Febr. natus est Bo-
 noniæ, quæ Urbs, & opulentia ditionis,
 & splendore Civiũ, & studijs literarum, in
 Italia summopere floret. Mater illi Angela
 Mareschalca, honesta in primis mulier,
 & nobilis: Pater verò Christophorus Bon-
 compagnus, & Avus Jacobus, qui publi-
 cis Virtutum meritis familiam satis vete-
 rem, & claram egregiè illustrarunt, Jacobi
 certè quanta fuerit apud Cives gratia, &
 existimatio ex eo comperimus, quòd Bo-
 noniã depulsis Bentivolis, ipsi inter pau-
 cissimos cura demandata fuerit Urbis
 tuendæ. *Vgonis* nomen ab infantia tu-
 lit, retinuitque usque ad Pontificatum;

indole præditus perquam ambili, & sapientia idoneâ. Inde pietatis artibus, & scientia cupiditate flagrans, brevî semina jecit accessuræ magnitudinis. Primâ, & humaniore imbutus literaturâ, se contulit ad Juris doctrinam, quàm sibi per constantem laborem, & ingenio excellens præ cæteris comparavit eâ omnium commendatione; ut quamvis adolescentior, in Bononiensi Gymnasio, quod naturæ sapientia theatrum est, ejusdem interpretes Juris fuerit renunciatus. Quo in munere quinquennium accuratè versatus, facilem sibi ad honores aditum aperuit, ingenij solertiâ, & morum sinceritate famam promeritus, & benevolentiam.

Quippe Petrus Paulus Parisius gravissimus Jurisconsultus, à Paulò III. inter Purpuratos cooptatus, Gregorium & amoris, & studiorum necessitudine sibi conjunctam accivit Romam, commendavitque Pontifici, qui accerrimus alioqui æstimator ingeniorum, vidit simul Gregorium, & probavit: ejusque operâ usus fuit, primum Judicem Capitolinum eum nominavit, mox inter eos delegit, qui ad utrumque

que Justitiæ, Gratiæque Tribunal, sententias ferunt, aut rogant.

Is certè causas tam religiosè cognovit, ut nemo non laudaret ejus vel ingenuitatem, vel diligentiam. Audire omnes incorruptè: nulli parti jactantiùs favere: nihil æquitati denegare: diù noctùque pro Veritate agere, nec metu sollicitus, nec ambitione; sed gratus omnibus, nemini adversus, par erat expectationi Urbis, & judicio Pontificis, cujus voluntas in Gregorium pronior erat, quò ille modestiæ retinentior: statimque indicavit oblatâ opportunitate, quanti eum faceret. Nam coacto Tridenti Concilio ad compescendas hæreses, morèsque componendos, inter alia eximia Capita eò destinavit Boncompagnum; unde regressum Causis Civilibus præfecit palàm, ac spontè laudatum, quòd nescio quid magnum in hujusmodi Homine prospiceret.

Hanc de Gregorio Pauli III. prudentissimi Principis opinionem confirmavit Julius III. qui expetitam omnibus (ceu gradum ad purpuram) dignitatem, honoris ergo illi obtulit, quam tamen ipse re-

pudiavit ; Atque id temporis tanta erat de Boncompagno spes, ut Julio Pontifice sanctioris anni primordia celebrante, cum festivè, uti fit, in cæti clarissimorum Virorum differeretur, quisnam eadem solemnia post quina lustra instauraturus esset, confidenter Hieronymus Federicus, postea Laudensis Episcopus, Boncompagnum nominaverit, non sine præfagio; nam plerumque veri præfaga est fama, quam eximia quædam virtus ingenerat. Paulò post à Causarum cognitionibus, ad regimen Urbium, populorumque transducitur, & jubetur loco legati regere Latium, quod rexit amanter, ac quietè; non avidus alieni, sed sui profusus: & gnarus, Provincias teneri amore, non metu, aut vi. Sublato Julio III. Vaticanum in solium evêhitur Marcellus II. qui virtutum ac literarum amans, Romæ ac Tridenti Boncompagnum doctrinâ æque, ac virtute gratum complexus fuerat; sed illi cum vitâ erepta est quoque ornandi Gregorij occasio.

Post Marcellum Paulus IV. rerum sacrarum potitur, à quo, sublati Provincia-

cia-

ciarum Legationibus, jussus est persistere in Latio regendo : nec Legati, sed Principis vices agere. Perfunctus regimine, ac inter eos Sanctissimos, & sapientissimos Viros delectus, qui faciunt, ne quid Labis Religio sentiat, adjungitur comes Carolo Carasæ in Gallias Legato, ut esset ei à consilijs, & libellis; atque inde Romam reversus, ob egregiam Carasæ navatam operam alijs cumulatur honoribus. Sed accidit in hoc æstu gratiæ, res memoratu digna, quæ magis accendit Pontificis benevolentiam, quò videbatur extinguere. Is ob susceptas Hispani Regis sibi infensi, ab Alexandro Sfortia studiosius, quàm vellet, partes, illum moverat gradu, cui statim admovit Boncompagnum, qui resistit constanter, maluitque parvo mediocriter, quam alieno (licet jubente Principe) splendidiè vivere. Quo facto non modò elusit pravè æstimantium judicia, sed suam Urbi tum integritatem, tum prudentiam approbavit : eo gloriæ propior, quò alienor à cupiditate. Interim proficiscitur cum eodem Carasa; qui à Pontifice legabatur in Belgium, ad Philippum

lippum Secundum, ut compositis jam rebus, pacem seu firmaret validius, seu ostentaret. E Belgio se Romam referens, agitatam eo tempore gravissimam quæstionem, mandante Paulo, expendit, invictus adversus potentiam, & gratiam. Renunciatur quoque Vestanus Episcopus: quam dignitatem sanctè suscepit, ad conscientiaë famæque præsidium: & mox cœpit Urbem sibi creditam sublevare, impensoque omni ex eâ proventu instauravit, ornavitque primarium templum; Imò cum reliqui Episcopi cogerentur ad sua redire, & ipse Romæ, ob communis Ecclesiæ commoda, detineretur à Pontifice; onus dignitatis cum censu dimisit, non aliâ de causâ, quàm quia non poterat per se sustinere: raro nihil appetentis, & verè religiosi animi exemplo.

Præterea destinatus est Nuntius ad Venetos, sed non missus, quòd electus fuerit ad Camerae Apostolicæ negotia tractanda, quorum ratio à Pontifice immutata fuerat, & Alphonso Carasæ commissa, ut imminueret auctoritatem Guidonis Ascanij Sfortiæ Camerarij, ob Regis Hispani amicitiam,

citiam, adhuc inuasi, & suspecti. Neque Boncompagnus discordias aluit, ingestis auctis, se suspicionibus, sed iras & querelas lenire conatus, utrique placuit. Ergo miratus virtutem Paulus, maiora præmia meditabatur, & jam descripserat *Vgonis* nomen, quamprimum in albo Purpuratorum notandum, nisi fato vetitus fuisset, ut Gregorij fortuna esset gratior, & grandior, quò tradior.

Succedente Pio IV. & conversa Aula fortunâ, omne Carafæ genus cum clientibus afflictum fuit. Et in primis Gregorio timendum erat, quòd gratus fuerat. Sed sempiterna est gratia, quam sola conciliat virtus. Itaque nihil sibi conscius, & nullâ præteriti temporis diffidentiâ, Pium adit: rerum à se gestarum rationem reddere paratus, ac pœnas dare, si peccasset. Subrisit ad hæc Pontifex, aitque, se ejus innocentia certum, velle hoc unum, ut pergeret rei publicæ studere, susceptisque honoribus fungeretur. Et mox eum adiecit consilijs Caroli Boromæi, Viri ob sanctimoniam vitæ inter Divos relati, penes quem omnes Pontificiæ ditionis cu-

re versabantur; eoque vetito aliquid exequi, Boncompagno inconsulto, nihil & ipse postremò approbabat, nisi comperito, quid ille sentiret. Usque adeò semper & apud omnes in pretio est sincera prudentia. Non tamen in hac aulæ varietate immemor fuit Gentis Carasæ, more multorum, qui præsentia observant; sed eam inter adversa coluit magis: nec magnitudo periculi terruit, quem amplitudo beneficij ad amorem stimulabat; atque inter alios Alphonsum Carasam Archiepiscopum Neapolitanum, & Purpuratum, non minùs domesticæ rei, quàm carceris angustijs pressum, sex donatis nummorum millibus, quæ ex munere aulico divendito collegerat, ad redimendam pœnam, juvit, aliòsque exemplo incitavit, ut juvarent; aula non fastidiente, nec Pontifice indignante; sed omnibus admirantibus grati animi constantiam, quæ nesciebat fortunæ discrimina.

Solemne Romano Pontifici est, cùm Religio scelere Principum, factione Sectariorum, pravis Sacerdotum moribus, aut dissensione, aliisque causis periclitatur,

Cæ-

Cætus instituere, in quibus collecto Christiani Orbis flore, omniumq; auditâ, sententiâ remedia errorum deliberantur, & quid è re publica sit in posterum faciendû, sentiendûque, palàm sancitur. Itaque Paulus III. cùm omnia Lutheri causâ turbata essent, hujusmodi Cætum indixit Tridentum, quò Boncompagnum, & alios destinavit. Sed conventum ob difficultates Tridenti solutum, deinde restitutum Bononiæ, demum omnino intermissum, Pius IV. omni ope contendit ad exitum perducere, ne remedium in exitium verteretur. Igitur Boncompagnum, qui sacra Canonum eruditione, rerûmque experientiâ pollebat, Tridentum remisit tanta cum auctoritate, ut Legati, qui Pontificis nomine Concilio præerant, sine illius operâ, & assensu agitarent nihil. Biennium ibi mansit, non modò cum abstinentiæ laude: utpote qui reiecerat oblata à Pontifice pecuniæ subsidia, quæ alij procurabant: & contentus modico, innotescebat virtute, non pompâ; sed etiam summâ cum diligentia famâ. Certâ allatâ in medium gravissima difficultate: quo
sci-

scilicet jure suas Episcopi Sedes tenerent; cujus causâ Nationes inter sese altercabantur, & sacrosanctus Cætus scindebatur in partes, non sine gravioris periculi metu; nulla visa est opportunior componendæ dissensionis ratio, quàm omnia Carolo Lotharingo, & Ugoni Boncompagno disceptationis argumenta tradere, quorum in verba sancito decreto, quies demum Concilio, & finis fuit. Atque hic advertere lubet DEI Providentiam, Gregorium non casu Tridentum destinantis: sed, ut ibi cognosceret Ecclesiæ incommoda, pericula Nationum, quibus Pontifex futurus consuleret.

Boncompagnum è Concilio redeuntem aliis honoribus Pius excepit, ac demum 4. Id. Mart. sacrâ D. Gregorio die, purpurâ donavit; addito illo elogio: Hic est, in quo dolus inventus non est. Censuere plerique, hanc purpuram haud honorem, sed gradum ad summum honorem, cui par, ac necessarius videbatur, omnium consensu; at nullo ipse fastu, spe nulla intumescibat; arbitratus, hoc additamentum gloriæ, incitamentum quidem esse probitatis, sed decrementum ambi-

tionis : certabant in eo pietas in DEUM, & humanitas in homines ; verborum ac morum integritas : moderatè simul & magnificè agere : instruere familiam probam magis & gravem, quàm numerosam : Et quamvis re domesticâ minimè affluebat, nihil sordidè ac infra gradum meditari ; nec avaritiâ, aliòve studio in factiones Principum trahi : uni Ecclesiæ, ore animòque libero, servire, adeòque inerat illi plus dignitatis, minus invidiæ. Hac magnitudine animi admontius Pontifex, graviori eum negotio applicuit, in quo Apostolicæ cardo rei vertebatur.

Bartholomæus Caranza, Archiepiscopus Toletanus, dum scripta Hæreticorum evolvit, eàque incautiùs, quàm par erat ; & ambiguè in margine interpretatur ; vocatus in suspicionem fuit affectatæ hæresis. Ergo Hispania novitate rei attonita, ob spectatam Viri tum pietatem, tum doctrinam : sparsâ præsertim opinione ; id fieri accusatione Nonnullorum opulento Sacerdotio inhiantium : Et Pontifex veritus, ne Hispanus Rex nimium auctoritatis aut sibi, aut alijs tribueret ; Boncompagnum
duo-

duobus antè mensibus Purpurâ exornatum, in Hispaniam legavit, cum imperio, & potestate, ut causam cognosceret, ac de ea statueret, illustravitque Legationem comitatu insignium Virorum, & præsertim Jo. Baptistæ Castanei, Felicis Peretti, Jo. Aldobrandini, ac Stephani è Familia Servorum M. V. quorum duo ad Pontificatum, alij ad purpuram evecti postea fuerunt, quasi tam illustris Virorum Corona indicaret Gregorij Majestatem. Plura in hac legatione acciderunt, quæ fidem Gregorij erga Ecclesiam prodiderunt. Cùm enim aditurus Regem Matritum, didicisset ex Duce Albæ, Regiæ domûs Præfecto, haud illi Regem ex more fore obviam, quippe ad Regem non legebatur; Respondit impavidus, Malle se retrò cedere; quo responso plusquam Regio audito, Rex statim obviam ad duo millia passuum processit; comitantibus Carolo filio, Rodolpho & Ernesto Austriacis, ac etiam Joanne Fratre cum reliquâ nobiliori Aulâ: ivitque Gregorius medius inter Philippum Secundum, & Alexandrum Cribellum, Nuntium Pontificium, jam

Pur-

Purpuratum. Postea cum Regem retulisset arcana Legationis, & Rex vellet quosdam nominare, qui non tam deliberarent in causa, quàm judicarent; resistit ipse; urgentique Regi ijs verbis: Quid si Pontifex consentiat? Resistam, inquit, vel Pontifice assentiente; nec propterea ejus iram verebor: quia Pontifex non nisi jure acta probat.

Quin etiam eo temporis intervallo, quo Caranzæ causam, ob injectas difficultates, non attigit, nihil planè ulli, quamvis rogatus à Principibus, impertitus est per eam potestatem, quæ Legatis conceditur, ex quo summam auri vim collegisset, confidenter testatus, nolle se alia præstare, omisâ re, cujus gratiâ advenerat.

Quibus Constantiæ, ac integritatis argumentis commotus Philippus, exarsit vehementiùs in Boncompagnum, non irâ, quòd obsisteret; sed amore ac reverentiâ, quòd esset dignus, quem Philippus amaret, quia Philippum non timebat. Et revereri solebat maximus hic Rex eos, qui Apostolicam auctoritatem tuentes, nec odia

odia Principum verebantur, nec gratiam amabant.

Interim nunciatio Pij IV. obitu, cogitur & causam, & Hispaniam desere, ac etiam repudiato, quod liberaliter Rex offerebat, viatico: ne conscientiam liberatis violaret, aut famam integritatis minueret, properavit ad Pontificia Comitia, in quibus, nâ abfuisset, primas erat laturus, multorum opinione; Æmuli certè, ut spem obtinendæ dignitatis illi eriperent, vitam falsò eripuère, evulgatâ mendaciter famâ, Boncompagnum occubuisse. Sed æmulatio seu invidia differt, non aufert honores: neque fautores Gregorij hæc inania rumorum graviter tulerunt, solliciti, ne absentia magis quàm mortis fama obesset; sed in alia comitia Boncompagni spe destinatâ, conspirârunt in decus Miachaëlis Ghislerij, qui Pius V. dictus est, nomine dignus, & munere. Genuam ex itinere se Legatus receperat, cùm redditus à novo Pontifice literis jubetur Hispanias, rem confecturus repetere; sed enarratis difficultatibus, finitur Romam ire:

Ubi

Ubi Romam accessit, fructum sensit bonæ famæ, quam legatione affecutus fuerat, exceptus omnium plausu, etiam eorum, quibus ignotus erat. Statimque perrexit ad Pium salutandum, venerandumque, qui nescius adulandi, viso illo exclamavit, se Boncompagni locum tenere. tantam sibi Gregorius apud omnes opinionem, ac reverentiam sui paraverat. Verum fractis ætate viribus, & corpore itineribus, laboribus, curis attrito, gravio-rem in morbum incidit, anxijis omnibus Bonis. Quo tandem exolutus, ac viribus confirmatis, aulica negotia, Purpurati hominis propria aggressus est. Non illum domesticæ rei augendæ, seu fortunæ splendidioris amor incescit: sed instabat modestiæ, cautus adversus munera, præsertim Regum, quibus gratificari, non servire, fas ducebat. Nec unquam, nisi coactus imperio Pontificis, adduci potuit, ut quâ ornabatur ab Hispano, annuæ mille aureorum liberalitati consentiret. Unde aderat illi oratio plena fidei, & sermo ad solam veritatem compositus: nulli offensivus, quia nulli addictus: & ab ipso discrebatur

babat Pontifice, cùm is quamquam servantissimus æqui, vel acrius insurgeret, vel facilius indulgeret. Quam animi excellentiam tunc maximè præferebat, cùm Ecclesiæ jura, quibus explorandis, tuendisque præfectus fuerat, in discrimen vocabantur. Et rogatus aliquando à Cæsare Speciano, ut pro persona, quam sustinebat, concessum à Pontifice diploma, subscriptione assereret, renuit semper subscribere, licet Pontifex ipse subscripsisset, quippe eo diplomate jus Ecclesiæ imminutum iri censebat. Et Pontifex quamquā initio paululū comovebatur, mox commendabat; quòd adversaretur non fucos calliditatis, aut specie contentionis, sed veritatis studio, & genio prudentiæ, iusta, & recta suadentis. Prodidit etiam argumenta non levis benevolentiae; dum honoribus illum auxit in aulā & consanguineos Bononiæ; quam in Urbem profectus fuit hoc anno Gregorius necessitate potius, quàm ad solatium: & perfectā, quam Parens inchoarat, magnificā domo, quasi rudimento grandium operum, quæ paulò post ubique terrarum Religioni, ac bonis

nis Artibus excitaturus erat, Romam remeavit, animúmque appulit ad regnosceda Pontificum Decrera, à Gratiano collecta, quem in laborem olim à Pio IV. sibi impositum, dum naviter incumbit, majorem illi fortunam extruxit DEUS, Pio V. extincto.

Celebratis Pij novendialibus, Patres vix Comitia ingressi, quamquam & alij plures adessent patres dignitati, adeoque iretur difficiliùs in unius suffragia; miro consensu in Boncompagnum feruntur. Et sanè pronam omnium voluntatem extimulaverat recense ejus integritatis exemplum. Si quidem Alexandro Farnesio consilium de re petenti, quâ non leviter Michaëlem Bonellum offendisset, suavit nequid eum offenderet; etsi alijs potiùs Bonellus, quàm Boncompagno faveret, ac facilè abstractum Bonello Farnesium ad se pertraxisset: quo evulgato, palàm innotuit, dignum esse principatu, qui principatui anteponebat honestatem.

HISTORIA

Pontificatûs

GREGORII XIII.

CAP. I.

Creatur Pontifex.

ITaque Patres tertiâ Comitiorum die, 3. Id. Majas, ad annum fundatæ salutis 1572. *Vgonem Boncompagnum* acclamarunt Pontificem, quem Providentia, & nuntia Providentiæ fama jam elegerant. Is acclamatus, adoptavit Gregorij XIII. nomen: & in cessu, benignitate, pacisque amore patuit Pontifex. Munimenta prope Bononiam à Pio V. extructa, deijici statim jussit; nequid Bononiâ, vel Italia timeret: Egregios, ac peritos viros ijs præsertim muneribus admovit, quibus constat Pontificis Majestas: vim ingentem pecuniæ, quæ solet id temporis per lætitiâ & pompam effundi, auctam transtulit ad subsidia paupertatis: compositaque domo pontificiâ, Ecclesiam componendam, & personam Pontificis

cum

cum amore simul ac majestate sustinendam, constanter sese impendit, nec alijs studijs se permisit, quàm Apostolicæ charitatis & vigilantia.

CAPUT II.

Ecclesiæ Status hoc tempore.

ANnum Gregorius agebat septuagesimum, & difficillima nactus fuit Ecclesiæ tempora, seu Barbarorum insolentia, seu artibus Hæreticorum, seu etiam iniquis Catholicorum mentibus: Americâ, & magnâ terrarum parte obnoxia erroribus, vel pijs destituta auxilijs: Hispaniâ Belgicis turbis incerta: Lusitaniâ clade Principis perturbata: Poloniâ novi Regis ambigua, & in partes à Sectaris distracta: Angliâ ob Reginae scelus in Bonos furente: Germaniâ novis in dies tumultibus, acerbisq; Protestantium odijs convulsa: Galliâ discorde: & utraq; timente, ne Religio & Principes precario regnarent: ipsâ demum Religionis sede, Italiâ, quâ Principum factionibus, quâ suspicionibus, nec sibi satis, nec Romano Pontifici

tifici fidente. Præterea Othomannicus impetus adhuc prævalidus : debilitatum Christianorum fœdus ; Sacerdotum & factorum hominum imminuta auctoritas : Tridentinæ leges vel non servatæ, vel rejectæ : Morum ubique licentia liberior, aliâque ejus animum angebant quidem, non tamen frangebant ; & gnarus, esse facilia DEO, quæ hominibus difficiliora videntur, tempora quò magis terrebant, minùs timebat.

C A P. III.

Gregorij Consilia in Pontificatu.

ERgo advocato Patrum Senatu, primum contacto pectore juravit in Pij. V. diploma, de bonis Ecclesiæ nec clientelâ, nec alienatione abstrahendis ; mox gratijs actis, aperuit Apostolicæ arcana dominationis, & futuri consilia Imperij, quibus, etsi imparem, non tamen iniquam operam se daturum, modestiâ & gravitate paratus spondit : has esse pontificias curas, quibus & ipse gloriam adipisci vel-

vellet : Omnia ad rei felicitatem publicæ
referre : Pietatem & Catholicam Reli-
gionem ubique ferere , & colere, ac Re-
ligionis tribunal religiose habere : Prin-
cipes, Populósque conciliare: Concilio-
rum consulta , & præsertim Tridentina
commendare Urbibus , ac Regibus : vim
Apostolicæ Auctoritatis ubique retinere,
dépue eâ optimè merentes exornare: Ro-
manæ Ecclesiæ ærarium vel custodire, ne
exauriretur , vel exhaustum locupletare :
negotijs publicis pares homines commo-
dare , non scelere , aut affectu suspectos
extollere : Provincias Terrarum oneri-
bus , erroribúsque sublevare : Concita-
rum in Hostes fidei Christianorum ardo-
rem fovere : Sapientiam , & bonas alere
artes, quibus contemptis contemuntur &
boni mores: Paci demum , ac Justitiæ,
rerúmque omnium incrementis studere,
quibus & Majestas Pontificis retinetur, &
quies Populorum firmatur , & Ecclesia
Romana efflorescit , quòd non intuta,
neque contempta.

Res gestæ initio Pontificatûs.

HÆc Gregorij fortiter , ac suaviter principatum auspicantis voluntas rebus gestis comprobata fuit. Siquidem ad omnia vertit mentem , quæ Religioni ac Reipublicæ utilia , & de cora videbantur. Sancita de Tridentinâ Synodo ab Antecessore Pio adfirmavit : Michaëli Medinæ , ac Petro Fontidonio , ut violatam à Magdeburgensibus Impostoribus Catholicam veritatem , graviter & doctè , non per convicia vindicarent , animos , virésque addidit : designavit ex Purpuratis nonnullos , qui librorum Indicem , quorum lectiõne interdictum est , jam inchoatum perficerent : Carolum Boromæum , Gabrielem Palæotum , Joannem Aldobrandinum , Paulum Aretium , elegit , ad prava consuetudinum semina seriò abolenda : Obnuntiavit Episcopis , ne ab Ovibus abessent ; ac etiam Purpuratis : Cæsarem , Regémque Gallorum sollicitè monuit , ut vacuis sedibus idoneos Antistites designarent ,

rent, eosque reijcerent, qui vel ignaro Pontifice, vel non recitatâ fidei formulâ, sacris præesse auderent : Pastoribus Ecclesiarum mandavit, ne homines imperitios, aut famosos sacris ministerijs, Mysteriisque imbuerent : Ab Hispanis poposcit clarorum virorum nomina, quibus Sacerdotia demandaret, non casu, aut fraude, sed gratiâ & præmio Virtutis : Consanguineos nec sprexit, nec nimium extulit ; sed, insigni optimæ dominationis documento, maluit Suos regi : & per sese rexit, exploravitque omnia, eorum adiutus ope, qui præstarent industriâ, prudentiâ, fide ; nec nisi rogatus à Senatu ; & ne potentiæ nervos alienis crederet, Philippum Boncompagnum jam laureâ Juris conspicuum, ad purpuram evocavit. Præterea vetuit quemque per dona, & avaritiam capessere Magistratûs, eosque repenso pretio redemit, qui fuerant venales, & in quibus de Fisco cognoscebatur, ne usurparentur avidius, quàm justius ; vini ac suillæ vectigalia sustulit : Provinciarum, & Urbium, ac etiam Tribunalium clarissimos quosque Præsides, & Admini-

stros quàm constituit, quàm retinuit; De-
 mum singulis Hebdomadis diem præsti-
 tuit, quo publicè cujuscumque generis
 homines audiret, atque Aulam in officio
 contineret; unde metus improbis fuit, &
 spes probis, & minùs peccabatur, quò fa-
 ciliùs peccata Princeps noscebat.

C A P. V.

Promovet Christianorum fœdus In Turcas.

MOx renovato Christiani fœderis,
 quod in Othomanos à Pio V. inter
 Hispanos, Venetos, & Pontificem firma-
 tum fuerat, ardentiore studio sollicitavit
 Reges ac Principes, ac ipsum Cæsarem,
 Polonum, & Gallorum Regem, ut ne de-
 essent Christianæ rei, neu spem Ecclesiæ
 fraudarent; misitque in Galliam, Anto-
 nium Mariâ Saluiatum, rei maritimæ scien-
 tem, ut propiùs expeditioni consuleretur,
 ac Messanam Paulum Odeschalcum, qui
 solventi Classi nomine Pontificis bene
 precaretur. Hæc dum parantur, ab Hi-
 spano literæ perferuntur, quibus disertè
 signi-

significat, se ob hostilia Gallorum tentamenta, aliàsve causas, haud posse aliò suas vires distrahere, ne domi foret inermis ac vulneri proximus. Exarsit ad hæc Gregorius eò acerbìus, quò res accidit inexpectatior, statimque monito Gallo, ut desisteret, si quid moliebatur, ne ab hæreticis offenderetur, dum offendit; vehementiùs egit cum Rege Philippo, ut memor promissi, vanâ formidine abstineret: nec privatis commodis rei salutem publicæ post haberet; posse Othomanos, ni arceantur, in ipsum Hispanæ Potentiæ corpus inolescere, & frustra eos ab Italiâ depelli, ni extra Italiam depellantur. Tantùmque apud Philippum Gregorius valuit, ut quamvis obsisterent, qui à consilijs erant, is Ioannem Austriacum iusserit cum toto Hispanico apparatu in Orientem pergere. Sed victoriam abruptit discordia; unde mora, & ex mora consumpto Nostrorum commeatu, & auctis hostium animis, necesse fuit Nostris vel invitis retrò vela, & vota vettere: pessimo exemplo; nihil magis prodesse Othomanis, quàm Christianorum discordiam.

Indoluit ex animo Gregorius, ubi paratam victoriam evanuisse comperit: neque tamen incæpto destitit: & conatus ortas suspiciones tollere, tantum apud Fæderatos præstitit labore immenso, studioque increbili, ut ad annum proximum Classis instructior & potentior appareret, quæ Trecentis Triremibus, aliisque Navibus, & septuaginta militum milibus constabat. Imò iterum Cæsarem, Gal- lum, aliósque, ac etiam per certos homi- nes Persarum Regem, ad bellum Otho- manis inferendum incitavit, ut divisa in plures hostes potentia faciliùs vinceretur. Summa erat Gentis Christianæ, ac ipsius Gregorij spes; verùm misso Pompeio Lanoia, dum Joaunem Austiacum per- pellit, ut ad diem dictam, seu Aprili ver- tente, seu Majo ineunte, portu discedat, certior fit ab Oratore Veneto, pacem in- ter Venetos ac Othomanum esse confe- ctam; quippe illi timuere ex Hispano- rum morâ, ne producto in dies bello, adeoque viribus omnino debilitati, magis ab Hispano penderent, quàm ab Othoma- no metuebant. Atque ita totius Eccle-
siæ

sia suspiriis, viribusque armata Gregorij Mens, voto, & victoriâ excidit, non constantiâ, quæ loco victoriæ est; sublatâ in posterum omni spe instaurandi fœderis, tum exortâ diffidentiâ, tum Hæreticis bella ex bellis ferentibus, quibus gravius resistitur, quam Barbaris. Nisi malumus hæc referre ad Providentiam, quæ vota belli transtulit ad Pacis artes, quibus Generi humano Gregorius profuit citra cruorem innocentius & perennius.

C A P. VI.

Studium juvandæ Gallie.

NON minore curâ tangebatur Gregorius, rerum Gallicarum, quæ factione, & astu Gasparis Colinij, adhæreticos in dies validius inclinabantur, quòd Rex ipse desponsâ Regi Navarræ sorore, adminicula præbere, ac in spem occupandi Belgij erectus, eorum auxilijs quodammodo indigere videbatur; quamquam hæc in speciem acta. Igitur Carolus Lotharingus conscius Pontificiæ sollicitudinis, Gregorium adit, eumque percontatus,

tus, quid potissimum id temporis vellet : illo subiiciente , Ut Hæretici Galliâ exterminarentur; narravit Coliniij, & Assellarum cædem, quæ hoc pacto peracta fuit. Cùm is de Regiâ pedem efferet, ex improvîso petitus est sclopo de fenestrâ pannis coopertâ, & quo authore, incertus, per impatientiam & superbiam, ja&is-que in vulgus vocibus, irascebatur cum Suis Regi, qui compertâ hæreticorum immodicâ irâ, maluit ulcisci, quàm connivere, & immissis militibus opposuit furori severitatem. Quæ res uti Catholicæ Religioni sublevandæ opportuna, ita maximè jucunda Gregorio accidit; qui statim, indictâ omnibus hac de causa, noxarum veniâ publicè cum insigni Romanæ Nobilitatis coronâ, de D. Ludovici, quod est illustre Romæ Gallorum Templum, solemnes Deo grates egit. Auxere ejus lætitiâ Henrici, & Principis Condæi literæ, quibus ut in fidem Romanæ Ecclesiæ reciperentur, postulabant: iisque annuit libentissimè. Insuper Carolo Regi suavit, ne Othomanicam in Aulam Oratorem mitteret, qui consilia pacis Otho-

mano insinueret; & quem præmiserat, abduceret hominem incertarum partium, Colini studiosum eoque infensum: neu amicitia, & consuetudine uteretur eorum, qui ad ambitionem suasque fortunas, non ad Rempublicam parati essent: sed potius regijs moribus insisteret, & digna Christianissimo Rege moliretur. Atque ut in hæc propelleret; ad eum quamvis invitum, legavit Flavium Ursinum Purpuratum, notæ nobilitatis, & prudentiæ; censuitque è Majestate Pontificis esse, nihil paternæ curæ prætermittere, ne dissimulata mala forent insanabilia. Namplerumque dissimulatio corrumpit Regna.

C A P. VII.

Suscipit obsequia Principum.

VErùm jam ubique Gentium vulgarâ Gregorij famâ, & virtute, certatum est gratulationibus, & reverentiâ. Cæsar, & Reges, tum Veneti, Lucenses, alijque Romano debita Pontifici venerationis obsequia per Oratores detulerunt, & in primis Bononieses erga optimum Civem, deque patria statim benemeritum, quâ

culis Numismatis quâ excitatâ æreâ statuâ, quâ legatis nobilissimis Viris, gratam voluntatem significavêre, quam novo beneficio rependit Gregorius, instituto apud eos Concordiæ Magistratu, ad quem omnes Civium controversiæ ita devocarêntur, ut Nemini liceret subire forum, eo non decernente: unde fori minor tabes, nec tantum in Advocatorum seu ignaviâ, seu perfidiâ pretium, Accessêre quoque Romam insignes Italiæ Principes, Octavius Farnesius, Gulielmus Gonzaga, Alphonsus Atestinus, sed ortâ offensione ob confessum in sacello pontificio, sibi (ut rebantur) imparem, publico se conspectui subtraxêre Mantuanus, & Ferrariensis: quamquam hic Gregorium privata allocutione veneratus, & ab eo mensâ humaniter exceptus. Emanuel Philibertus Sabaudus etsi avidus Pontificij oris visendi, magnificè per Philippum Atestinum Generum rem transigit, impetravitque, ut Ordo S. Michaelis, nuper ab ipso institutus, confirmaretur auctoritate Pontificâ; eique præficere-tur perenni serie Sabaudix Dux; adeo-
que

que nobilior esset ac firmior Ordo, quò Princeps excellentior.

CAP. VIII.

*Sedat Controversias, &
Discordias.*

INter primas Dominantium curas, Gregorius censuit esse Pacis amorem, ac dulcedinem Otij non indecoram, quâ Cives Principibus, atque ipsi inter se Principes, & Civibus Cives conjungerentur. Quippe Religio publicæ magis, quàm privatæ dignitatis incremento nobilitatur: ac privata dignitas ferè divisis, publica conjunctis rebus animisque excellit. Idcirco sustulit cuncta, quibus discordiæ incedebantur: satiusque duxit paucos, quàm Rempublicam offendere. Dedit operam, ut Scipio Gonzaga, postea Purpuratus, & Gulielmus Mantuæ Dux, litem gravissimam dirimerent æquis conditionibus: Alphonsum Ferrariæ Ducem de finibus, aliisque rebus, cum Apostolicæ Cameræ Administris disceptantem, datis arbitris conciliatum voluit.

Imminentem Italiae ex Petiliani adversus Nicolaum Ursinum tumultu, belli flammam restinxit citius, quam alimenta supeditarent novarum rerum cupidi: Philibertum Sabaudiae Ducem absterruit ab Edicto, quo Ecclesiae forum offendebar; Effecit, ut Veneti Mercatoribus Mare Adriaticum navigantibus desisterent negotium facessere: Dolanum Magistratum, quem Parlamentum vocant, interposita Caesaris & Regis Hispani voluntate eò adduxit, ut Archiepiscopo & Catholicis Vespertione ablatam, sive auctoritatis, sive Religionis libertatem restituerent. Sed praecipue in sedando Urbinatum motu effulsit Gregorij prudentia, fraudis, & ambitionis expers. Guidobaldus à Ruvere Urbini Dux, quò Francisci Mariae filij tum in Aula Hispana, tum in Classe Christiana fortunam splendidiùs aleret, nova imposuit tributa; unde Urbium ira, & questus, & demum seditio; Ad Gregorium Cives lamenta, & Principatum deferunt; Verùm ille nec avidus alienarum rerum, nec offensio-num amator, eos vehementer increpuit,

&

& reiectis querelis, ac legatis, seditionem coërcuit; Guidobaldum severiùs redarguit, monuitque seriò, ne nova onera præciperet, ex quibus invidiam, non vires, & sæpè exitium Princeps sibi parat. Illud etiam certamen, quod Hierosolymitanos inter, ac S. Mauritij Equites graviter intendebatur, tum de Ordinum dignitare, tum ob utilitatem fructum ab Hierosolimitanis interceptorum, prudenti consilio avertit, nullius irâ, & damno. Neque unquam approbavit eorum calliditatem, qui fortunam partium speculantes, malunt bella, quàm pacem. Ideòque Regum Principumque Christianorum lites componere, artem Pontificis propriam ratus, nihil omisit, quo turbas, & discordias comprimeret, veluti semina publicæ infelicitatis, & Divinæ irritamenta ultionis. Et conatus inter Galum, & Hispanum subortas identidem offensionum, suspicionumque causas amovere, censuit aliquando è maiestate esse, famam aspernari, ne officeret publicæ paci, quâ invalescit fortuna Religionis,

CAP. IX.

Ædificia publica.

ANimi Magnitudo ædificiorum præstantiâ ferè oblectatur, quasi quadam imagine sui. Certè Gregorius excelsam Indolem statim appulit ad egregia opera, quibus rem publicam fulciret pari sumptu, & utilitate. Primum Aulæ Vaticanæ partem (quam Regiam nuncupant, quod Regum ibi legati audiantur) non modò suâ absolvit mole, sed illustribus instructam picturæ monumentis exornavit, specie plane regiâ. Mox omnia aggressus est reficere, quæ publicum decus & commodum afferebant; instauravitque, quicquid ruinam accepisset, vel minaretur: Pontem Senatorium vi temporis, fluminisque prolapsum, reparavit novis, & validis substructionibus, & Portam Gælimontanem lapide Tiburtino munivit: aperto ad Tusculanum agrum facili, & molli tramite. Cùm autem comperisset, Flaminia litora à Piratis circumveniri, Turrim ibi excitavit excelsam, cujus prospectus

ſpectus adverſus Piratas pro munimento
eſt. Immò cùm Viatores plerique ad
forum Livij aquis intumeſcentibus cede-
rent, eorum conſuluit calamitati, extru-
cto nobili ponte, quo nullum ab aqua
periculum deinde fuit. Tantòque ardo-
re in hæc molimina incubuit, ut ubique
ferè terrarum, impreſſa videantur ædifi-
ciorum ab eo conditorum veſtigia. Nec
ille Oppidi nobilitatem, ſed operis com-
moditatem perpendebat, Omitto Colle-
gia Nationum, quæ Romæ omnibus pa-
tent; Romanum in primis Collegium, So-
cietatis Jeſu Seminarium, & omnium di-
ſciplinarum, linguarum, Gentiùmque
Academiã, tam magnificè excitatum ut
ſit inter primaria Romæ ædificia: Colle-
gium Germanorum, & Hungarorum:
Seminaria Anglorum, Græcorum, Ma-
ronitarum, & Neophytorum: Alia etiam
Seminaria ubique terrarum poſita, Vien-
nenſe, Dilingenſe, Auguſtanum, Bran-
ſpergenſe, Græciènſe, Pragenſe, Rhe-
menſe, Fuldenſe, Olomucenſe, Muſſi-
pontanum, Claudiopolitanum, Vilnenſe,
Arimaenſe, Auxuchixamenſe, ac Illyricum
Lau-

Laureti; Præter alia loca Religionis Ordinibus constituta, seu templa fuerint, seu domicilia tam Virorum quàm Virginum. Cetera profectò, quæ tum Romæ, tum alibi construxit, instruxitque, vix erit numerare; siquidem incensus iuvandi studio, quodcumque vel necessarium, vel utile publicæ rei compererat, citiùs perficiebat, quàm optabatur, superavitque vota populorum. Pietatem Gentis Christianæ ad Domum Lauretanam proficiscentis. extimulavit, Lauretano itinere pontibus semitisque constrato. Bonarum Artium studia propagavit Romanâ Academiâ amplificata. Romam ipsam nobilitavit, Vaticano Templo aris ornamentisque aucto, & præcipuè admirabili Sacello; quod Gregorianum vocant, cujus præstantiam & musivi operis excellentia, & ornamentorum artisque ingeniosa magnitudo promunt, Majestatum emulante gratiâ; in quo per summam magnificentiam, & pompam, Ossa D. Gregorij Nazianzeni, collocavit. Insuper eandem Horreo ad Thermas Diocletiani instituto locupletavit, Aquâ etiam (uti vocant) Virgine adductâ, præclarisque fontibus recrea-

recepit; ac præterea Vaticanum Palatium à tot Pontificibus paratum, exornatumque novis & eximijs additamentis ita illustravit, ut certet cum pretio stupor, ars cum operis magnitudine, neque hic videatur unius sed multorum labor. Aedes Pontificias in Quirinali Monte primus posuit, & aëres salubritate, ac amœnitate loci succedentibus Pontificibus pergratas. Capitolium refecit, altissimæque mole excitatâ spectabilius reddidit, quò sublimius. Si animus esset reliqua evolvere, forsantædio forem ad majora festinantibus. Arcem sanè Anconitanam prætermittere non licet, quæ Pontificiæ ditionis Cardio ad mare Adriaticum videtur; Hanc Gregorius novis circumduxit propugnaculis, instrumentisque bellicis communitam, in eam speciem formamque protendit, quæ hostibus terrori, alijs admirationi sit. Nec ostentabat Gregorius hæc monumenta instar captantis benevolentiam, aut famam, quam in virtute reponebat; sed libenter gratificabatur Populis, ut vehementiùs Pietati, moribùsque probis studerent. Nam plerumque constructa liberali-

liberaliter, ac magnificè à Principibus
ædificia, firmamenta Urbium censentur.

C A P. X.

Studium liberalitatis in Omnes.

ROmani Pontifices apud iniquos rerum æstimatores hâc summopere invidiâ flagrant, quòd sæpe parùm concedatur ærumnis Ecclesiæ, quæ ferè inops & angustijs pressa, pendet non minùs à liberalitate, quàm à voluntate Pontificis. At Gregorius invidiam in admirationem traxit, tantùmque pecuniæ in omnia hominum genera effudit, ut prodigiosa non minùs, quàm prodiga visa fuerit hæc largiendi consuetudo; quippe nullum imposuit vectigal, & plura sustulit non vulgaris pretij, ac fructûs: & præter ea quæ memoravimus, illud certè, quod è farinâ parabatur, tanti erat, ut quidam potentia nervus videretur, humaniter tamen dimisit, mirantibus Principibus novum Gregorij morem, tributa reddentis, non accipientis. Sic non ex vano constabat Gregorij potentia, dum pro pecuniâ be-
nevo-

nevolentiam colligebet. Nulla Principum, Urbium, locorum, Civium, Ordinum, ac familiarum miserior, seu angustior fortuna innotuit, cui privatim, & publicè non adfuerit aliquo subsidij levamento, citra jactantiam, & nullâ ex magnitudine liberalitatis spe; nec utebatur auctoritate sine beneficentia: Principes Catholicos & consilij, & nummis juvare; Purpuratos supellectile, & proventibus: Episcopos donis recreare: alere, & amare Cœnobia, religiosasque familias; Xenodocchia, & invisere, & ditare; Opes Nobilibus, Virginibus dotem, Pergrinis, alimenta ingerere: patriâ extorres, præsertim Religionis causâ benigniùs excipere; nulli Mortalium opem postulantium deesse. Neque tanta liberalitas ex magnitudine solùm, sed magis affectu metienda est. Hilariter & promptè subveniebat. Palàm asseribat, Ecclesiæ proventus ad pauperes, egenosque spectare, quibus plurima centena aureorum millia (ut minimùm referam) distribuit; rogatusque sæpius, iisdem non irascebatur, sed blandiebatur; aiebatque se multum illis de-

debere, qui Pietati propagandæ subsidia postulabant, quasi docerent impendere Christi patrimonium quàm honestissimè: animùmque generis humani rectorem illa quotidie fatigabat cogitatio, num hospitia ærumnosorum aliquo commodo carerent; & missis primùm Viris explorabat diligenter, mox abundanter omnia mittebat; ratus, ad pontificias curas in primis pertinere, calamitosos homines, quibusex morbo vel æumnâ, nulla est sui cura. Sibi quoque multa subtrahebat, ut alijs suppeditaret; egenis pretiosa largiri. sibi vilia retinere; quod sane indecorum Majestati videbatur, sed in Apostolica Sede oportet Caritati Majestas cedat; Et eò devenit hic beneficis animi ardor; ut non modò Romam, & pontificiam ditionem, sed Italiam cunctasque Europæ provinciis, Africam, Asiam, Indias, Americanùmque tractum completeretur, more Solis omnia foveudo. Christianos, religiososque homines apud Montem Sinai in Palæstina, Mesopotamia, Thracia, Armenia, Iaponia & in ultimis Naturæ finibus degentes insigni be-

neſicientiâ complexus eſt, quia remotiores, & omni ope deſtitutos: Recepit in ſinum fouitque liberaliter Cyprios, aliôſque iram Barbarorum ſeu expertos, ſeu fugientes: Britannos, Scotos, Hybernos, Belgas, Germanos, & quoscumque Hæreſis vel patriâ vel patrimonio deiecerat, quâ proventibus, quâ eleemoſynis detinebat; Captivos in Africa; Adductos triemibus in Italia, dato auro in ſingulos annos, eximere ſolenne illi erat, ac decorum; Turcæ ipſi, reliquiæ Naupaſtææ victoriæ, mirabantur ſe captivos magnificè à Gregorio tractari. Academias, Romanam, Peruſinam, Lovaniënſem, aliâſque ſua ære iuuit: Collegia & Seminaria ljuvenum memorata non modò ſtruxit, ſed aluit: Literatos autem penè omnes, quos illa tulit ætas, rerum honorûmque præſidijs cumulavit: inſtruxit etiam Typographiam, ſubſidium Literatorum. Dixiſſet, Gregorij Imperium non aliud fuiſſe, quàm Bonis artibus prodeſſe. At verò Religionis, & pacis cauſâ quantum impenderit, miſſæ expeditionis, legationeſque ad Chriſtianos Principes, ad Magnum Mo-

Moschoviæ Ducem, ad Regem Persarum, omnesque penè Nationes, facile indicant; ut sileam tot centena aureorum millia Rodulpho Cæsari, Henrico Gallorum Regi, Germaniæ Principibus, aliisque ab eo impertita, arbitrate, nullum esse Optimi Pontificatus instrumentum stabilius, quàm liberalitatem in Principes Catholicos; atque unicum Religionis tuendæ præsidium, benemerere de omnibus. Philippum Hispaniarum Regem Toletanæ Ecclesiæ donavit fructibus, qui amoto tot annis Caranzâ Archiepiscopo, ad vicies centena aureorum millia pervenerant; quasi Regum sit, multum alijs donare, Pontificum Regibus. Atque hoc mirandum in Gregorio fuit, quòd in tanta largiendi seu necessitate, seu facilitate, ingentem auri vim, quæ ad ipsum ex hæreditate Episcoporum, fructibusque Sacerdotiorum pertinebat, non ad se plerumque traxit, sed ad comoda & subsidia locorum, in quibus colligebatur, in id (quod maximum erat) contractum ex concessis libellis pretium in pauperes, præsertim externos conferebat. Alia ejusdem

dem liberalitatis officia; tum in classe adversus Othomanos parandâ, tum in Avenionensi tractu muniendo, tum in pontificiâ ditione exornandâ, tuendâque, constant reliquâ narratione; nam Gregorio non sui, nec Suorum, sed sola Reipublicæ cura fuit.

CAP. XI.

Ærarij cura.

VIdebatur hæc tanta Gregorij liberalitas ærario illudere, sed revera illud conservavit, auxitque, citra tamen avaritiam, & lamenta populorum: Amabat redditus & opes Ecclesiæ, ut præsidia, sed oderat Civium onera, ut semina irarum. Itaque modum posuit immodicæ cupiditati, non honestæ utilitati. Abrogato eo Consilio, in quo artes exquirebantur pecuniarum, tam Civibus ingrata, quàm noxiæ Principibus, publicè testatus fuit: hisce artibus imminui decus Pontificium, si citra necessitatem usurpentur. Cum autem Apostolicæ Cameræ alienatis ferè rebus, ac proventibus, modica

C

ærarij

ærarîi locupletandi spes affulgeret, utilius duxit, res alienatas redimere, quàm novis vectigalibus turbare patrimonia Provinciarum. Peritissimis Viris ad hæc negotia delectis, plurima tum oppida, tum vectigalia recuperavit: auxitque Censum Apostolicum annuo centum millium aureorum redditu. Addidit Pontificiæ ditio- ni plura loca, in agro Sabino, in Latio, in Flaminia, in Umbria, & alijs provincijs: Cisternam in finibus Italiæ, Gallis, Hispanisque ad belli momenta opportunum Oppidum, immisso per Sabaudum milite recepit. Præterea alijs quoque rationibus Ærario prospexit, sublatis impendijs, vetitis incommodis, opulentis agris emptis, inventis in agro Spoletano ferrifodinis, procuratâ per Italiam Salis, & aluminum negotiatione; auctis Anconitani Empo- rij commercijs, assertâ Beneventanâ aquâ; Cerviæ Salinis amplificatis: Vallibus Ravennatibus magna ex parte, magnoque emolumento absterfis & siccatis: rebûs- que similibus præstitis, non avaritiâ, & pecuniæ amore: sed quia Christianæ rei ipem maximè sustentat Apostolici ærarîi magni-

magnitudo. Evolvit accuratè arcanas tabulas, & antiquiora scrinia, ut amissos vel neglectos Ecclesiæ proventus recognosceret. Compressit eorum audaciam, qui jure clientelæ iniquiore utebantur; restituit, quæ avaritia seu principum, seu ignavia Præsidium subtraxerant. plurimum æris alieni dissolvit: fœdissimùmque Multorum morem, Apostolicæ Cameræ utilitatibus privato studio adversantium, coercuit industriâ potiùs quàm pænâ. Abstinent tamen eâ pecuniæ conquisitione, quæ utilior Principibus, quàm Civibus est: frumenta negavit extra fines Pontificios deduci, ne quid annonam falleret: nunquam potuit flecti, ut oblatum à Populo Romano aurum acciperet, responditque, Principis esse dare. Destinaverat alveum ab Aesino flumine ad mare derivare, utilioris navigationis causâ, & alia meditabatur, nisi populorum aliquod incommodum intervenisset. Demum ne posset unquam fraudibus Ærarij, aut Cameræ Apostolicæ consentire, sancitum à Pio V. de re Pontificiâ, nec clientelâ seu feudo, nec alienationibus distrahendâ, confirmavit.

vit diploma, in ejusque verba rursus juravit unà cum reliquis Purpuratis. Sic liberalitati, quod rarum est, providentiam conjunxit, voluitque bene mereri de Republica, sine ullo Reipublicæ detrimento.

C A P. XII.

Res Urbanas, & Pontificiam Ditionem componit.

ET quoniam plerumque ad Urbis exemplum Orbis componitur, tenuit constanter id moris, ut nihil in Urbe sine-
ret impune, quod contumaciæ, aut impietati faveret; quarum altera Principem, altera Deum violat; Plurima statuit, quibus morum disciplina constaret sine flagitijs. Vetuit palàm feri sermones, aut vulgari libellos, de Principum fama, quæ non videtur magna, nisi mendacijs corruptatur. Multavit illos, qui obrectatione gloriam pretiū invequærent. Eorum, qui causas referunt, numerum deminuit, nam pauciores meliores. Domesticos munera captantes exclusit domo, & gratiâ. Deponi seriò jussit pessimum,
armo-

armorum genus, enses, sclopósque brevissimos. Abolevit perfugia facinorosorum, præsertim in ædibus Purpuratorum, ac etiam Pontificijs, ne vitia crescerent, dum effugia non deessent: Alearum aliorumque lusuum palæstras, infamiæ damnavit: fœnora Hebræorum Urbem exhaustientia compressit. Homicidij, & monetæ adulteratæ reos, extremo supplicio affecit; illos, quòd hominibus vitam, hos, quòd urbibus subsidium auferrent. Abiegnis è regno Neapolitano advectis Romana ædificia instruxit. Institutâ, ut memoravimus, præclarâ Typographiâ, egregijsque characterum, etiam exoticorum typis cumulatâ, ingentia volumina edidit, utilitum religioni, tum bonis artibus curâ. Restituit Decreta à Gratiano collecta, additis per Jacobum Pamelium Conciliorum aliorumque Decretorum appendicibus. Congessit in unum Constitutiones, & Diplomata Romanorum Pontificum. Et sacrarum Monumenta Literarum aggressus recognoscere, Græca correxit, accersito è Gallia inter alios Joanne Maldonato, aliâque præstitit, vel præsentibus vel

posteris laudanda. Ditioni verò Pontificiæ, consuluit annonæ copia & utilitate, etiam dum fames urgebat. Pestem sæpius gliscentem longè arcuit. Viterbienses fines enormi Grillorum intemperie purgavit, præmio allectis hominibus, qui eos, quâ virente fronde, quâ expanso lino profligarent. Piratas deterruit, dispositis per litora custodibus, & triremibus. Natas Romæ, Bononiæ, Imolæ, Asculi, alibique civium dissensiones compescuit, nunc exilio, nunc ferro extra Nobilium metum aut favorem. Pacem semper coluit; nec unquam vel ipse bello se implicuit, vel Suos, nisi adversus Dei hostes. Urbes certè regionésque Gregorio subjæctæ nunquam expediere decem & tribus annis (grandi Pontificatûs spatio) arma in Catholicos Principes, rarâ felicitate; quæ quia magna erat, more humanarum rerum, aliquantulum immunita est ob nocturnas diurnasque Sicariorum grassationes, quas ortas ante ipsius Pontificatum plectere magis potuit, quàm tollere. Adeò fatale est singulis propè Principatibus, ut ne bello, aut belli calamitatibus careant.

CAP. XIII.

Ecclesiam auget Religione, & auctoritate.

OMnia Gregorius ad Ecclesiam retulit, cujus decus propositum est Pontificibus, quemadmodum reliquis Dominantibus imperij fama. Primum, uti diximus, animorum pietatisque Rectores, & Ecclesiæ primarios administratos, Antistites, in urbibus constitutos, abesse volebat; ne illæ suo destitutæ Episcopo, in casum darentur, & vitia. Graviter increpuit eos, qui grassante peste malebant sibi, quàm ovibus prospicere. Absentes ad reditum compellebat; & Regibus, ne abducerent, aut si abduxissent, ut remitterent, validè suadebat, more imperantis; Ipsos quoque Purpuratos perpulit, ut cederent sedibus, quibus adesse non possent, seu Romæ desiderio, seu aliâ causâ. Primus Marcus Antonius Columna Salernitano Archiepiscopatu se abdicavit, quem reliqui Romæ degentes imitati fuere, insigni tum religionis, tum reverentiæ, in Grego-
rium

rium experimento. Mox difficillimum ad opus, quod Antecessores, optavêre potiùs, quàm tentavêre, vires omnes intendit: fregitque turbinem difficultatum, usus non solo timore, odij interprete, sed magis amore, obsequij magistro. Ergo delegit viros probitate, doctrinâ, prudentiâ æque spectatos, qui omnia Christianæ Reipublicæ officia, instituta, morésque recognoscerent, explorarent mala, admoverent remedia, excinderent vitia, bene sanctéque ausa foverent, nihil intantum, intactumque relinquerent, quod posset in melius verti. Incredibilis labor fuit; sed labori par fructus. Auctoritate principes, imperio populos adduxit, ut parerent, neu adversarentur, miscuitque lenitati severitatem. Misit in omnem Italiam septem Antistites, dignitatis & virtutis merito pares oneri, ac in primis Augustinum Valerium in Dalmatiam, Carolum Borromæum in Alpes Rhætiæ. Germaniam, Poloniam Hispaniam, per Pontificios Nuntios, aliasque per alios lustravit provincias vel remotissimas, obtinuitque, quod Eugenius IV. alique Pontifices ex-

petie-

petierant, ut Constantinopoli Visitatio Apostolica nomine Pontificis haberetur. Sic rem difficillimam ad exitum perduxit, non vi sed magis constantiâ; Orbemque terrarum, suum scilicet Ovile, more Pastoris recognovit; Indos verò, Arabes, Cophtas, Hebræos, Mahometanos, omnisque generis sectæque homines, omni ope ad Christianam Religionem sollicitavit, iisque admirationi fuit. Plura religiosi hominibus utilia sancivit, ne in Hispanis cænobijs pauciores, quàm tredecim commorarentur: ne ad prophanam auctoritatem confugerent: ne cum Episcopis certarent. Cistercienses, Basilianos, Præmonstratenses, & cunctos Religiosæ vitæ Ordines, ac in primis Societatem Jesu sublevavit ope ac patrocinio; Sacrarum Virginum pudori ac solitudini prospexit, Abbatum loca & munia, temporum hominumque injurijs labefactata, revocavit ad suam formam. In Primarijs Canonico- rum Cætibus jussit ali hominem Theologiæ peritum, qui reliquos imperitos instrueret. Patochorum redditus minores centum aureis, vetuit ullâ pensione deminui,

ut honestiùs viverent. Ægrotis Christianis interdixit, ne medicos Hebræos accerferent, qui vitam corpori polliciti, salutem animo invident. Concilij Tridentini leges aut suavit, aut insinuavit. Nil demum prætermisit, quod Numinis gloriæ verteret, unde Ecclesiæ Religio & auctoritas stat crescîtque: atque hac de causa tam liberaliter sacrarum Indulgentiarum opes in Humanum Genus effudit; ut simul Ecclesiæ charitatem Populis exhiberet, simul Populos in Ecclesiæ veneratione contineret. At maxime ejusdem Ecclesiæ dignitatem sustentavit per Seminaria jam memorata; nam ex ijs, tanquam ex Arcibus, validè tum Religio propugnata, tum Hæresis & superstitio oppugnata fuere. Ex Collegio enim Germanico eximij Athletæ prodiere; quorum opere ac voce Catholica res stetit, nec modò hi minorum, sed etiam Majorum Gentium Duces fuere, tres scilicet septemviri Imperij Electores, aliique Archiepiscopi, Abbates, Principes. Anglia etiam invictis suppetijs ab Anglicano Collegio adjuta, ex quibus triginta & quatuor pro Fide Roma-

Romanâ Romanique Pontificis auctoritate tormenta, & mortem perpeffi sunt. Sic viguit inter funera admirabilior Religio. Collegia verò reliqua tam Græcorum, quàm Maronitarum, & quæque alibi Gregorius condidit, eduxêre penè immensam Virorum aciem, qui doctrinâ & pietate Romanæ Ecclesiæ, Sedique Apostolicæ conciliavêre auctoritatem atque amorem. Quanta demum Religionis incrementa ex Romano Collegio profecta fuerint, ac in dies profiscantur, Roma, & Orbis terrarum testantur; namque ad omnes Oras inde latiùs manavit Christi odor : ut fileam tres Summos Pontifices, plurimos Purpuratos Antistites, sapientésque viros innumeros, qui ex ejus disciplinâ egressi, Catholicam Ecclesiam & sustinuêre laborantem, & ornavêre regnantem. Atque adeò ausim dicere, hâc potissimùm machinâ fuisse à Gregorio debilitas portas Inferorum, per hæreses & scelera in Ecclesiam eo tempore invalescentium.




CAP. XIV.

Hæreticos arcet ab Italia.

HÆreticorum colluviem, Ecclesiæ suspectam semper inimicamque, cōcruit implacabiliter, & præcipuè contendit, ne in Italia, hoc est in Ecclesiæ sinu consisterent, gnarus, Hæreticos more anguium semper lædere, quò magis blandiuntur. Sollicitavit Sabaudum ad Genavam, hæresum Asylum, occupandam. Cavet, ne Calvinæ Institutiones, aliæque hæreticorum volumina in Italiam Basileâ deportarentur, ac dispergerentur. Missos Romam ab Elisabetha Anglorum Regina homines hæresim circumferentes, accuratè inquisivit. Carcere publicisque supplicijs severè ultus est eos, qui accessissent, vel injuriam sacris rebus, vel insidias Religioni struentes. Hominem exterum, qui ex ara calicem, spectante populo, ad D. Petri projecerat, facibus per Urbem ustulatum, ac pervicacem in ignem conjici vivum jussit. Absterruit Venetos, ne ob negotiationum commercia Venetias

An-

Anglum Legatum admitterent. Henrico Gallorum Regi dissuasit, ne Salutarum tractum Helvetijs divenderet, quorum aliqui Hæresum studiosi, indelabibus Italiani inspersissent. Monuit Sabaudia Ducem, ut Augusta Taurinorum expelleret Hæreticos, qui jam cōingressi, exitium meditabantur principi & principatui. Misit in fines Italiae homines è Societate Iesu, ut diligenter Sectariorum, quorum spes Italiae corrumpendae inhiabat, vel turbarent consilia, vel studia opprimerent. Portus, merces, Bibliothecæ omnes ejus mandato excutiebantur, ne quid pravorum librorum celarent, quorum lectio primus est ad hæresim gradus. Neque otiosa fuit aut inanis hæc industria id temporis, quo natæ nuper hæreses adolescebant, fervebantque, ac omnem facile Italianam furijs opplevissent, nisi Gregorius obstitisset, quâ pacis artibus, quâ prudentiæ viribus. Et servatâ Religionis arce, Sectarum impetus retardabatur fortius, quò remotius grassabatur.



CAP. XV.

Bene meretur de Principibus.

NUnquam in officio Principes magis continentur à Pontifice, quàm cùm de ijs bene meretur. Hoc sane arcano usus Gregorius, omnia impetravit quæ voluit, dum omnia concessit quæ potuit. Simultates cum nullo exercuit: offensiones novis beneficijs repressit; & justitiæ constantiæque tenax, nec odio fuit, nec contemptui. Parentis morem usurpabat, suaviter increpando, qui aberrabant, & fortiter sublevando, qui graviore fortunâ premebantur. Nec ullum ferè Principem Christianus Orbis vidit, qui non senserit Gregorij opem promptiorem, quò magis necessariam: & quamquam alibi narrantur, hìc breviter aliqua indicare, non erit ab re. In Italia Cosmo Mediceo Magni Ducis titulum à Pio V. tributum asseruit, adversus iram Maximiliani Cæsaris. Alphonsum Ferrariensem controversijs sedatis, Sedi Apostolicæ, Lucensibus, Bononiensibus & Francisco Me-

Mediceo conciliavit. Guilielmum Gonzagam Mantuanum liberavit metu armorum, quæ inferebat Sabaudus, ipsûmque Sabaudum munivit non modò S. Mauritij Ordine confirmato, sed etiam contra imminetia pericula. Venetos tanti fecit amavitque, ut spem meliorem fecerit ijs, tum in Othomano repellendo, tum in eorum societatem alliciendis reliquis Principibus, tum in ijsdem ornandis, misitque Benevolentiae testimonium Rosam Pontificiam Mocenigo Duci, munus Regibus gratissimum; Ortas inter eos Hispanosque ob navem captam discordias abolevit, navi recuperatâ. In Germania nulli non præsto fuit. Maximilianum Cæsarem, licet incerto consilio incertaque fortunâ utentem, ob incerta temporum, omni ope profecutus est ad imperij decus sustentandum, & Rodolpho relinquendum, & præcipuè ad capeffendum, quod oblatum fuerat, Poloniae regnum. Archiduces Austriacos, eorûmque sorores, & Mariam Augustam, quâ honoribus, quâ subsidijs affecit; Ioannamque Austriacam Lauretum profectam, singulari ho-

honoris testimonio excepit. Ernestum Bavari fratrem & Romæ magnificè tractavit, & Coloniensem ad dignitatem extulit. In Polonia non modo Regi Stephano, ubi ejus pietatem cōperit, peramanter assensus fuit, sed nobilioribus quibusque favit: Albertum Laschium eidem Stephano reconciliavit: Georgium Radzivilium Romam vocavit, sanctissimisque moribus instructum reddidit Poloniæ, purpurâ & dignitate gratiorem. In Gallia Regiam securitatem hæreticorum astu laborantem, Carolo & Henrico Regibus, sustinuit consilijs & auxilijs, Guisios & Carolum Borbonium purpurâ ornavit. Hispaniæ verò Regi Philippo II. libenter gratificatus fuit; quippe ejus potentia timorem Othomano, spem rei Christianæ afferebat. Ioannem Austriacum ejus fratrem ex victoria Tunetana reducem, Romam invitavit, accepitque regio apparatu Lauretum accedentem; eique ut solium Tunetanum traderet, vehementer suavit Philippo, qui noluit potentiâ efferre juvenem, quem victoria extulerat, eoque suspectum spei.

Nec

Nec de Catholicis modò, verùm etiam de alienis à Religione Principibus, optimè studuit mereri, gnarus, magnos animos beneficijs potiùs, quàm curis hostilibus infringi.

CAP. XVI.

Ecclesiæ jura tuetur.

HÆc optima in Principes Gregorij voluntas, quemadmodum nec odio, nec æmulatione certavit cum Principibus, ita gratiam retulit, cùm necessitas & amor recti extorsit iram; præsertim cùm jura Ecclesiæ violabantur, quæ tueri ac illibata servare non modò licet, sed etiam expedit rei publicæ, cujus moles nititur auctoritate reverentiæque Religionis. Novis ubique rebus exercebatur Gregorij patientia; sed ille non insurgere tumultuosius, ne fœcunda rixarum secula, specie cognoscendæ veritatis, eluderent potestatem: item potiùs indicare, quàm effundere: nec Reges offendere, dum offenderent, sed constanter monere, neo terri; ostentare vires justitiæ, quæ violata
sup-

supplicium est violantium ; atque ita vincere ut vinceret , non videretur vincere. Seculi genius est , nulli concedere , & omnia ad se trahere. Vix Superos , cùm fulminant , timemus. Atque hac de causa prudenter potiùs , quàm violenter , causam egit Ecclesiæ ; & obtinendam causâ maluit ignoscere. Ludovico Requesenio , qui Mediolani præerat , fuerat sacris à Carolo Boromæo interdictum , quòd vetuisset Antistitis familiam arma gerere , nisi ex Regis præscripto : Post multa per discordiam utrinque acta , Ludovicum , quòd facti pœnitentiâ tangeretur , & in Hollandos proficiscentem , clementiùs accepit. Iratiorem se præbuit Antonio Perenotto , qui Regnum Neapolitanum pro Rege administrans , Nuntij Pontificij potestatem arctiùs cohibere meditabatur ; & misso jurejurando , quo ille se cum Romana purpura obligaverat , acriùs eum terruit , quòd inexpectatiùs. Eidemque , Marium Carasam Neapolitanum Archiepiscopum , ob inflictum anathema perduellem Regis judicanti , seriò minatus fuit purpuram se detracturum ,
minis-

minisque severitatem ultionis addebat; Sed ille compertâ Gregorij irâ, statim acta rescidit, Antistitem reverenter complexus, ac demum Joanne Austriaco deprecante, post longum iræ spatium, receptus in gratiam à Gregorio fuit; Namque hic censebat periculosius, quò facilùs aberrare illos, qui Ecclesiæ addicti, Ecclesiæ non serviunt. In Sicilia quoque Pontificiam jurisdictionem foriter sustinuit. Carolum IX. Galliarum Regem, sacrorum proventuum impendio, incommoda regni sublevare molientem absterruit; & Philippi Secundi minaces ob ejusmodi consilia querelas, non modò non timuit, sed graviter increpuit. Venetos etiam perpulit, ut quas Episcoporum causas cognoscebant, ad tribunal Pontificis deferrent; neu acciperent Parochos, in scio Apostolico Nuntio. Alios quoque minorum virium Principes cohibuit, ne plus tribuerent sibi, quàm Deo, cujus patrimonium Ecclesiæ auctoras est.

—o(—o

Annum Sacularem celebrat.

INtendebat se annus quintus & septuagesimus supra milesimum & quingentesimum, quo Christianæ pietatis sollemnia se revocabant, & libera tumultibus Roma, vocabat in sinum suum, tanquam in portum, jactata bellis timoribusque Christianæ gentis vota, & corda, cælestibus recreanda piaculis. Gregorius in occasionem intentus, quam avidè oprabat, optimè de universo Genere humano merendi annum primùm augere: & ne Peregrinis avaritia hospitum illuderet, pretia rebus coëmendis assignare: vetare, domos locatas aut recipi, aut cariùs locari: mox apparari plurima sive ornamenta, sive instrumenta pietatis, quibus advenientia agmina consolaretur, demum altaria, templa, suis instruere insignibus. Instauravit Templi tum Vaticani, tum Exquilini porticum; Vaticanas etiam ædes eximijs rerum sacrarum simulacris cumulavit; Vias commodiùs instravit; duxit à Laterano ad Exquilias

has rectam & mollem semitam, pontes
alibi erexit, ubi periculum & metus pere-
grinis; nullamque prorsus neglexit utili-
tatem, quâ vel accedentium Religioni, vel
Romæ ad majestatem profuisset. Evul-
gatis, missisque ad Gentes literis, allocu-
tus est piè humanitéque Purpuratos; E-
xemplo, uti dignitate, reliquis mortalibus
eminerent: magnam fore Generis huma-
ni querelam, si, dum ceteri ex toto pene
Orbe Romam supplices peterent, ipsi nullo
exhibito pietatis studio, quodammodo ab-
essent: Frequentatione templorum familiæ
inmodestiâ abdicatione luxûs, eleemosy-
narum largitione, charitatisque officijs, fa-
mam Purpuræ apud externos conservari, &
maximè humanitate Hospitij, cui è Cælo
merces: Se interim operam daturum, ut
fidem dictis adijceret. Statimque sese in
omne pietatis genus effudit: attentius fre-
quentiusque precibus ad Deum fundendis
incumbere: mores tum suos, tum dome-
sticorum, ac Civium, exigere ad normam
censuramque sanctimonix: domi forisque
cavere, ne quid citra gravitatem honesta-
tēque accideret, neu Sanctitas in sinu suo
hauri-

hauriret labem. Cùm advenisset Pervigilium diei, quo Christi Nati memoriam repetimus, accessit de more candidis ornatus vestibus; Purpuratis, Episcopis aliisque tum sacræ tum prophanæ dignitatis nobilibus Viris stipatus, ad sanctiores Vaticani Templi fores, easque ter incusso malleo aperuit, tanto gaudio plausuque omnium, ut cælum recludi videretur; multitudo certè hominum tanta confluit, ut decem & septem præ turbâ & impetu exanimes corruerint. Hisce apertis foribus, veluti patefacto divinæ miserationis gremio, ex omni propè sede proripuit se Orbis terrarum; unde Romæ infinita vis mortalium, qui libentiùs accedebant, quòd humaniter tractabantur. Illud supra omnia stupori simul & amorì erat, aspicere gentis humanæ Rectorem, ætate jam gravi, vultu animoque florenti audire omnes, excipere, complecti, maximamque diei partem hujusmodi officiis impendere, adire hospitia, ministrare alimenta, majestatem impertiri. Hæc Principis Charitas incitamento fuit reliquis Proceribus & Purpuratis, præsertim Ferdinando

do Mediceo , Alexandro Farnesio , Duci
Parmensi , Paulo Jordano Ursino , & ipsi
Ernesto Bavaro , qui Romam se id tempo-
ris contulerat. Et memorant, vix unquam
fuisse hujusmodi solemnia tam magnificè,
tàmque nobiliter celebrata, adeò, ut liber
prodierit, quo hujus anni res gestæ com-
mendantur, quem evolvere fas erit, cuj-
cumque amor hæc cognoscendi. Demum
vertente se anno, Gregorius actis Deo
publicè privatimque gratijs, præmisso ad
veneranda Tempia longo Arabum , Ar-
menorum , Græcorum, aliarumque Gen-
tium ordine, quasi Religionis triumpho
instructo, adivit & ipse; eadèmq; die,
quâ ante annum recluserat, sanctiores
clausit fores, Româ dubitante, utrùm
simile in posterum spectaculum visura
foret.

CAP. XVIII.

Genuensium res componit.

INgens Italiæ turbo ex Genuensium di-
scordiâ hoc anno imminebat, nisi hanc
Gregorius depulisset citra sanguinem &
im-

impetum. Causa discordiæ penes Nobiles, qui vel æmulatione, vel odio certantes, nec Seniores Junioribus pares, nec Juniores haberi senioribus minores amabant. Siquidem Urbs olim viginti & octo numerabat Patritiorum familias, quæ cùm in decus nobilitatis alias paulatim adoptarent, post illas demum fuerunt, non sine tædio Patritiorum, quibus antiquæ nobilitatis fama spem auctoritatis incendebat. Itaque Andreas Auria Urbis liberate assertâ firmavit Seniorum decus, attributâ suffragiorum, & magistratuum dimidiâ parte, quibus cùm accederent non rarò aliqui Juniores, irascebantur è posteriore nobilitate viri. Honoris æmulationo necessitatem attulit discordiæ, & plebe concitatâ mox ad dissensionem discessum fuit, quam Gregorius re composita composuit, omnes monendo, nulli favendo, ne metum suspicionemque sui ingereret. Hæc acciderant anno à parta salute 1573. videbanturque fovere plus medelæ, quam vulneris. Sed anno seculari conversis repentè ad novas iras Nobilium animis, Seniores Hispano, Juniores

res

res Gallo freti, nec remedium nec vulnus patiebantur. Senatus discors Vulgus minax, armati Opifices, licentiam alebant ac seditionem: Et Patritij primùm arces & sua præsidij tueri; mox seu, desperatione, seu studio ultionis recessêre. Hinc gravior Urbis calamitas, dominante Vulgo, cui modicus timor pro fræno est, quo si careat, nihil abnuat. Hæc inopina rerum turbatio incredibilem Gregorio metum iniecit, ne aut bello aut hæresi Italia involveretur; nam plerùmque simul cum pace Religio periclitatur: dolebat etiam, solemnia Christianæ pietatis imminui tumultibus. Igitur misit Genuam Joannem Moronum Purpuratorum, antiquissimum, prudentiâ juxta & rerum experienciâ venerabilem, qui adultam seditionem, melioribus convelleret consilijs, discordesque animos constanter & cum auctoritate regeret, tanquam concordiam sequester; Nobiles absentes in Urbem revocaret, ne abijcerent omnia sua, dum aliena incerti quærerent: Seditiosos incusaret, quasi propiores servituti, dum libertatem aut dominatum amant: Plebem

verò adhortaretur, ne Urbem pessum daret; per speciem securitatis sæpius advocari pericula, cum tumultuosè arcentur. Insuper Gregorius alià pacis adjumenta paravit, rogatis qui Romæ aderant, Genuensibus, ut iras patriæ lenirent: Et Hispano suasit, ne quid suspicionis adderet. Misit quoque Genuam vim magnam frumenti, quæ gratior accidit, quò carior erat. Præterea indictâ criminum piaculari veniâ, jussit solemnī prece Numen conciliari, quo subsidio nil præstantius ad comprimenda Urbium bella: nam plerumque animorum prælia, sunt semina cælestis iræ. Hisce, aliisque instructis artibus, multum benevolentiae accessit: Gregorio apud Cives; verum altiùs infederat potentiae cupidō, quæ ubi mentes subit, præcipientes ad incerta rapit. Concordiam jactabant, discordiam alebant. Neque Pontificius Legatus, exterus homo, par erat ambitioni Civium; ergo discessum cogitabat, ne auctoritatem Pontificis imminueret nimia vulgi potentia. At Gregorius conscientiam suorum consiliorum fretus, Morono, ne quid abeunti similis moliretur, præcepit: evul-

evulgato Legati discessu, studia seditionis magis accensum iri; quippe remotâ auctoritate nihil insolentius audacibus: fore brevem furoris impetum. Nec dicto exitus discors fuit; mox enim evanuit impetus, cùm invalescere maximè videbatur. Et jam Patritij salvâ libertatis innocentia, rem Pontificis Hispanique arbitrio permittebant, nec Ceteri obstabant; verùm paulò pòst comperere, lætiora esse discordiæ consilia, nec extorqueri aliam pacem dominante Vulgo, nisi verbo speciosam, re inanem. Interim Aiamontius, Mediolani Prætor, Germanicis, Italicisque copijs accinctus, sese, in conspectum terrorumque Genuensium dat; & Ioannes Austriacus Hispanis, ac Neapolitanis Tiremibus validus, Portum Genuensem efflagitat, quo negato, Portum Erycis subit iratior, ac minanti propior. Hic novus subitûsque Hispanorum terrâ marique apparatus, & vulgatus Aiamontij cum Austriaco congressus, missûsque in Hispaniam inde Escovedus, arcanâ formidine Italiam opplevêre, quasi plusquam civilia agitarentur. Servitutem offerri se-

dicionis remedium. Augebat hanc suspicionem in dies fama, novorum consiliorum impatiens, cunctosque Principes, & maximè Gregorium offendit, qui non ignorabat, bellicis apparatibus pacem obtendi, bellum excitari; & maximè verebatur, ne insuspicionem ipse veniret, si acriùs rem apud Hispanum urgeret. Igitur cautè potiùs, quàm acriter, publicæ prospexit securitati, & retento legato; quem in Hispaniam destinaverat, velut ignarus rerum, ac nemine conscio, exaratus Pontificia manu literis Hispanum admonuit, ut amoveret arma sæpiùs periculosa. Civilem furorem armatâ vi succendi, non extinguere: nec expedire Italicæ quieti, accedere Hispanum ad bellica, tentamenta, invito Pontifice. Post hæc redduntur ab Hispano literæ regiâ quoque manu conscriptæ, quibus religiosè Rex contestabatur, se pacem velle, & hanc quærere per acerbâ & molesta, quòd lenia contemnebantur; ferrum ostentari, ut ferro abstineretur. Excusso regiæ potentia metu, Gregorius concordiaë fanciendæ animum vehementiùs adjecit, iussu-
que

que Morono legato consilia jungere cum Vito Orimbergo, & Petro Costacciano, à Casare missis, & demum cum Carolo Borgia, rem eò deduxit, ut ij qui Genuæ per tumultum, & seditionem dominabantur Patritijs, haud iniquas condiciones amplecterentur. Sed Patritij seu Classis Hispanæ confidentiâ, seu ne redirent precariò, trahere longiùs rem, donec ad arma iretur. Commotior ad hunc armorum turbinem Pontifex, gravioribus literis Joannem Austriacum perstrinxit: inania esse Regis promissa: pacem ijs armis turbari, quibus obtentui pax erat: & corrumpi libertatem, dum licentiæ consulitur; imo bellum inferri, dum seditio viatur; Eùmque adduxit, ut gliscentem Patritiorum vim coërceret. Atque ita sublatiis offensionibus, ac obsidibus utrinque datis, ad eas deventum est consensionis mutuae leges, quæ Gregorio primùm probatæ, mox placuere omnia, suâque reddita est Genuæ quies, Italiæ tranquillitas, non strepitu amorum, sed pacis reverentiâ.

Non modò hæc seditionis procella, sed alijs casus, Gregorij erga Genuenses benevolentiam prodidêre. Philippus Hispaniæ Rex ibat imminutum lucra & fœnora Genuensium, qui negotiabantur in Hispanica ditione; unde Genuæ ingens detrimentum; nam plerumque pecunia Mercatorum, pretium est familiarum. Incertis Civibus quid agerent, Cyprianus Pallavicinus Archiepiscopus impendentem calamitatem Gregorio significavit, qui statim eam avertit, monito per literas Hispano, ut abstineret damno; nam sublato fœnoris lucro, facilè sublatum iri commercia, quibus Hispanica fortuna munebatur. Alio etiam beneficio caritas Gregorij plurimorum Genuensium commodis prospexit, qui naves commeatu plenas ad Christianam Classem in Othomanos paratam, in Corcyram detulerant, & dum pretium reposcunt, nec ab Hispanis, nec à Venetis audiuntur; Ergo Gregorius cognitâ causâ censuit, ab Hispanis deberi pretium, qui statim parvêre Gregorio, cujus æquitas pro lege erat. Magistamen placuit, quò magis terruit aliud Gregorij factum

factum. Augustinus Affaltus homo pro-
caxis & popularis ingenij, novis in Rem-
publicam insidijs conspiraverat, statuérat-
que una cum alijs, obtruncato Duce, Se-
natúque vastato, Rem turbare publicam
suo arbitrato, more eorum, qui suæ obliti
fortunæ, non nisi scelera, pessima ambi-
tionis præmia, meditantur. Re detectâ
capitur, vocatur ad iudicium; sed cor-
ruptis iudicibus, vi & conatu eorum, qui
conjuratiioni favebant, nunquam sua sce-
leri pœna infligi potuit. Itaque Senatus,
ne impunitas flagitij pro incitamento esset,
ad Gregorium confugit; & ab eo missis
Genuam peritis hujusmodi causarum ho-
minibus, quæstionibusque habitis tandem
fracta est potentium vis, deque conjura-
tis sumptum capitale supplicium. Sic pœ-
nis coercita audacia, validisque documen-
tis ad libertatem tuendam insinuatís,
Rempublicam adversus fortuita
firmavit.



CAP. XIX.

Avenionensem tractum tuetur.

Miserrima Gallicarum rerum conditio, & vincina Avenionensi ditioni, ex Aurantij principatu, hæresum imtemperies, Gregorij animum acrius extimulabat ad Avenionem tuendam, ne quid hostium fraude, aut Civium discordiâ eveniret Catholicæ Religioni, Pontificiæque auctoritati luctuosum. Misit eò Ascanium Martinengum valida cum Militum manu, quam ne in Gallias admitteret, Carolus IX. spondit, se Avenionem propugnaturum, sed Gregorius & fraudem veritus, & ne alijs sua committeret, maluit suis, cùm posset, viribus niti, quàm alienis. Nec destitit novis subinde auxilijs præsidia confirmare; pecuniam & stipendia diligenter procurare, ne quid per seditionem Milites agerent; Urbis Rectores, militiæque præfectos crebris monitis, mandatisque sollicitos habere, ne ullus ex improvviso ingrueret hostis.

Et

Et eventus Gregorij sollicitudinem approbavit. Cæsar Palazzolus Equitum magister, pluribus excursionibus non modò Urbem ab insidijs armisque hostilibus vindicavit, sed plurimos cepit Hæreticorum duces, in primis Joannem Castilionæum, scelere simul & gratiâ Principum florentem, quem jussit Gregorius capite plecti, vel invitis Principibus, ne lætiora sibi fingerent Hæretici per Principum benevolentiam, quamquam ille morti propior, Ecclesiæ Catholicæ se reddidit, temeritatēque vitæ absolvit mortis pœnitentiâ. Abolevit etiam Gregorius plurima tributa, quibus demptis Civium fides, & amor crescerent: exules, & maximè infectos hæresum labe procul amandavit; extruxit nova munimenta, & aperuit, viam, quam Gregoriam dixere, aliâque præstitit Urbi propugnandæ opportuna, ut insidijs locus deesset ac auctor. Paulò pòst fama vulgavit, Henticum Regem, qui Carolo successit, Avenionensi ditioni inhiare, quasi Gallici regni firmamento, eoque cogitasse mittere Gondium Pariensis Episcopi

fratrem, ut specie defendentis, regios milites in Urbem traduceret, & mox dominatum. Gregorius nihil palàm irasci; sed irâ dissimulatâ, & Regis animum fefellit, & spem hæreticorum infregit: nam, Pontificio præsidio quâ officijs quâ stipendijs confirmato, ad Regem, scripsit conquerenti similis: non tam, ut Regem accusaret, quàm ut cohiberet. Demum Henricus pace cum Sectarijs initâ, traxit quoque ad pacis conditiones Avenionensem ditionem, Pontificis aut iram veritus, aut gratiam aucupatus, & ne videretur illudere, ac etiam ut deleter appetitæ Urbis notam, reddita fuêre plura oppida, præter Arcem Minerbensensem, quam iussit Gregorius obsideri, & omnino capi, ne asylum in Gallia hæresi esset; Et capta demum arx fuit post sexdecim Mensium obsidionem, pari obsessorum & obsidentium perviciâ. Sed Hæretici novis in dies rebus intenti, non destitêre Avenione concire turbas, quibus finem imposuit Pyrrhus Malvetius, sublato Gulielmo Patresio, quo duce omnia turbabantur. Misso etiam Blasio Capizucchio militari-

bus

bus expeditionibus insigni cum trecentis bellatoribus, validius repulit arma fraudesque tum hæreticorum, tum perduellium, ac factiosorum Civium, quorum aliquos conspirationis reos per Georgium Diedum damnavit: Urbe potius attonitâ quàm iratâ; nullum veritus periculum, dum incolumitatem Urbis tuetur, cui sanè Gregorij tum prudentia, tum constantia necessaria fuit, quarum alterâ cavit insidias, alterâ repulit.

CAP. XX.

*Eurat, ut Optimus Polonia
Rex eligatur.*

E Repto Sigismundo II. pietate ac prudentiâ eximio Rege certatum est in Polonia omnium studijs, præsertim hæreticorum, de successore deligendo; nam populorum est, ea Religionis consilia sequi, quæ Principes amplectuntur; ideoque suas quisque ad Partes Principatû traherat. Quocirca studiosius Gregorio cavendum fuit, ne Sectarij voto potirentur, quibus acquisito Poloniæ Regno,

D 6

non

non modò patebat omnis Septemtrio, sed
conjunctis cum Othomano viribus, facilis
erat in Catholicos omnes conspiratio.
Ergo, ut coërceret Othomanum, objecto
potentissimo Rege, ac spem Sectariorum
eluderet, duos nominavit, quorum alteri
à Polonis credi posset Polonia, regenda tuc-
dàque, non sine metu hostium: Ernestum
scilicet Austriacū Cæsaris filium, & Gallici
Regis fratrem. Stephanum Bathoreū omi-
lerat, id temporis Transilvaniæ imperantē,
sed suspectū, quòd Othomanus illi faveret.
Tres præcipuè magnæ auctoritatis Viri,
Gregorius Cogneviskius, Nicòlaus Chri-
stophorus Radzivilius, & Albertus Laz-
schius, Joanni Francisko Commendono
conjuncti, privatæ utilitati rem Catholi-
cam præposuère, rarò exemplo, & optimo
successu. Electus demum fuit Henricus
Valesius Caroli IX. Gallorum Regis fra-
ter seu quia Poloni nimiam Austriacæ fa-
milix potentiam rebantur, & propriorem
Poloniæ timebant, seu etiam quia minùs
timebant Galliam, magis dissitam, remo-
tāque. Ad Henricum misit statim
Gregorius Seraphinum Olivarium Gal-
lam,

lum, qui Pontificiæ lætitiæ argumenta exhiberet, deinde Joannem Vincentium Laureum, qui Regem in Poloniam deduceret, ei que nomine Pontificis adesset, ac præterea Edmundum Augerium Societatis Iesu hominem, Galliæ probatum, & Henrico gratissimum, adiecîtque religiosa munera, quæ novis Principum animis cominovendis validissima sunt. Magno jactatus est discrimine Rex, penè adactus jurare in verba Hæreticorum, quibus arma, minæ, & loco virtutis religionisque, impietas & vitia arident; sed Gregorij solers prudentia periculum exemit, monito Rege; ne aliâ vel capeffendi, vel administrandi Regni, quàm antiqui moris formâ uteretur; neu sineret ab Hæreticis in fraudem Catholicos Episcopos abduci: unum esse tum spiritum, tum corpus Poloniæ: Cætibus conciliisque privatis juvari non publicâ, sed privata commodâ: sæpius foveri mala, dum jactantiùs remedia procurantur. Verùm acerbior casus afflixit iterum Poloniæ res, quas Gregorius cœperat sustentare per Henricum Regem, qui ætate ac fama florens intimè Catho-

tholicus, & gemino validus regno, potentissima dominationi subsidia attulerat, nec modò audaciam Hæreticorum terrebat, sed paratus adversum Christianæ fidei hostes, spem novi fœderis ingerebat. Siquidem Henricus nunciato Caroli fratris Galliarum Regis obitu, quasi gemino par regno, clam è Polonia in Galliam discessit, ignatis Polonis, quibus absentia Regis periculosior erat, quòd vel contemnitur plerumque, vel contemnit, qui abest. Itaq; Gregorius comperto Henricum per Italiam iter facere, missis ad eum Jacobo Boncompagno, & Philippo Boncompagno, quorum alter eum ferrariæ, alter Venetijs Pontificiæ benevolentiae officia deferret, specie monentis rogavit, ut vel Romam vel Bononiam accedens, mutui sermonis copiam faceret; fore illi ex Pontificio congressu plurimum gloriæ & utilitatis: sed ille maluit inservire consilijs aulicorum, qui sua, non Principum compendia amant. Hic Henrico discessus quò magis repentinus, eò ingrator, summam invidiam creavit, quasi vilior illi Polonia esset, flagrantésque studio gloriæ homines in ea
con-

consilia accendit, ut eo abdicato, novi Regis comitia desiderarent, amaréntque ignobiliorem Principem, quò minùs contemnerentur. Et Sectarij ad tumultum seditionémque proni, evulgavêre arcanum; Poloniæ interessè, Principem habere, qui mediocri nobilitate, potentiâque floureretur. Hoc vulgato novas res quisque moliri, & aliquem offerre, qui præsentium invidiâ, & metu, regium honorem obtineret potiùs, quàm mereretur. Igitur Gregorius Vincentij Laurei operâ ingenioque usus, ostensâ novi arcani fraude, prospere conatu inclinavit omnium animos ad Principem Catholicum designandum, qui & familiæ, & potentiz vi non timeret imperare, nec penderet à Sectariorum impetu, qui pervicaciam & libertatem pro servitute ac obsequio meditantur. Et quamvis omnino Maximilianum Cæsarem laudaret, sollicitaretque ad regnum capeffendum, ratus, haud alijs, quàm Austriacæ fortunæ viribus Othomani ambitionem, Poloniæ inhiantem, repressum iri tamen mora Maximiliani corripuit Pontificis consilia, vertitque mentes ad
Ste-

Stephanum Bathoreum Transylvaniæ Principem : cujus fautores per celeritatem & vim Gracoviâ petiti, Regem ibi Stephanum inclamant, regisque insignibus exornant, frustra reclamante Maximiliano, qui ab Archiepiscopo Gnesnensi, quem Poloniæ Primatem vocant, pluribusque Senatorum suffragiis jam Rex designatus, perdidit regnum cunctando. Non amabat Stephanum Gregorius, quasi periculum ab illo foret, ob Amurathis amicitiam ; at ubi ejus obsequium erga Pontificem, Catholicæque Religionis amorem cognovit, non potuit non vehementer amare, ac humaniter complecti, didicique, sæpe meliores mores à meliori fortuna nasci, ac docuit, Romani Pontificis benevolentiam in Reges cōvergere, ut Religio dominetur. Interim Bathoreus usus hac maximiliani morâ, non modò contumaces adversosque animos ad se pertraxit clementiâ, & promissis, sed apud Principes famæ, ac regno consuluit, captatâ per literas, & Nuntios gratiâ, Atque Oratorem misit ad Pontificem, qui reverentiæ & obsequij pignus afferret ; nuntiarétque,

se

se nolle regium sceptrum tenere Gregorio invito, adeoque efflagitabat supplex, ut sibi liceret esse Regi per Gregorium, qui jam à Maximiliano rogatus, ut Bathorem & ab eo nuncupatos Episcopos reijceret, responsi anxius erat, quia certus offensionis, seu Stephano, seu Maximiliano assentiretur. Sed nuntiata Maximiliani morte, liber curâ Pontifex, Stephani literas ac Oratorem suscepit, jussitque Laureo, ut ad eum se conferret; eique nomine Pontificis adesset. Sic Providentia Ecclesiam, Poloniâque ingenti bello, metuque exemit. Neque destitit Stephanus sceptrum indeptus, ac æmulo extincto, placere Gregorio, sed defensâ propagataque Catholicâ religione, quod norat illi gratissimum; exclusis magistratu & præfecturâ Urbium hæreticis, aucto templorum cultu, immutatis ad normam pietatis Civium moribus: Cracoviensi Academiâ ad fidei Catholicæ formulam recitandam pertractâ; Tridentini Concilij legibus acceptis; ac regno evulgatis, illud etiam adjecit sinceræ pietatis argumentum, ut more tum Poloniæ in sueto, legatum

tum ad Gregorium destinaret, qui sedi Apostolicæ obedientiam regiam præstaret. Hic erat Paulus Uſchanchius, cujus Romam accessus quia tardior, ob itineris moram, vulgatus multò antè fuit, excitavitque Gallicum Oratorem ad novas moras ingerendas; Et enim cùm Polonus deduceretur ad Aulam, Pontificio conspectui admovendus, Gallus præcessit, deque genu coram Pontifice ac Purpuratis contestatus est, Henricum esse Poloniæ Regem. Gregorius pontificiæ gravitatis memor, ad improvisam vocem constitit, ore, vultu, animoque immotus; mox discedente Gallo, admissum Stephani legatum fronte hilari audiit, eique per Antonium Boccapadusium humanissimè respondit, Rege magnifice laudato, ac legato perquam honorificè dimisso. Ita Gregorius & suam approbavit prudentiam, & regiam Stephani Bathorei pietatem.

—o—

CAP.

CAP. XXI.

Gallia favet, & prospicit.

INterim Gallicæ res cadebant, quâ lenitate dominantium, quâ consilijs eorum, qui Regi aderant; unde summa Regni discordia; hæreticis ad se se omnia per minas & arrogantiam trahentibus: Catholicis verò novas res (uti meliores) cupientibus, Atque eò fastidia processere animorum, ut vel ipsi Regio sanguine orti Proceres, seu suomet ingenio, seu arte potiùs Hæreticorum, in Regis aliorumque exitium conspiraverint; quæ conjuratio licet salubri temperamento elusa fuerit, tamen remedia infra sanitatem erant, quippe non clementiâ, sed severitate conservantur, quæ non clementer inchoantur. Et plerumque constitit experienciâ, Hæreticos, ac seditiosos, nec leniter, nec violenter accipiendos esse, sed fortiter coërcendos; ut timeant, non terreant. Ergo Gregorius quò Regni tristem imaginem ad prosperiora verteret, Regi suavit, ut inito cum Hispanis fœdere, totus in-

cumberet addamna sectariorum; ex se-
veritate pacem fore: tutius & certius do-
mesticos hostes comprimi, si externis quo-
que viribus communiaris. Verum aliò
avertit Regem, callida quorundam mens,
haudignara, concordibus Gallo, & Hi-
spano, nihil esse rei publicæ timendum;
Gallicæ potentiaæ arcanum esse jactabant,
extrà perduelles amandare, ac fore in Bel-
gio amplum inquieti furoris excipiendi
locum; Galliam haud posse convalescere,
nisi abductâ ægrotum turbâ. Inter hæc
moritur Carolus Rex, nuncupavitque hæ-
redem regni Henricum; quo factò sum-
ma Gregorium sollicitudine levavit; cùm
enim Franciscus alter Caroli frater in spem
Regni accenderetur, verendum erat, ne
sectarij studerent illi, quem Pontifex de-
fereret, & Regnum per discordias divide-
retur. Gregorius verò præceptâ Regis
morte, Fabium Mirtum in Gallias misit,
qui Catharinam Caroli parentem, Ponti-
ficij doloris, solatijque fomento prius ex-
hibito moneret, ut corruptissimis in rebus,
divinæ gloriæ sinceræque religionis curas
suspiceret: non aliter publicis malis con-
sultum

sultum iri: ageret constanter, nec ostendaret metum, & ex metu periculum: conjuratos cohiberet multaréque: impunitate ali audaciam, cuj adultæ omnia prona; non defutura, si opus esset, ipsius Pontificis subsidia, quibus posset nimia seditiosorum studia vel deprimere, vel remorari. Dedit quoque literas ad Franciscum Valsium, & Henricum Borbonium, quibus illud ex animo commendavit non separandas Gallicas vires; ne, dum privatis injurijs indulgent, publicæ felicitatis arcem everterent: concordæ ac pietatis studio paulatim ad summa perveniri. Præterea Joannem Mariam Gratianum ad Henricum Poloniae jam Regem misit, eique significavit Galliarum mala: rediret in Galias, etsi teneret Poloniae fascēs: ex mora ipsius, Christiani penè orbis discrimen ingruere. Gratiano etiam mandata dederat, ut impetraret à Polonis, ne quid turbarent, ac æquo animo ferrent Regis absentiam, cujus incommoda publicæ magnitudo calamitatis minuebat. Verùm Henricus occupatâ Pontificis voluntate, iratisque Polonis, jam decesserat: & profectò sibi

sibi Galliæque consuluisse, si eâdem festinatione, quâ discessit è Polonia, accessisset ad Galliam; quippe, dum incertæ res festinandum est, ne artes & vota æmulorum tarditate incitentur. Cùm autem Gregorius itellexisset, eum in Italiam advenire, legato Philippo Boncompagno, uti memoravimus, conatus est ad se pertrahere, ut ore Pontificio regios spiritus firmaret: ac renitentem præclaris documentis instruxit: esse perduellium consilia statim opprimenda: conjurationis principes vel amovendos, vel tollendos: fratrem, ac Borbonium cautè haberet; reliquos veniæ spe, si cervicem inflecterent, & si duriùs insisterent, supplicij metu sollicitos contineret; disceret Caroli exemplo, illecebras blandientium timere: aulicæ adulationis finem esse exitium Principis; nuncium temitteret favori Barbarorum, quibuscum contractum fædus non minorem Christianis rebus injuriam, quàm Gallicis ruinam intulerat: amicè ageret cum Hispano, cujus amicitia terror seditiosorum erat: Concilij Tridentini leges Galliæ approbaret; optimos constitue-

stitueret Sacrorum Antistites, unde Urbium salus: ac etiam tractum Avenionensem tueretur, cujus calamitas contempta, non minùs incommodi, quàm invidiæ attulisset regiæ ditioni: Haud aliter nutantem regni fortunam posse consistere, quàm armatâ Regis manu, & mente. Hæc fuere Gregorij consilia, quibus Hæreticorum pervicacia si non debellata, saltem debilitata fuisset. At Henricus maluit blanditijs ac facilitate augere incendium, cuj restiguen- do severitas ac ultio necessaria erant. Igitur profectus in Gallias, æmulis hostibûsque ad iniqua se accingentibus, ut eorum spei ambitionique illuderet, muniturque nova sobole regnum, iniit cum Claudia Lotharinga regias nuptias: invitâ Catharinâ, cuj metus ex audâ Guisiorum potentia. Hic novæ discordiarum faces inter Guisios & Catharinam; cuj favebant Franciscus filius, & Borbonius, neque Rex liber erat à metu Francisci, cujus ira molestior, quòd à pluribus fovebatur. Ubi hæc præcepit Gregorius, ne pulcherrima Europæ pars civilibus discordijs omnino arderet, & rex discordia

scordia hæreses ferverent, acriore stimulo Henricum sollicitavit, ut arma in sectarios moveret, iret ipse, ac fomitem originemque malorum regiâ constantiâ submoveret, se illi in omne belli spatium quatuor peditum millia Pontificio ære suppeditaturum: in ancipiti rerum conditione intermibus, non armatis Principibus immineere periculum. Insuper centena aureorum millia (grande id temporis subsidium) ei donavit; concessitque, ut dimidiam partem eorum proventuum, qui ex Ecclesiæ patrimonio unius anni spatio in Gallijs constarent, ad regias utilitates attraheret, aliâque omnia sponddit auxilia, ut metum inopiâque, si qua Regi inerat, ad spem fiduciâque converteret; illud etiam consilij addidit; ut ne fratrem aleret iratum domi, sed aut honoribus sibi conciliaret, aut cohiberet. Hæc cuncta frustra furere apud Henricum, qui more Regibus insito, maluit suæ aulæ genio, quàm alienæ prudentiæ assentiri. Mox tamen patuit, non ex vano Romanum Pontificem loqui; Discessit enim Franciscus ex Aula, irâ & milite potens, nec
sine


sine studijs copiisque Hæreticorum: quamquam is veritus, ne Gregorium offenderet flagrantibus sectatorium obsequijs, misso Fayo, qui erat ei à secretis, ad Pontificem, professus est suum in sinceram Religionem amorem: se admonitum fuisse malorum, quæ miseræ servituti quotidie in Aula impendebant, nec velle nec posse alienæ ambitioni gratificari, aut servire; sectarijs haud se favere, sed indulgere, ut Regi eos adjungeret; malle se erumpere ad invisam libertatem, quàm speciosum servitium consecrari, satis superque risisse Aulam, cujus ludibria ferre non poterat: quippe difficilimum est, media sequi, dum extremâ urgent. Neque Gregorius Francisci excusationem acerbius, quàm ille vellet, accepit, sed laudatâ ejus erga Catholicam Religionem voluntate, illud unum se dolere, respondit, quòd Regem deservisset, à quo separari, anceps, ac plerumque exitiosum; se tamen Regi persuasurum, ne quid ultioni daret. Accessit quoque ad Gregorium ab Henrico legatus, qui rogabat, ut ortam ex fratris æmulatione belli procellam, tanquam parens

componeret; nec abnuï Pontifex, misso ad Franciscum Fabio Mirto; sed itinere impedito, seriùs hic accessit, pace jam confectâ magis necessariâ, quàm honestâ. Verùm bella ex bellis seruntur, nisi semina bellorum excindantur, & Regna instar Navium semper jactantur, ubi anchora timoris non firmanetur. Henricus impar severitati, eòque contemptui proximus, contumax Hæreticorum ingenium lenire conatus, magis excitavit, novisque tumultibus pressus, sensit demum Gregorij consilia propiora securitati fuisse, quibus dum haud paret, pacem eligit bello iniquiorem. Quod ubi Gregorius audiit, indoluit: precibûsq; & auctoritate, Catholicæ Religionis damna quâ minuere, quâ reparare, iniquæ pacis remediû censuit: Regem ipsum commonuit, ut contractam inde invidiam, anxiamque sui opinionem depelleret, sinceræ Pietatis constante cultu, & patrocínio; Catholicos non defuturos optimæ spei, quam Rex offerret. Atque ita planè accidit, quippe Catholici Religionis & Sacramenti vinculo arma animosque conjuxere, atque in Conventu Blæsensi omnium

nium Ordinum principes, tam foriter eloquentérque Catholicæ rei, ac dignitatis Apostolicæ causam perorârunt, ut Rex palàm testatus fuerit, se pigere contractæ pactis: illud sibi per Suorum consilia: superesse tamen optimum malorum remedium, favorem amorémque Catholici nominis, cujus honori Majestatem commodabat: fore, ut quamprimum Gallia intelligeret, Regi nihil esse antiquius religionis studio. Et reverebatur Henricus Gregorium, quem sciebat Galliæ probatum, ejusque causâ parcéndum famæ, ne temeritas glisceret. Mox literas ad Gregorium perscripsit, pietatis ac prudentiæ specie laudabiles; easque in Senatu Purpuratorum Pontifex recitavit, & commentavit: Nihil gratius accidere posse Reipublicæ, quàm ut Henricus vividam indolem, florentémque militaribus ornamentis animum, in rebelles & sectarios converteret: constanter præstaret, quod liberaliter promittebat: Galliam vindicaret ab Hæresibus, quarum insidijs nunquam in sinu credendum: extorres ageret eos qui exilium Regi, Regnóque mo-

liebantur ; Hoc unum esse discordantis Gallia, immò Orbis præsidium, ut unius Religionis legibus regeretur. Ex hæresi discordiam nasci, ex discordia interire principatus, quorum potentia irrita est, ac vana, si discors. Obtulit etiam equitum pedumque auxilia : vim plurimam auri ex ærario Pontificio, & armorum sulphuratique pulveris non leve subsidium misit : conciliavit illi plurimos, quorum opera bello necessaria foret ; ac præsertim Anuillæ Toparcham, grande utriusque partis momentum, seu Regi, seu rebellibus faveret. Nec defuit armatæ Regis voluntati occasio armorum ; Sactarijs, ejusdem Toparchæ oppida invadere ac diripere aggressis, odio & irâ, quòd is in partes, Regis concesserat ; Magnus inde Catholicorum & Regis ardor contrà efferbuit, ac præcipuè Rogerius Bellagarda, Gregorio auctore, sectariorum impetum fregit, oppidis, quâ receptis, quâ munitis. Et sanè debellatum fuisset cum Hæreticis, nisi Rex maluisset bello abstinere ; pace sancitâ, non sine ingenti rerum ruina, quæ semper certa est, dum incerta consilia sectamur. Catha-

rinæ artibus plerique hanc Henrici facilitatem adscribunt, quòd illa & ipsi Gregorio suadere tentaverit, ut Regem ad pacem alliceret; Sed Gregorius constantiæ ac religionis tenax, sibi, ait, haud unquam probari posse pacem illam, cujus pretium erat extrema Galliæ calamitas: bello pacem peti: ex immatura pace bellum nasci æternum Atque hæc omnia eventus probavit, nam & Hæretici, quorum dux Borbonius, & Catholici, duce Guisio; conspirârunt in Henricum, qui pessimo consilio, dum nulli vult esse invisus, suspectus omnibus fuit, & quia suspectus, magis invisus; Gregorius tamen rogatus ut fœdus probaret, disertè respondit, se nolle turbis ac bellis immiscere, etsi non posset non probare ea, quæ Religioni expedirent; atque hoc prudenter dictum re ipsa adservit, cùm magnæ authoritatis viris suadentibus, ut incertam Gallici regni successionem firmaret, omnino abstinuit, gnarus, alia esse Religionis, alia Regni negotia.



CAP. XXII.

Germaniæ opitulatur.

Postquam Lutheri perfidiam toleravit, non minori Principum, quàm populorum calamitate, Germania infra Romanam pietatem vivere cæpit, eoque maximè à se ipsa descivit: veterum abjecto ritu, & animo. Hinc aperto ad nova bella, novàsque hæreses aditu, procacibus laborabat ingenijs, quorum gliscente audaciâ, civile quoddam exarsit incendium, exitu luctuosum, & animorum discordiâ æternum. Et quamquam corruptis plerisque Urbibus, constanter agerent plurimi Principes, non ignari, mobiles vulgi animos, nullâ re magis in fide dominantium, obsequiòque contineri, quam Catholicæ studio Religionis; tamen erat atrocior hæreticorum impetus, quàm posset cumprimi, Vulgo ad nova promptiore. Igitur cum in dies pericula coalescerent, ac deteriora semper metueret conscia malorum, & consiliorum incerta Principum mens, Gregorius opportuna subsidia paravit, ut sua rediret

rediret Septentrioni forma, compressis hæresibus. Neque arma, sed studia literarum instruxit, quibus facile vertitur Provinciarum status. Primò Collegium Aulumnorum Germanorum à Julio III. operâ S. Ignatij Loyolæ Romæ excitatum, locuplete proventu ac numeto amplificavit, adeò ut quinquaginta eo tempore supra centum ibi alerentur adolescentes, optimæ indolis ac spei, qui deinde Religioni Catholicæ servirent, ac instar fortissimorum militum Ecclesiæ aciem sustinerent integrâ pietate. Adivit ipse domicilium, lustravit cubicula, compellavit Juvenes, observavit victum, Pontificiâ manu contrectavit vestes, & cuncta ferè eorum officia ministeriâque perpendit amanter, non more judicis aut principis, sed parentis. Quo spectaculo venit in se omnium ora, & corda, præsertim Principum Germanorum. Et sanè Germania tunc optabat nihil magis, quàm ut in sinum Pontificis reciperetur. Auxit hanc benevolentiæ famam Caspar Gropperus eò missus cum Nicolao Elgardo, ut res jacentes consilio & doctrina erigerent; Inde maxima Gregorij fa-

ma apud Germanos, ut penè omnia ad eum referrent. Comes Salentinus ab Isemburgo, Archiepiscopus Coloniensis, & Joannes Argentorati Antistes auctoramenta dignitatis, quod ante abnuerant, à Gregorio efflagitavêre, quasi minime liceret uti dignitate, quæ Gregorio non approbaretur. Herbipolitani ad Julium Echterum, Augustani ad Egolphum Cnoringenium detulêre sacros fasces, quòd hi pietatis studio insignes à Gregorio amarentur. Neque Pontifex ullas omisit artes, quibus hanc benevolentiam mereretur, eoque faciliùs insurgentem paulatim Catholicæ Religionis auctoritatem extolleret. Germaniæ negotia, rogatus à Cæsare, fidei ac industriæ Ludovici Madrutij commisit, illique attribuit opulentum Sacerdotium, quò sanctiùs & minùs timidè rem gereret. Octo Purpuratis id curæ imposuit, ut bona, malève Germaniæ explorarent, excogitatis remedijs mala minuerent, bona foverent; Leniri posse calamitates populorum benevolentia, & subsidio. Augustam Societatis Jesu Patribus accersitis, adversus hæreses munivit. Pios

ac nobiles Episcopos, cùm licuit, illustrioribus Urbibus obtulit, ut nobilitate, quæ penes Germanos loco gratiæ est, firmaret Religionem, darétque Ecclesiis Præsides simul, & præsidia. Hussitarum tentamenta, præsertim in Bohemia, depulit, restitítque constanter efflagitantibus, ut iisdem Hussitis liceret admovere homines sacris ministerijs ordinibúque: verebatur enim, ne Schismaticorum, Hæreticorúmque auctâ auctoritate, error quoque augeretur; quippe Hónor non minus alit errores, quàm artes; Neque unquam adduci potuit, ut ab Monasterij Episcopo Adiutorem sineret adoptari Principis nobilissimi filium, quamquam & Cæsar & Urbis Sacerdotes exposcerent, certus nihil posse periculosius à Romano Pontifice committi, quàm ut Ecclesias ijs hominibus credat quorum fama aut familia suspecta; Is etenim Princeps nescio quid Hussitarum erroribus indulgere ferebatur, eundémque, interpositâ Cæsaris & Bavari potentiâ, deterruit, ne accipientibus Eucharistiam, opptatum Calicis usum concederet; neu arrideret Hæreticorum votis,

petitionibúsque, quibus assentiri, summi discriminis res erat; atque ut omnem illi spem adimeret, extincto Monasterij Episcopo, Maximilianum Austriacum obtulit, qui molioꝛe fortunâ Urbi præficeretur Antistitis loco. Sectarios Aquisgrani & sacra & senatoria munera per vim obeuntes, acerrimè coërcuit, ne Urbs & imperij Romani diademate, & Catholicæ fidei studio prænobilis, in casum daretur, ac scelus. ~~Constituit~~ Lubecensium Canonorum securitati, compressâ tum Episcopi hominis perditæ audaciâ, tum Senatûs infensi auctoritate increpitâ, & etiam eluso Principis cujusdam Hæretici conatu, qui assumptâ, uti mos est, Hæreticorum arrogantia, Catholicos ritus moresque abolere minabatur, nisi Gregorij metu consedisset Principis impetus. Colmariensem Clerum ab Adversarijs afflictum, omni ope recreavit, terrorémque incussit hominibus, quâ Sectarijs, quâ suspectis, ac etiam Catholicis ad infanda pronioribus: haud impunè vexari vel Religionem, vel Religioni addicta capita. Eos autē qui Catholicos spiritus, abjectâ hæresum indole,

reci-

reciperent, amantissimè complexus fuit, quòd plurimùm intererat ad famam dignatamque Pontificis, Instar filiorum haberi, qui se redderent Ecclesiæ: Provinciam obrectationis, & odij avidam non aliter, quàm Pontificiâ benignitate traduci ad cultum amorèinque Apostolicæ Sedis, cui non rarò pro imperio Clementia fuit; Itaque Præconem Hæresum, facti mentisque pœnitentem, benignè admisit, aluitque de suo; & alios quoque plures, ubi audiebar ad meliorem frugem converti, oblati, missisque opibus retinebat firmitus; nam experimento liquebat Plerosque ad Hæreses, hæreticorùmque commercia compelli paupertatis, odio, & desperatione fortunæ. Adeò miseri sumus nos Mortales, ut magis fortuna, quàm Pietas cordi sit. Contrà eos, qui Catholico nomine ad fraudem Catholicorum abutebantur, inexorabili ultione, vel in supplicium, vel in exilium vocabat; & comperto, Religiosum hominem, inter suos auctoritate insignem, consuetudine hæreticorum in suspicionem venisse apud Germanos affectate hæresis; quamquam haud solebat

ex rumore statuere, statim auctoritate, provinciæque abdicatum, ex Austria in Italiam iussit deportari: quippe Religiosis hominibus vel ipsa criminis suspicio pro crimine est. Sed illud maximè contendit Gregorius, ut nutantis Germaniæ animos, & gliscentium in dies Hæresum artes compesceret, in Germaniam remissis Adolescentibus, qui Romæ destinato in Collegio Catholiciæ Religionis ac bonarum artium documentis informati fuerant; nec fefellit consilium. Siquidem hi modestiâ & nobilitate spectabiles, incorruptis moribus arguebant Hæreticorum nequitiam, & constanter veritatem professi, penes Vulgus, & Nobiles venerationi erant, quæ inde major, quòd iniqua fama percrebuerat, Romæ non virtutes, sed scelera foveri; atque ex mala fama gravius interdum periculum, quàm ex mala doctrina; Hanc ob causam, quia primi fidem famæ conciliant oculi, Nobiles Episcopos in Germania modestiæ admonuit, deteruitque à multarum Urbium administratione; nam hoc spectaculo hæretici offendeantur, & incitabantur Catho-

ro-
tho-

tholici ad invidiam. Et ipsum Ernestum Bavarum sibi gratissimum, quod jam fuisset Antistes Leodiensis designatus, vetuit ad Monasteriensis Ecclesiæ principatum accedere, non quia utrique par ille non esset, sed ut ejus modestia agnita, alijs exemplo foret. Graviter inculavit, fortiterque continuit eos, qui specie ostentandæ potentia, seu odio pietatis, prohibebant Salisburgensis Archiepiscopi Adjutorem suo muneri fatisfacere: Cavebátque omnino, ne Antistitum ignavia insidijs Hæreticorum locum daret, eosque cum imperio ac potestate ad officium excitabat, si quando invalescebant Hæretici, quos nunquam quietos sinebat aut securos, sed ubique exturbabat, velut venenata semina, quæ dum sinuntur adulescere, omnia, corrumpunt. Spirâ, Herbipoli, Basileâ, Argentorato, aliisque innumeris urbibus eos abaruit. Gheussios Coloniâ depulit, & Calvinianos eò se per dolum inferentes. Halberstadio inhiantes removit. Tirolim, Carinthiam, Stiriam, aliisque provincias ab horum audacia, servitióque pro viribus

vindicavit. Rhenano tractui operâ Joannis Gropperi prospexit; missisque in omnes partes Apostolicis Nuntiis, præsertim Elgardo, & Alexandro Trivio, ac Viris pijs è Seminarijs vel aliunde accersitis, Archiepiscopum Moguntinum, Administratorem Bambergensem Fuldensem Abbatē, cæterosque Antistites extimulavit ad exploranda, lustrandaque sibi commissâ oppida, ne atrocior esset errorum pestis, dum occulta, adeoque insanabilis. Maximilianum Cæsarem, eique succedentem Rodolphum, cunctosque Catholicos principes sollicitos semper habuit, ne quid Sectariorum ferociæ, licentiæque tribuerent, impavidi adversus minas, illibati adversus blanditias; Nunquam esse nimiam Principum pro Ecclesia constantiam; verbis, dolisque feroces Hæreticos, demum pavere, ac frangi, nisi timeant ipsi Principes, quorum vultus potentiam spirat. Neque solum mediocris notæ hominibus, prava opinionum ferentibus obstitit, sed etiam Dynastis quorum impetum averfus Catholicos nec dissimulari debere, nec posse tolerari, censebat: Saxonizque Ducem
Lusa-

Lusatiae prava dogmata per suos praecones insinuantem, avertit à consilio Catholicis perniciosissimo; nam Gregorius scriptis ad Caesarem literis, metum injecit illi, ne Caesarem offenderet, dum Pontificem offende-
bat. Praeterea quod Religiosae familiae, ac literatae Academiae, Semina-
ria sunt sinceræ pietatis ac doctrinae, nisi ad otium segnitiei-
que degenerent, insitâ quadam mortalibus licentiâ; Di-
linganam Academiam sustinuit pæne præcipitem; Colonien-
sem purgavit, cæteras ornavit; Religiosis autem viris ut
vitâ & moribus nomini essent pares, infra turbam viverent,
seriò præcepit; non ignarus, eorum facta ad rem,
pietatemque publicam pertinere, ac validi-
ora esse vitia ad exemplum sceleris. Ad hæc nihil se præstare
existimabat, nisi consilium Tridentinum Germaniæ approba-
ret, nec unquam destitit Principibus Vr-
bibusque commendare: Necessariam esse
hanc Germaniæ medelam, ut ali-
quando convalescat.

CAP. XXIII.

Germaniæ Principes beneficijs, & benevolentiaâ prosequitur.

VERùm publica Germaniæ mala modum exceſſerant, inſolensque ſectariorum audacia laceſſebat ultionem; verebatur etiam Gregorius, ne paulatim hæreſis invaleſcens anteiret, vanamque redderet potentiam Catholicorum, quibus graviora pericula impendent ex toleratâ, quàm oppugnata hæreſi. Ergo transgreſſus eſt à pacis artibus ad belli conſilia, totuſque in eâ cogitatione fuit, ut quæſitâ Catholicorum conjunctione, ac inſtaurato Lanſpergico fœdere, vim & arma hæreticis intentaret: communibus viribus facilè extingui incendium, cui ſinguli aut pares eſſe nolebant, aut non poterant: absque invidia Cæſarem, & absque metu reliquos Principes illi bello ſe impendere, cui principium & manum offerebat Pontifex: trepidaturos ubique gentium Sectarios, & fortasſe daturus locum pœnitentiæ, ſi armatum & ſeverum Pon-

Pontificis Catholicorumque ingenium animadverterent: hæreticæ audaciæ alimenta præcipua esse, disiunctos ac divisos nostrorum animos. Jamque re deliberatâ propior erat cæpris, cum arcana prudentiæ ferax animus novam ingessit cogitationem, Contumaces animos faciliè in desperationem agi. Quid si Hæretici Othomanum accirent, mallentque Barbaris, quàm Catholicis servire? Nihil posse optabilius Othomano accidere, quàm potiri Germaniâ, quò toties & vota & vires converterat: quale subsidium fore in eo bello, quod omnes declinarent? Germanis quâ animum, quâ vires deesse: Hispanos bello premi Galliam turbatam: & Italiam quoque malis obnoxiam. Igitur ne specioso belli titulo Rempublicam in casum daret, Religionis adminicula quærere cœpit, dissimulatâ potentiâ, cui semper comes invidia; & auctâ benevolentîâ, cujus artes tutiores; nam plerumque valida & acria consilia periculosa. Igitur ratus, amore Pontificis odium hæresis stare; Germanos Proceres ad se allicere, quæ collatis beneficijs, quæ suppeditatis adju-
mentis;

mentis; & sponte occasiones benevolentiae aucupabatur. Maximilianum & Rodolphum Cæsares, Archiduces Austriacos, Albertum Bavarum, Antistites, Septemu-
iros, omnesque majorum minorumque gentium homines prono favore amplexus, plus potuit per benevolentiam, quam alij per minas volunt. Ita enim se Gregorius semper gessit, ut futuri ambiguus, amandi potius quam ulciscendi aculeos relinqueret: Optimos quidem Principes expetebat, sed tolerabat mediocres, ne in deteriora laberentur, lubricâ in omne scelus ætate. Nec irascebatur principibus A Catholicis aperto odio, sed malebat infensos lenire, gnarus, non alio vinculo innecti corda etiam Principum, quam Charitatis, eoque vincebat. Augustus Saxoniae Dux, non mali Ingenij Princeps, vehementius in novas Sectas, praesertim Calvinianorum, coeperat exardescere, evulgataque Gregorij erga Germanos benevolentia, tacito, amore in eum ferebatur, spemque faciebat Catholici animi, si foveretur; inerat illi summa potentia, & potentiae additamentum, egregia indoles;
Ergo

Ergo Gregorius rem seriò aggredi; Augustumque per Archiducem Ferdinandum, & Albertum Bavarix Ducem, sanguine amicitiaque conjunctos, ac per ipsum Cæsarem amanter salutare, hortari ad Lutherum deferendum. Et palàm Augustus jactavit, mgregorij Decimi Tertij vigilantia Catholicam Religionem niti, alioquin casuram; & Gregorio similes Pontifices si forent, fore eos non modo Ecclesiæ, sed etiam Orbis Terræ principes; neque alia illum causa retraxit à consilijs Gregorij, quàm inanis pudor, quo nihil ineptius, nihil potentius in rerum mutationibus; quasi infra majestatem sit, abdicare innata studia. Jam verò Catholicis Principibus non modò non irascebatur, sed clementiùs favebat; certus, pari affectu à Catholicis & Religionem & Pontificem amari. Ernestum Bavarix Ducis filium magnificè in ædibus Vaticanis exceptum, aluit pluribus mensibus cum tota familia, Pontificio amore, sumptuque regio; & consilio quoque ac subsidio fovit, ut par generi, gratiorque Parenti rediret in Germaniam, referretque propitiam Romanæ Aulæ voluntatem.

tem. Jacobum etiam Fridericum, Ernesti
Consobrinum, pari pompâ & liberalitate
suscepit; Neque unquam splendoris ac
magnificentiae partes omisit, ut Religio-
nis ac pietatis majestas eluceret; Princi-
pum enim ac Populorum animi, sordi-
dum & avarum pe&us aspernantur, ma-
luntque obesse, quàm subesse auri cupido.
Andream, Archiducis Ferdinandi filium,
etsi ætate minùs promptum, novem scilicet
ac decem annos natum, Romanâ purpurâ
donavit, atque hoc nobilitatis additamen-
to & consuluit Germaniæ, & Ferdinando
optimè de Ecclesia merito gratificatus, in-
dicavit, esse etiam aliquod præmium No-
bilitum pietati. Mariam verò Augustam,
Rodulphi Cæsaris Matrem, in primis di-
ligebat, quòd Catholicam Religionem
tueretur, eamque Germaniâ excedere
molientem retinere conatus est, tum ne
Germania hoc præsidio nudaretur, tum
ad confirmandam in Religione defen-
dendâ Rodulphi constantiam: eam esse
rerum conditionem, ut si deesset Princi-
pum benevolentia. Religio minùs fove-
retur: panderet sinum provinciæ, quæ
illi

illi solium erat, ac theatrum. Sed cùm illa omnino discessum adornaret, rogavit, ut Rodulpho Pragæ Bohemiâque, obtestis, apertisque hæresibus obnoxiam commendaret, eique faces adderet, ad Calvinii semina nuper nata excindenda; Nobiles factionum avidos metu compri-mi; plebem voluntate Principis allici: posse convelli quamlibet Sectariorum molem ostensâ Cæsaris irâ. Demum misso Francisco Toletò à Societate Jesu, quem illa sponte accersierat, exquisitissimis muneribus, & benevolentia argumentis eam cumulavit, Germaniâ egressam, & Genuæ se inferentem. Tantus in erat illi erga Catholicos Germaniæ Principes amor; Hæc tamen magnitudo benevolentia, nihil detraxit auctoritati, cujus retinens fuit, dum indulgebat charitati. Possem similia non pauca memorare, sed alibi indicata, satius est prætermittere: Mors certè Caroli, Cliviensis Principis filij, omitti non potest; neque enim amor magis se prodit quàm in suprema calamitate. Accesserat hic nobilitate pietatèque eximius adolescens ad Gregorium, Romana
templa

templa veneraturus, & suo & Parentis Henrici nomine; & in ædes Pontificias receptus, benignèque ac decore habitus, ex arserat cupiditate spectandi Neapolim, cujus situm amœnitatēque commendabat fama, quæ apud Juvenes gratiosa est; Neque audebat permittere Pontifex, seu futuri sollicitudine anxius, more parentis, sen ratus, juvenilem licentiam difficilius retineri posse inter delicias, quibus Urbs illa floret. Tandem consensit: ne indiffidentiâ, suspicionēq; traheretur nimia benevolētia, quasi alijs invideret hoc decus; Verūm præsagientis animi moramin faustus reditus comprobavit; Nimirum fato quodam senes de adolescentibus vera judicia ferunt; & Gregorio summa quædam vis adfuit perspiciendi futura; non audaciâ sentiendi, sed experiētiâ, quæ senibus auctoritatem facit. Rediit ergo Romam Carolus; sed valetudine per nimiam ludorum, voluptatūque licentiam corruptâ, & etiam dolore immodico æger, quod homo sibi gratissimus in rixa cecidisset, vix Urbe conspectâ in febrem incidit, incalvītque miserabiliter. Statim res ad Gregorium

gorium perfertur, qui ut remedijs morbum expugnaret, sex illi præstantissimos Medicos adjecit, jussitque duos alternis horis ex ijs mutatâ opera, diu noctûque adesse; Nec satis amoris hæc cura; sed monito Parente, ad omnia sese convertit, quæ ingenium amoris sollicitante dolore, novit excogitare. Sæpius ægrum invisere per se; in momenta percontari de remissione, vel æstu morbi; Medicos panè impatienter accire, ut nihil prætermitterent necessariæ industriæ; Non labori sumptu-ique parcerent; sibi fore illa remedia gratiora, quæ pretiosiora; nec erubuit Rector generis humani, tam accuratè unius adolescentis inservire valetudini, ut videretur nihil aliud agere; quamquã nihil gravabatur aliarum rerum curâ, dum procurabat Charitatis negotia, quæ Dei Vicario supra reliqua cordi esse debent. Visus est Carolus aliquantulùm convalescere, sed repentè febris vehementius exarsit, eumque ad extrema deduxit. Hoc ille morbi impetu pressus, & morti propior, suæ homines familiæ ad se vocatos proluxa oratione commonuit, de Gregorij erga se charitate;

tate; redirent in patriam, & Henrico parenti, consanguineis, & universæ Germaniæ exponerent, quàm amanter, quàm magnificè, & sanus & æger exceptus à Gregorio fuisset Carolus Clivienſis; nec à parente meliora, nec à Principe nobiliora benevolentia monimenta expectari posse; narrarent, qui vidissent; optimos esse hujus spectaculi testes, qui fuissent spectatores; Meminissent tamen ipsi, se quidem in ætatis flore, in summa spe, extra patrios fines & amores, quasi ostentum humanæ vanitatis, occumbere, hac una re maxime gaudentem quod occumberet in Gregorij sinu: ac paulò post Evcharistiâ munitus, salutaribusque pietatis Christianæ, Catholicæque Ecclesiæ præsidij instructus, fato concessit. Mortuo non sine lacrymis parentavit Gregorius, sacroque peracto, Cadaver cum pompa & comitatu jussit in Templum Germanorum deduci, ibique convestitis honore carminum parietibus, additoque emortuali concentu, egregio tumulo illud componi, Româ non minus dolente jacturam adulescentis, quàm Gregorij Charitatem laudante,

laudante, quæ & ipsi Germaniæ in primis gratissima accidit; Henricus certè Caroli parens gratias egit Gregorio summas, & quamvis filium suspiraret ademptum, pro solatio doloris habuit, eum per Gregorium & Romanam Ecclesiam Cælo oblatum.

CAP. XXIV.

Præsidia parat adversus Othomanum.

SÆvior fama ex Oriente manaverat, novam & planè formidandam classem ab Othomano parati adversus Christianos; quibus ob intestinas discordias, vel levissima Hostium tentamenta eò graviùs timenda sunt, quò minùs timentur. Itaque Gregorius, misso Jacobo Boncompagno ad Pontificiæ ditionis litora, validiùs munivit ea loca, quæ obvia, obnoxiâque excursionibus Barbarorum jacebant; & ne quid Christianis rebus incommodum Othomanus moliretur, adjecit animum ad novum fædus cum Hispanis, Venetisque ferendum. Plura afferebat, quæ videbantur Hispanos posse allicere. Non mino-

rem imminere Hispanis ditionibus ab Othomano metum, quàm reliquis; minores tamen fore sumptus ad expediendum bellum, si ab ipsis, Pontifice, Venetisque conjunctis, Othomanus premeretur: perduelles in Belgio territum ac repressum iri, si feliciter adversus Turcas pugnaretur, seu relatâ victoriâ, seu nobilioribus oppidis occupatis. Sed Hispanos alia deterrebant; Non esse paris operis, promittere, ac præstare: necessarias fæderi condiciones accipi posse, expleri vix posse: ac frustra opes, quibus Afri, Mauri, Piratæque arcendi erant, conferri in Orientem, orâsque remotas, vel modico vel nullo expeditionis pretio: denique post exhaustas Hispanias, Venetos, invitis etiam Hispanis, cum Othomano in gratiam redituros; atq; ita semper Hispaniæ illudi dum Hispania exhauritur. Hæc dum agitantur, Othomana Classis Tunetanum Regnûm invasit, Sinamo duce, qui auctus Barbarorum propè degentium auxilijs, intra quadraginta dies, non modò conditam paulò antè ab Hispanis arcem occupavit, sed etiam Tuneto potitus fuit, & Golettam expugna-

gnavit, modico militum præsidio, sed ingenti armorum copiâ munitam, captis etiam Gabrio Serbellono, aliisque insignibus viris, pari damno, ac dedecore. Atque hic libet Gregorij prudentiam avertere, qui Philippo Hispaniæ Regi auctor fuerat, ut Tunetanum Regnum viribus, animisque ab Hispaniæ potentiæ corpore avulsum, Joanni Austriaco attribueret; Non facile amitti regna quæ præsentia Regis firmantur; quod consilium ni abnuisset Hispanus, fortasse vel adhuc Hispaniæ serviret melior Africæ pars, vel Othomanus abstinuisset eâ prædâ, quæ fortissimi Principis in manu erat. Sed redeamus ad novi fœderis apparatus, quem Gregorius omnino adornabat, ut eluctaretur Othomani furias, quibus in dies Orbis Christianus concutiebatur; Igitur propitiato per preces & sacrificia Numine, non modò Hispanos, Venetos, aliósque principes Italiæ, sed Germanos quoque pertrahere contendit ad bellum Othomano indicendum: Summo in discrimine semper versaturam Germaniam, si formidolosum hostem intra fines, atque in sinu

armatum semper, ac minacem sentirent: timerent, ne Catholicorū flagitijs, erroribusque degenerantium ab Ecclesia populorū; commotus Deus Græciæ supplicium in Germaniam verteret: specularentur calamitosam tot provinciarum fortunam: Othomanæ ambitionis esse, nulli regno parcere; non esse ambiguam jacturam, ubi certus est hostis, & nisi is procul Germania depelleretur, suam quoque posse facere Imperij Romani sedem: nomina diversa esse, Germaniam, & Græciam, ceterū eodem ambitionis impetu facile in unum coalescere. Et quamquam haud ignorabat, se rem agitare difficillimam, distractis civilia in bella Germanis, tamen communis officio Parentis ne deesset, ea significavit, quæ exequi tutum. Deus arcanis cladibus Othomano inflictis, sustentavit Gregorij spem; quippe pestilentiā Constantinopolim vexante, vix Barbaris superfuere vires ad vitam, cujus discrimina altius metuuntur, quàm bella amantur. Præterea Gregorius in Othomanum sollicitavit Æthiopum ac Persarum Reges; missis in Æthiopiam Joann. Bapti-

Baptistâ Britio Cosentino, & Josepho Baleono scloporum fabro, in Persiam verò Joanne Baptistâ Vechietto Florentino, qui re feliciter peractâ, quinque post annos Romam remigravit. Insuper reverso Legato Lusitano, quem ad eundem Persarum Regem destinaverat, junctis Hispaniac Lusitani Regis literis, incredibili gaudio recreatus fuit, tanquam certus melioris fortunæ; siquidem hic legatus magnificè à Persis exceptus, reddidit plenas benevolentiam & humanitate epistolas, quibus Rex suam Gregorio Christianisque Principibus operam, opemque offerebat, se ubique insidias & bella Othomano moriturum; adessent Christiani, viræque adderent; nec dividerent auxilia, quæ conjuncta vinci non possent: angustior fore Othomani Dominatum, si Christianorum, Persarumque viribus premeretur, Persis non deesse audaciam, nec vires Christianis, ad iniquum hostem debellandum. Cur finerent expertem ultionis, gloriosum tot Christianorum spolijs Tyrannum? Verùm diversis jam Christianæ gentis rebus, & plerisque Principibus ad

privata se consilia referentibus optari potuit, non confici fœdus. Rarò quemquam Principum mœstiores ulla clades affecit, quàm Gregorium hæc remissio conspirantium animorum adversus Othomanum, adeò ut cùm didicisset, ab Hispano triennes inducias cum Othomano susceptas, maluerit irasci Hispano, quàm indulgere, questus, ademptam sibi Christianæ Reipublicæ vindicandæ facultatem; Et sanè quamquam consilia Principum scrutari anceps, ac incertum sit, tamen illud affirmare de Gregorio licet, illum non inani spe, sed constanti validâque mente sua omnia eò retulisse consilia, ut non minùs Hæresibus Germaniam, & Galliam, quàm Othomanis furijs Græciam, & Orientem levaret. Excelsa scilicet mens vulbonectimere, nec posse timere.

CAP. XXV.

Hispania favet, ac prospicit.

MAgnum potentiæ corpus magnis quoque dissensionum morbis jactatur, & opus est dominantium solertiâ, quæ laborantis imperij membra sagaciter inspicat,

ciat, foveátque benignè. Atque hac de causa Gregorius cùm intelligeret, Hispani Regis potentiam id temporis propugnaculum esse Religionis Christianæ, adversus Othomani & Sectariorum vim, nihil omisit, quo Regi studeret, ejusque seu pietatem incitaret, seu potentiam confirmaret, tollerétque ea mala, quibus magnū corpus si non convellitur, certè debilitatur; Ideo suavitati illi, ut suam opponeret præsentiam tot rerum motibus, quibus & Belgicum, & aliæ Provinciæ quatiebantur: graviora è Principis absentia insurgere pericula: & Bella instar nubium evanescere, antecedente Principis vultu, velut aspectu Solis, Sed Philippus tenax consilij, in quo præcipuum dominationis arcanum reposuerat, ne se in casum daret, vel (ut ipse jactabat) ut propius aurum Indicum exciperet, maluit ex Hispania, tanquam ex Imperij corde, afflictis partibus mederi. Et quamvis ægrè ferret Gregorius hanc Philippi in Hispania moram, tamen haud omisit ea suppeditare, quæ potuit firmandæ potentiæ adjumenta; cùmque ille efflagitasset ad leniendos sumptus, quibus

& classem & Bellum pro Religione instruxerat, ut sibi liceret singulis annis quadraginta aureorum millia è sacræ rei patrimonio, ad publicas utilitates derivare, tandem consensit, sed infortunato exitu, spectaculòque populis ingrato; memorant enim, cùm hastæ subjecti essent agri, qui Regis in potestatem venerant, neminem ausum esse eos emere, sed horrore quodam perfusos Cives vidisse, ac fugisse, atque adeò jacuisse prædia illa inculta: tanto etiam Philippi metu, ut abstinere pium duxerit, ac necessarium, eâ pecuniâ, cujus pretium odium populorum erat. Amabat præterea Gregorius Philippum privato publicòque affectu, & usovenit aliquando, ut cùm uterque graviore Corporis valetudine vexaretur, sui oblitus, non nisi meliorem Philippi conditionem exoptaret; atque hoc Pontificiæ animæ proprium credidit, bene velle Regibus, nullo sui respectu, aut suorum, quos sibi, & Ecclesiæ addictos volebat, non Principibus; vetuitque Philippum Boncompagnum opulento pensionis redditu ab Hispanis ornari, ne fides obligaretur,

quæ

quæ illibatio est repudiato munere. Illud etiam cavit, ne benevolentia detraheret auctoritati, neu studium retinendæ auctoritatis benevolentiam minueret. Itaque etsi in dies de Jurisdictione inter utriusque potestatis Regiæ & Apostolicæ administratos controversiæ ferverent, nihil simultatis inter Gregorium & Philippum intercessit, sed honestissimis verbis alter alterum laudabat: sua quisque tueri, nunquam irasci: quamquam Pontifex non semel visus est Philippum inculcare, quòd pactas cum Othomano inducias nollet frangere, ne fortunam formidine necessariâ falleret, aut ne dispergeret incassum vires; & præterea semper obstitit, cum Regis nomine ea petebantur, quæ ad Ecclesiam pertinebant, vel extra jus regium erant; neque tamen visus est unquam Rex indignari, sed potius æstimabat, & amplectebatur Gregorij æquitatem, quæ nullis minis languebat, quia non inconsulto impetu agebatur: nam revera & ipsi Reges probant Pontificis constantiam. Abnuebat Gregorius permittere Philippo Hispaniensis Ecclesiæ proventus,

seu quia alios concesserat, seu ratus iniquum, suis Ecclesiam opibus exhaurire: quod cum ægrè ferret Joannes Zuniga, qui ad Pontificem à Rege legatus id frustra contendebat, significavit Philippo, agendum esse acrius cum Romana Aula; & Rex approbato consilio, vehementiores literas ad Gregorium dederat, atque ut magisterrent, manu regiâ exaratas. Eas ubi perlegit Gregorius, expers timoris, ac iræ, paucos, & ipse remisit Pontificiæ majestatis characteres, quibus suam probavit constantiam, ostenditque, non Pontificem à Regibus, sed Reges à Pontifice regi. Quo constante responso accepto Philippus magis indoluit, se displicuisse Gregorio, petitâque scripti veniâ didicit, non per dura & aspera, sed molliore viâ Romanæ Aulæ gratiam captari. Eâdem in Gregorium observantiâ usus est idem Philippus, cum Prorex Neapolitanus iret imminutum potestatem Laurentij Campegij, qui Antonio Saulio Nuntio Apostolico discessuro suffectus, Neapolim destinabatur; quippe Rex severè admonuit Proregem, nequid ingratum Grego-

Gregorio moliretur, nec violaret Nuntij auctoritatem. Et fato quodam plura obvenire gravioris iræ pericula, ob ejusmodi certamina inter Hispanos & Apostolicos Judices, quæ conjunctissimos Principes vel separare, vel dividere potuissent, nisi & Rex, & Pontifex prudentiâ certassent; ille vulnera cohibendo; hic opportuna vulneribus remedia quærendo; tantoque studio in hoc pacandæ dissensionis negotium exarsit Gregorius, ut demum æquitatem vel impetraverit, vel extorserit; Siquidem optimum ac tutissimum ratus, non vi, aut arbitrio, sed leniter deliberando causas irarum abscindere, perpulit tandem Philippum, ad homines rerum ac juris scientissimos Romam mittendos, qui difficultates cognoscerent, atque unâ cum alijs hominibus à Gregorio destinatis, concordæ leges acciperent, darent. Ergo ex Hispania missus est primum Petrus Avila, cui vix Romam ingresso & mortuo, longo intervallo temporis exacto, successit Alvarus Borgia, & paulò post Jacobus Ricardus, vir singulari doctrina; & quamvis fama vulgasset, cum summa illos potestate ad componen-

das lites accedere, tamen famâ minor fuit potestas, nani jussi sunt testificari; si quid incompositum superesset, reliqua omnia velut incomposita habenda. Usque adeo libet de omnibus certare, nisi omnia vincimus. Delectis ad deliberandum Sanctacrucij Aedibus, cum Hispani Vaticanum rejecissent, quasi obnoxium suspicioni, ob sedem Pontificis, eò convenire, Joannes Zuniga, Alvarus Borgia, Franciscus à Vera, ejusque loco Jacobus Ricardus, regiarum partium defensores; Pontificis verò nomine quatuor Purpurati, Sfortia, Ursinus, Maffeus, ac ipse Sanctacrucius, & præterea Pyrrus Tarns, Alexander Frumentius, & hoc in Lusitaniam misso, Joannes Antonius Facchinettus. Primùm relata sunt ea, quæ in Ditione Mediolanensi, veniebant in controversiam; deinde illa, quibus Neapolitanum Regnum ac Sicilia jactabantur; Hispania in postremum locum seposita; cùmque plurima composita essent, Nodus superfuit, qui solvi non potuit, adeoque gravis & laboriosa consultatio in vanum recidit, seu arte, seu difficultate spem clu-

eludente : Certè Gregorius, nec sibi nec
causæ defuit, sed omnia per se expende-
bat, antequam in deliberationem afferren-
tur, tam peritè ac doctè, ut ejus doctrinam
prudentiamque fas reliquis esset mirari,
non æquare. Sedis enim Apostolicæ jus,
Dei patrimonium rebatur, nec labori par-
cebat aut studio, etsi fessus ætate ; ut suo
martē, non alieno tantum ingenio, veri-
tatem æquitatēque æstimaret : evolue-
bat antiquas tabulas, & publicā moni-
menta, avidè non minùs quàm patien-
ter. Quod accuratè præstitit, cum
Purpuratus Gesualdus Philippi nomine
adfirmaret, Ecclesiam Tranensem ad
Hispanum spectare, tanquam Jus Patro-
natûs regium (uti vocant) & ipse perne-
garet, numerosa præteritorum annorum
acta sponte relegit, ne alienis erraret ocu-
lis, dum Sedis Apostolicæ causa agebatur.
Ut verò Philippum sibi Ecclesiæque Ro-
manæ conciliaret, nulla prætermisit offi-
cij momenta, & in lætis rebus gratulari, &
in adversis dolere, ac etiam monere,
ut memor cælestis iræ, parceret Ecclesiæ
auctoritati ; mala interdum Regibus in-

gruere è cælo, dum Cælum in Ecclesia læ-
ditur. Eundem solatus est, multiplici
afflictum funere, Ferdinandi Primogeniti,
Joannis Austriaci fratris, & Vincislai Au-
striaci; ac sub idem tempus nato regni
Hærede Philippo III. recreatum, exprom-
pto Pontificio gaudio confirmavit: insi-
steret spei: esse Deo curæ Hispaniæ for-
tunam; acciperet divinæ pignus benovo-
lentiae, subortam in tempore sobolem.
Plura quoque sancivit Hispaniæ utilia, in-
stitutis per Episcopos adolescentum Semi-
narijs, & firmatâ in Urbibus eorundem
præsentia: Illuminatorum abrogatâ sectâ;
sublatâ Cæsaraugustæ truci consuetudine,
quâ privatæ simultates in Bella & prælia
populorum abibant: Sacerdotijs, & ani-
morum ministerijs ritè, atque ad probos,
peritosque homines delatis, aliisque plu-
ribus rebus, ad normam publicæ felicitatis
vel compositis, vel institutis; vetito
tamen Nuntio Apostolico aliquid agere
inscio Rege, ut constaret Gregorio cordi
esse Hispanam tum potentiam, tum
benevolentiam.

CAP. XXVI.

Sueciam ad fidem Catholicam adducere contendit.

NON modò Catholicis imbuta moribus, sed polluta hæresibus Regna, suo quoque sinu fovebat Gregorius, more optimi Pastoris, qui siquid aberrat, revocat ad sese, neque patitur destitutam comploratamque rem eorum esse, quæ alienâ perfidiâ, vel suâ inscitiâ arcentur à Christi Imperio. Hinc æstus ille feruebat, per omnes provincias circumferendæ salutis; neq; ulla Christiani nominis reliquias sinebat pertidas esse, quæ aliqua arte industriâve ad pietatē animari, ac erigi possent, non semel accidisse, ut audentes occasio & fortuna juvaret: certè Deus ipse nulla magis negotia prouehit, quàm Religionis. Quapropter cum Sveciæ excitandæ sese oportunitas obtulisset, nec temporis occasionem spreuit, nec distulit; Et hoc Regnum quò magis remotum, hòc magis optandum erat; nam facile est, vicinis adesse provincijs difficillimum retinere lon-

longinquas, præsertim alijs Sectariorum locis, moribusque conclusas. Itaque vehementiùs in hujus regni salutem sese effudit, ut Gens, ingenio libera, & erroribus corrupta, assuesceret Ecclesiæ, Fidémque extolleret. Hisce provincijs imperabat Joannes III. Lutherianæ factionis Rex, qui Legatum in Poloniam miserat, siue amicitia cum Henrico firmiùs adnectendæ studio, siue aliâ causâ, more Regum, quibus vicinorum Principum initia, vel spem, vel timorem afferunt: Hic autem Legatus ut multarum literarum erat, ac Lutherianâ quoque labe inspersus, contraçtâ cum Vincentio Laureo Nuntio Pontificio, doctrinis omnibus instructo (uti fieri suevit inter doctos) summâ consuetudine, paulatim jactis de veritate sermonibus, & spectatæ probitatis exemplo, ad Catholicam Religionem accessit; hinc spes Laureo, fore, ut Rex Joannes, quâ Legati operâ, quâ Gregorio faces ingerente, Hæresim abdicaret. Itaque spei advenientis monuit Gregorium, qui in omnem propagandæ Religionis auram intentus, eò promptius spem arripuit, quòd

quodd credidit futurum, ut Joannes ad
foedus cum Hispano ferendum pertrahe-
retur, atque ita faciliùs geminatâ classe
Belgio hæreticos pulsum iti. Quampri-
mùm in Sueciam destinavit hominem
summæ nobilitatis, ac doctrinæ, ac præ-
terea famâ susceptæ religiosæ vitæ ubique
laudatum videlicet Stanislaum Vvarsevit-
um Societatis Jesu, qui ob præclara publi-
cæ auctoritatis munera in Polonia præsti-
ta jam clarus, facili aditu Reginam, &
mox Regem allocutus fuit, etsi non o-
mnino Joannem ad Gregorij voluntatem
allexit. Verùm Gregorius, cui cordi su-
pra reliquas Principum virtutes, erat con-
stantia, magnorum operum, & Heroum
comes, reverso Stanislao Vvarsevitio,
aliu Societatis Jesu hominem in Sueci-
am misit, qui Reginæ gratissimus, de Ca-
tholica Fide publicè differere cæpit, hære-
ticis haud obsistere ausis, metu ejusdem
Reginæ, cujus studia plerumque Rex vel
approbat, vel sequitur. Et sanè Rex jacta-
bat, Fidei Romanæ, se ac suum Regnum
velle restituere, Legatûmque hac de
causa ad Romanum Pontificem destina-
bat;

bat; modò ille permetteret, conjugia Sacerdotum, sacram sub utraque panis & vini specie Synaxim, ac demum Sacrificia communi & populari sermone celebranda. Et quamquam Gregorius hoc ter-geminæ difficultatis nodo penè cunctos Populorum à veritate desciscientium errores involvi, haud ignoraret, tamen sperabat, propositâ conditionum difficultate, proniorem ad consilia pietatis Regem, daturum facilè manus: cur ea impetrare vellet, quibus impetratis hæreses triumpharent? non alio colore suas effingi turbas à Sectarijs, quibus libido & licentia popularis, loco religionis sunt; Igitur benignè audire, nec spem Regis asperiore repulsâ percellere; sed officio, benevolentia alere; ac suapte sponte rogare Hispanum, ne Sueciæ Reginam Bariensis Ditionis proventu fraudari pateretur. Interim Rex ad Gregorium legavit sponte Pontum à Guardia Galla, qui privatim à Gregorio exceptus multis coram Purpuratis, obedientiæ, observantiæque regiæ obsequia detulit, ore calamòque testatus, Sueciæ Regem ex animo Sedi Romanæ
studere,

studere, recitatisq; petitionibus paulò ante memoratis, efflagitavit; ut Gregorius sapientem virum in Sueciam mitteret, qui Regem & instrueret Catholicis documentis, & absolveret Conscientiæ vinculis; Audiit hæc libenter Gregorius, & quia petitionibus nefas erat indulgere, quas expendi jusserat, misit cum eo Antonium Possevinum Societatis Jesu, virum & doctrinâ & prudentiâ insignem, qui cum Pontus ex morbo constitisset in via, solus in Sueciam profectus est, modico tamen itineris fructu; quippe Rex seu mobilitate animi, seu aliorum studiis, mentem aliò converterat: illud tamen effecit, ut Ecclesiæ Romanæ Instituta commendaret, eumque ab Elisabethæ Anglorum Reginae, & Gulielmi Orangij amicitia abalienaret. Neque Gregorij conatus ex vano fuit, cui debemus Sigismundum III. Poloniæ Regem, hujus Joannis III. filium, nulli Regum, Catholicæ ac sinceræ pietatis studio secundum. Sic beneficâ tarditate compensat Deus piæ studium voluntatis, nec patitur demum esse absque fructu

fructu semina laborum, quibus pietas propagatur.

CAP. XXVII.

Græciam & Orientem sublevar.

GRÆCIA, illustris olim Europæ provincia & pietatis ac sapientiæ ferax, sed paulatim hæresibus corrupta, & latinæ Ecclesiæ æmula, in servitutem abiit, amisso Imperio, & Imperij altricè Fide Catholica. Hujus ergo provinciæ malis conatus est mederi Gregorius, & quia plerumque, præsertim apud Græcos, ab ingenio errores manant, quòd tenax suæ famæ ac mentis natio errare mavult, quàm aliter credere; per libros primùm, à quibus petenda est sanitas ingeniorum, Græciæ opem ferre aggressus, duodecim millia libellorum, quibus mysteria Religionis explicantur, communi & Græco sermone conscripta, eò misit, liberaliter distribuenda, adiecítque plurima exemplaria Florentini Concilij, cujus Historiam & arcana Pontificio ære, ac præclaris typis evulgaverat.

Insu-

Insuper excitato Romæ Collegio, quod loci amœnitate, salubritate domicilij, aliisque tum ornamentis, tum commodis perquam nobile habetur, asylum erexit Græcæ juventuti, quæ ibi Catholicis informata documentis. Romanæque in sinu Ecclesiæ educata, patriam & Cives ab erroribus vindicaret; quo consilio nihil præstantius, ad inveterata mentium mala tollenda, comendavitque Collegium fidei ac prudentiæ quatuor Purpuratorum Jacobi Sabelli, Gulielmi, Sirleti, Julij Antonij Sanctoriij, & Antonij Carasæ, quibus illâ ætate nihil excellentius. Adivit quoque ipse ac Pontificio aspectu recreavit Collegium, magnum sanè firmentum, ad Græciæ studia erga rem Romanam fovenda. Alia præstitit etiam non minoris benevolentiae præsidia. Monachos Græcos per Calabriam, Apuliam, & utramque Siciliam dispersos, & ex ignorantia Græci veterisque sermonis, Religiosarum etiam legum, quæ hujusmodi sermone conscriptæ erant, oblivione contemptumque abductos ad sanctioris disciplinæ normam retraxit, S. Basilij Institutis
ad

ad vulgarem dictionem traductis, & citra sumptum in Provincias ad ipsos missis, ne incititia sermonis vitæ sanctimoniam inverteret. Homines Christianos Peræ degentes, offensôsq; seu injuriâ seu exemplo Religiosorum Virorum ibi contemnantium, lenivit, eó destinatis alijs Viris, qui & prudentiâ & charitate famam sibi pararent, Civibus quietem. Nec inodò sacrorum Ordinum tam D. Domini, quàm D. Francisci Moderatoribus præcepit, ut interdum suos homines in ijs locis diutius versatos revocarent, ne mora contemptum disciplinæ pareret; aliôsq; suppeditarent, pietate ac solertiâ locis pares, qui adversus Barbarorû insidias Christianos tegerent; sed etiam Societatis Jesu homines ad eas Urbes immisit, quæ Othomanæ superstitionis labe facilè afflari poterant, ut eorum cura, industriaque Religionem tueretur, gnarus, facilè corrumpi Urbes superstitione.

Gennadij Scholarij volumen, quo quinque Florentini Concilij capita propugnantur, à Fabio Benvoglientio jussit in latinum sermonem verti, evulgavitque,

ut latiùs innotelceret proborum Græcorum & sanctior Græciæ sententia. Petri Canisij Catholicam Institutionem, à Gaspare Ananiæ Episcopo Græcis verbis exaratam, pluribus donatis exemplaribus, fecit Græciæ communem.

In Taurica Chersoneso Urbs est antiquior, Genuensi olim Reipublicæ addicta, & Capha dicta, nunc Othomanæ violentiæ obnoxia; hîc reliquiæ supererant Catholici seminis, sed ob Nestorij aliarumque Sectarum colluviem, vehementer infectæ, cùm præsertim essent destitutæ Sacerdotibus Latinis, qui sinceræ documenta pietatis insinuarent: quæ fanè causa innumeras Orientis Urbes perdidit; quod ubi Gregorius comperit jussis eò ex Polonia se conferre Franciscanis Viris, misit sacrarum vestium supellectilem, egregiæque documenta: quibus ritè divinis laudibus, Sacramentisque seu conficiendis, seu accipiendis insisteretur, ac etiam Catholicam fidem sanctiùs testificarentur, quicumque ab Hæresi discederent; & quoniam libri validissima sunt veritatis præsidia, misit quoque haud modicam
libro-

librorum vim, quibus & pueri ad pietatem, & Sacerdotes, adultique ad doctrinam informarentur: nec ullam vel minimæ industriæ partem omisit, ut eorum saluti prospiceret, certus, præ cæteris Pontificum interesse, ad Apostolicæ majestatis famam, studere perditarum Urbium vel periclitantium Religioni, quâ solâ nititur Civium felicitas. Percrebuerat interim Oriente fama constans, de Gregorij erga Græci generis homines benevolentia: omniumque vocibus fetebatur, excitatum Romæ Seminarium, ac locuplete proventu munitum: conditum à fundamentis S. Athanasij Templum in quo fas esset, ritu Græco sed Catholico litare: recepta in sinum agmina Cypriorum, impensa liberaliter ad profugos tuendos, & captivos redimendos pecunia; & præ omnibus gratissima erat, sincera veritatis promendæ, ac divinæ gloriæ propagandæ cupiditas; inde ingens animorum inclinatio ad Latinos Religionis fasces; & quamquam alia postea acta fuerint, tamen haud ab re fuerit, hîc memorare; Thessaliæ, & Peloponnesi

nesi Antistites, ac præcipuè Hieremias Constantinopolitanus Patriarcha, animum appellere cæperunt ad concordiam obsequiúmque Apostolicæ dignitatis. Tanta vis inest solidæ ac non fucatæ charitati. Nec defuit occasione Gregorius, qui conscius horum consiliorum, sese vertit ad eliciendâ Patriarchæ voluntatem, quaesitâ, non expectatâ amplificandæ Religionis opportunitate: Misit ergo sua sponte ad Hieremiam Michaëlem Eparchum Corcyrensem, & Joannem Bonifacium, qui à Germignio Gallico apud Othomanum oratore, & Joanne Francesco Mauroceno Veneto ad Patriarcham ducti, oblatisque Gregorij tum muneribus, tum literis, peramanter ab eo excepti, domique aliquanto spatio habiti sunt, quo familiarius ab ijs de Gregorij benevolentia studiôque ipse certior fieret, more sapientum, qui amant cognoscere; ac demum Romam ad Gregorium remissi non sine aliqua donorum pompa, quæ luculentior visa est, adjectis inter dona, Joannis Chrysostomi digito, & Apostoli Andreæ manu,

nū, ac etiam egregiæ in Gregorium Romanamque Ecclesiam voluntatis testimonio, quo tam magnificè se approbavit Romanæ Hieremias, ut Gregorius eum, tanquam alterum Bessarionem, tacita cogitatione purpuræ destinaverit, speraveritque fore, ut ejus operâ plures provinciæ Romanæ Ecclesiæ conciliarentur. Sed per calumniam ab æmulis dignitate dejecto Hieremiâ, spe excidit Gregorius, non conatu, quem eventus melior mox vertit in laudem; Siquidem Germignius, & Maurocenus Religionis studio flagrant, veriti, ne ob commercia Hæreticorum à Germania Peram advenientium, inter Christianos, Lutheri aliorumque hæreses sensim quâ fraudibus, quâ specie negotiorum serperent; atque ita non minùs ab hæresi quàm à Mahometis superstitione periculum ingrueret; efflagitavêre à Gregorio, ut Societatis Jesu homines eó mitteret, qui arcerent hæresim, pietatem foverent: Constantinopolim loco Americæ, ac Japoniæ fore: Cur despicerentur terræ, quæ vicinæ, propriiores erant Evangelicæ luci? ejusdem chari-

tatis.

tatis esse, Barbaros orco, Christianos superstitioni, Catholicos hæresi eripere: posse hîc quoque suam patientiæ scenam adornari. Audiit Gregorius hæc libenter, annuitque; ac mox tres Societatis homines (Gallus alter, alter Italus, tertius vero Dalmata) pro triplici Christianorum genere ibi degentium, missi fuere, cumque à Germignio ad primarium Othomanæ potentiae Administrum, quem Visirium dicunt, deducti essent, ut liceret eis sine metu domicilium figere, & pietatis ministeria usurpare; ille commisso, uti solet, sermone de novorum nominum vita moribusque, atque audito, quod gravitâ operâ, nullâ pecuniæ spe, cupidinêve, sese Civium commodis impenderent, Næ isti homines, inquit, probi sunt, quibus aurum contemptui est! eosque amare ac tueri pollicitus, fidem suam ingenio, nec barbaro exemplo absolvit; quippe eos accersitos, tanquam Romani Pontificis exploratores, præclare defendit apud Principem, tum innocentiam assertâ, tum virtute commendatâ, ita ut calumnia præmunimento fuerit. Adeo vel Barbaris ad-

mirationi, amorique est charitas, experta
avaritiæ.

CAP. XXVIII.

Bohemiæ regno consulit:

MAximilianus Cæsar, & substinendæ
fortunæ & Austriacæ potentia firm-
andæ studiosus, Bohemiæ domina-
tum ad Rodolphum filium conferre,
animo consilioque agitabat. Quod in
tantis hæresum viribus, in convulsa Ca-
tholicorum concordia, ac præsertim in
metu totius Germaniæ, alios principes
amantis, periculosissimum erat; & in-
gruebat metus, ne Cæsar in angustias per-
tractus, aut amittendæ Bohemiæ, aut Hæ-
reticis favendi, facile consentiret votis ho-
stium, ne suis fraudaretur. Illud autem
contendebant perquam avidè Sectarij, ut
Confessio, quam vocant, Augustana im-
punis esset, ac omnibus commoda; unde
Catholici nominis ingens jactura, & sum-
mum discrimen. Gregorius, cum & Maxi-
miliano faveret, & amaret Rodolphum,
optabat eundem, non alium Bohemiæ
Regem fieri, quàm Rodolphum, sed salvâ
Catho-

Catholicâ re, ac Maximilianî famâ, cui plurima invidia parabatur ex contempnâ; ac etiam illibatâ Sedis Apostolicæ dignitate, quæ si conniveret, jam indulgebat conatibus Hæreticorum; nam quæ semel lubet indulgere, necesse est semper concedere. Augebant Gregorij metum necessaria Regiæ destinationi Comitia, quæ constabant Viris abalienatæ à Romana Religione, vel indolis, vel voluntatis; Aberant addicta Ecclesiæ capita, ingens Religionis munimentum: & Praga id temporis paucissimos Catholicos fovebat, eoque Sectariorum, & in primis Nobilium impetus incitabatur; qui apertis animis Confessioni Augustanæ præludebant; sed Gregorius cautè simul, ac sollicitè literis ad Gulielmum Ursinum Rosembergium, Ladislaum Popleum, Wratislaum Prænestanum, Sbincum Bercam, claros & Catholicos Bohemiæ Proceres, & ad Antonium Pragæ Archiepiscopum perscriptis, eos admirabiliter accendit ad rebel-
lenda hæreticorum vota, quibus arridere nihil aliud erat, quàm interire: non bene convenire, nec in uno regno simul morari

libertatem Religionis, & Catholicam
sinceritatem; deinceps si hæretici causam
obtinerent, fore gloriam penes eos,
ludibrium penes Catholicos. Admonuit
Albertum Bavarix Ducem, ut quâ posset,
averteret imminens incendiam, cujus vis
Bavarix minabatur, nam plerumque vicini-
ores primò afflantur; extimulavit Ma-
riam Imperatricem, Legatum Hispani-
cum, Florentinum, & cæteros qui vide-
bantur apud Maximilianum gratiâ pollere,
uti ejus animum adversus iniqua postulata
obfirmarent; darent pietati, quod fidei
erga Cæsarem, ac Reipublicæ saluti debe-
rent. Demum aggressus est Maximilia-
num Pontificiâ majestate: Meminisset
se Imperatorem electum, ut Catholicam
Fidem tutaretur: non referret hæretico-
rum voces ad præsentia commoda, sed ad
futuras calamitates: ab ijs nihil sincerum,
nihil utile expectari ac proponi posse, qui
corruptâ conscientiâ, prava non minùs
mente, quàm operâ utuntur: insolescere
audaciam, si semel admittatur: confes-
sione Augustanâ approbatâ, Regiæ digni-
tatis contemptum approbari, Regni leges
con-

convelli, discordias jactantiùs feri, atque hoc ipsò intercidere Rodulphi dignitatem, læsis Catholicis, quibus non minores quàm hæreticis in Regem vires; adeoque Catholicæ fidei, Regni salutis, ac Cæsareæ famæ prospiceret, compressâ hæreticorum cupiditate. Haud gravatè accepit Maximilianus Gregorij verba; se certum esse Pontificiæ charitatis, & Cæsarei officij memorem fore: sibi res novas haud quaquam placere: aliud esse audire; aliud, approbare, nec posse subiectos homines arceri à conspectu & aure Principis. Cæterùm haud metueret Gregorius, in tanta Sectariorum discordia. Atque ita prorsus accidit, nam Picardi, aliique novarum Sectarum æmuli, Confessioni Augustanæ, cæterisque illorum votis obstitère, qui Catholicis negotium facessabant. Igitur Maximilianus specie pacis alendæ, facilè novos Sectarios repulit, & Gregorio gratificaturos pluribus præsidij rem Catholicam firmavit: Hussitas coercuit, qui importunis querelis Sacerdotum opes incusabant; redirent in sinum Ecclesiæ; haud decere Roma-

num Pontificem , ab alienatis membris vires ac opem impertiri : demum frænataâ Sectarum impudentiâ , & impetratis per Catholicos procures , consuetæ pecuniæ subsidij Regnum Bohemiæ Rodolpho tradidit, omnium assensu & plausu. Post hæc publicè confirmata , quæ aliàs in Picardos fuerant sancita , eorûmque Synagogæ clausæ : Paræciæ Catholicis restitutæ : Pragâ ejectus librorum impressor hæreticus , plurâque præstita Catholicis utilia , quæ gratiora acciderunt Gregorio , quò minùs expectabantur. Et cupierat Gregorius monstraverâtque opportunum frænandæ hæresi munimentum , Tribunal scilicet fidei , quod Pragæ erigendum ab Archiepiscopo , neminem non contineret in officio ; sed auctâ animorum licentiâ , impar erat severis remedijs ; ideòque blandioribus modis Bohemiæ consuluit, misso plurimo auro , ut nova adolescentum Seminaria extitarentur , altiùsque surgerent jam excitata , adscitis in eorum curam Rosembergio & Prænestano , qui & auctoritate nominis , & animi alacritate studia Adolescentum incitarent.

Qua

Qua sanè liberalitate restituit Gregorius in Bohemia Catholicam rem, eductis ex hisce Seminarijs innumeris Sacerdotibus, qui desertas Paræcias recuperavêre, oppidâque & Urbes documentis Catholicis informando, approbârunt Gregorij arcanum; Nihil esse præstantius ad firmandam Religionem, quam juventam religiosè educatam.

CAP. XXIX.

Cavet, ne Rex Romanorum eligatur vetri more non servato.

EVeſto ad Bohemiæ faſces Rodolpho filio, ut celeritate fortunam occuparet, ac nova dignitas aliam pareret, Maximilianus Cæſar eò vires opèſque ſuas vertit, ut concilatis Septemviris, paratâque Germanorum beneyolentiâ Rodolphus filius Romani Regni ſolio admoveretur; eſſetque paternæ omnino fortunæ hæres. Itaque vehementer Gregorius efflagitare cæpit, ne vetus conſuetudo abrogaretur, quæ loco arcani erat, Haud eligi Romanorum

norum Regem, nisi Cæsar superstes à Romano fuerit Pontifice aureâ redimitus coronâ; & quamquam hic mos fuerat omissus à Ferdinando Cæsare parente, quo tempore Maximilianus ipse Rex Romanorum designatus fuit; tamen haud licere, novo & retenti exemplo, tot seculorum, Cæsarumque æstimatione validam consuetudinem abijcere. Præcepitque Nuntio Delphino, ut adiret Maximilianum; efficeretque, ut restitutâ consuetudine, suus Apostolicam Sedem, Cæsareamque dignitatem honos maneret; Neque Delphinus aut causæ aut loco defuit; sed nactus Cæsarem venationi operam dantem, adeoque curis Imperatoris vacuum, & quasi opportuna vellet monere, ritu familiari cum eo solus deambulans, procul arbitris & comitatu, de hac re sermones jecit, exposito Majorum more: quo violato periculum & incommodum imminere. Quod si valetudo, aut temporis gravitas eum vetarent Pontificis aspectum subire, posse ab alio, quem Gregorius aut mitteret, aut nuncuparet, paulo ante, quàm Rodolphus Rex designare-

gnaretur, Imperatorium insigne in ipsa Germania accipere: haud aspernaretur Gregorij beneficium, quod fortasse aliàs negaretur: panderet sinum promptæ benevolentiae Germanos Principes, cum prisca & Apostolicæ Sedi debita obsequia deferuntur. Neque hæreticos alienatum iri. Imò è dignitate esse, Imperatorem Coronari: utcumque esset, non absque injuria negligi Romani Pontificis auctoritatem, quæ adversis rebus sola Cæsari præstò est. Ubi hæc audiit Cæsar, specie rem æstimantis, ac sapientiùs deliberaturus, responsum in hæc verba aliquantulum distulit: Gregorij nec benevolentiam obscuram, nec auctoritatem ingratam sibi esse, sed valetudine gravari ne Romanam accederet: & à Legato, aliisve diadema imponi, novi moris esse, quem inducere, nec posset, nec vellet; posse hac novitatis specie commotos Septemuiros, suffragium aliò destinare. Itaque Gregorius ne deteriore Ecclesiæ fortunam faceret, ne Catholicæ publicas in discordias abirent, veritus etiam, ne Protestantes ad Hæreticum Prin-

cipem transducerent Imperium Romanum, Catholicis discordibus; satius duxit, omiſſa lite, cominonere Maximilianum, ut cùm ipſe haud novos mores amaret, efficeret, ne quid in ſacro celebrando, juramentove præſtando à Rege, aliisque rebus, præter morem uſurparetur; quod ſanè effecturum ſe Cæſar imperatoriè promiſit, effecitque, agnoſcens Gregorij beneficium. Ratiſponam igitur convenientibus Septemviris 5. Kal. Novem. ad annum ſal. 1575. omniũ ſuffragijs creatus eſt Rex Romanorum Rodolphus Auſtriacus Maximiliani filius; ejusdè-que Menſis Kalendis cùm auditus ab omnibus, ſolemni ſacramento ſpondiſſet, Romano ſe Pontifici; Apoſtolicæque Sedi conſtanter obtemperaturum, regijs ornamentis contectus de more fuit, ac mox iterum ad aram perductus ſacroſanctam formulam repetijt, conteſtatus, nunquam fore, ut Romano Pontifici non pareret, nec ſe abrogaturum, ſed integra & illibata ſervaturum ea, quæ Majores conceſſerant. Quod ſanè factum Gregorij prudentiam approbat, qui in ſumma

ma hæreticorum Principum potentia, frequentiaque obtinuit, ut Apostolicæ Sedis authoritas firmaretur, nec alium sui Rectorem haberet, timeretque Rex Romanorum, quam Romanum Pontificem; sed alia quoque in hisce Comitij tentavit Gregorius, operâ Nuntij, & temporis occasione usus, quo scilicet Sacerdotes piam, & dignitati parem vitam agerent: Mancipata Ecclesiæ bona restituerentur: ne viduatæ pastoribus jacerent Ecclesiæ, neque plures uni committerentur: Episcopi prophana specie ac veste haud vagarentur: cederent Magdeburgo, alijsque Urbibus præcones hæresum: denique ne Catholica Religio labefactaretur dissensione Catholicorum, inopiâ, penuriâve Proborum hominum, ac vi, fraudéque sectariorum. Rodolphus verò legato Claudio Trivultio, regio obsequio animoque veneratus est Gregorium, qui & actis Deo gratibus, & accensis ignibus, publica exhibuit Pontificiæ monumenta lætitiæ; gratulatusque tum ipsi Rodolpho, parentique Maximiliano, tum etiam Phi-

lippo Hispaniarum Regi , apud quem Rodolphus educatus fuerat , in spem ingentis prudentiæ , hortatus eum demum est (qui finis esse debet Pontificij sermonis) ut parem personæ gestum pietatis faceret , & qualem optaverat , sperabaturque ipse Gregorius , esset Rex Romanorum in Germania sublevanda , divinæ administrator Providentiæ.

C A P. XXX.

Causam Toletanam absolvit.

DEcimum jam & quartum annum Bartholomæus Caranza Toletanus Archiepiscopus in suspicionem hæresis adductus , quâ in Hispania , quâ Romæ detentus fuerat , anxiam omnium expectatione. Incubuerant quidem uterque Pius Quartus & Quintus in hanc causam , sed impeditam difficultatibus reliquere Gregorio absolvendam , qui difficilia quæque negotia fato quodam , seu potius validæ mentis consilio , & aggredi & conficere potuit. Pendebat Aula incerta futuri : grande utrinque momentum suspendebat

bat animos, hinc Hispani Regis, illinc summi Antistitis fama; nec prudentissimum Regem falsò accusâsse, nec doctissimum Archiepiscopum facilè aberrasse, plerique sibi persuadebant; cùm tamen alterutrius fama in periculum abiret. Neque Gregorius ignorabat rei gravitatem, siue absolveret, siue damnaret, sed innatæ constantiæ genio potens, labore ac diligentia pæne incredibili, ea cuncta præstitit quæ præstitisse par erat Romanum Pontificem, ne aut Antistes immeritò subiret infamiam, aut suspecta mens fucum faceret; ejusdem esse invidiæ, aut innocentem reum facere, aut reum tanquam innocentem absolvere: posteritati exemplo fore Bartholomæum Caranzam, quacumque sententiâ afficeretur, seu lætâ, seu adversâ, quòd à Gregorio veritatis ratio haberetur. Intererat Peritorum Conventibus, qui octavo quoque die hac re celebrabantur: audire utriusque partis argumenta; perpendere dicta, explorare facta, soli æquitati studere. Demum cùm omnia hujusce causæ acta confecta essent, xviii. Kal. Maij Reum & Actores ad tribunal

bunal vocavit. Jo. Antonius Facchinettus Patriarcha Hierosolymitanus, & Camillus Boccamazzius deduxêre Caranzam in Vaticanam Regiam. Sedebat Romanus Pontifex, Christi Vicarius, majestate ac solio supra reliquos, immixtâ mærori vultûs severitate. Propè adstabant Purpurati, Consultores, aliq̃ue minores sanctioris tribunalis Judices, ac etiam Madruccius & Perettus: Archiepiscopus jacebat contra sedem pontificiam flexo genu, anceps, & quasi conscientiam arguens; Illius latera stipabant hinc Martinus Navarus, & Alphonſus Delgadus patroni; illinc Actores, qui Hispanici Tribunalis partes adversus Caranzam agebant. Atrox spectaculum erat, attonitis mæstitiâ omnibus, sed atrociùs patuit, ubi Gregorius vultu Christi judicium spirante; manu eâdem, quâ sententiæ formulam protulit recitandam, terrorem spectatoribus incussit, ac metum plusquam humanum. Recitatâ sententiâ, damnatus est Bartholomæus Caranza, tanquam hæresis affectatæ suspectus: jussûsque sexdecim pronunciata refellere: quæ mox ille juratus impro-

improbavit, pronusque non minùs ad arbitria, quàm vestigia Pontificis, demum ad osculum pedum admissus fuit, hac lege, ne hisceret, sed facti pœnitens per silenitum conscientiae consuleret. Verùm Gregorius eum severè intuitus, palàm ait, degenerantem à fama vitæque sua Aristitem gravioribus multandum esse supplicijs, ni carceris diuturnitas intercessisset; siquidem ad quinquennium censu & usu dignitatis exutus, & Centumcellas in Cœnobium Dominicanorum, ad voluntatem Pontificis relegatus, aliisque levioribus inflictiis pœnis, increpitus fuit. Interim dum Archiepiscopus sese ad iter accingit, quàm pressus animi tristitiâ, quàm ob enatos calculos dolore cruciatus, occubit, relicto Religiosis hominibus exemplo, Nunquam esse pijs doctisque hominibus aut indulgendum, aut fidendum nimiae fortunæ. Atque hic exitus fuit celeberrimæ causæ, quæ tres Romanos Pontifices exercuit, & Orbem terrarum primùm turbavit, deinde sollicitum habuit, demùm terruit. Sed neminem affectit magis ejus expectatio, quàm Hispanum Regem,

gem, qui de peracto iudicio certior factus à Gregorio, non potuit non suæ famæ gratulari, quæ laborabat opinione multorum, Garanzæ faventium, quasi specie pietatis, avaritiæ consulisset. Sed tanti pietas Regis supra invidiam erat; sensitque fructum liberalitatis Gregorij, qui Toletanæ Ecclesiæ proventus, vices centenis aureorum millibus constantes, citra impensas, maluit ei condonare, quàm repetere, cùm ad Sedem Apostolicam spectarent: insigni documento pontificiæ æquitatis, quæ non inhiat auro, dum crimina damnat.

CAP. XXXI.

*Hereticis iniqua meditantibus in
Conventu Ratisponensi
obsistit.*

PRincipes Germaniæ, qui Protestantium nomine reliquis anteire volebant, seu jactandæ potentiæ cupidi, seu ostentatione hæresis meliorem fortunam aucupaturi, quadam ambitionis impatienciâ incitati, proximè habitis comitijs ira-

irascabantur, quod triumphasse Catholici viderentur; ergo nova certamina moliti, Ratisponæ feliciora sibi pollicentur, gnari, Maximilianum egere auxilijs, quâ in Othomanum, quâ in Bathorium; adeoque expleturum arrogantia subjectorum vota; illud verò meditabantur non minus Reipublicæ, quàm Religioni perniciosum, ut Episcoporum, Canonicorum, & Ecclesiæ redditus, in patrimonia abirent familiarum nobilium quas interire nefas erat; Ita specie sustinendæ Nobilitatis, abrumpebant Ecclesiæ vires, ac potentiam. Comiti Palatino Septemviriis demandata est cura petitionis exponendæ, ut auctoritate principis laudaciam velarent: per cætus, per literas, & inania vulgi, Sedi Apostolicæ illudebatur: Sacerdotum opes, & vitia, pari ludibrio prædicebantur; benè omnia terrarum spolia, commoda, bona in Ecclesiæ sinum commigrasse: quid ultra Reliquis superesse, quàm videre, quid sit ultimum egestatis, ac ærumnæ: neque tantùm Sectarijs hæc indecora probabantur, sed Catholici seu metu anxij, seu cupiditate corrupti, ac
etiam

etiam pravâ prudentiâ imbuti, nequam adversabantur; sua quisque sperabat commoda, malebâtque sibi quàm Ecclesiæ consulere, vitio humanæ indolis, aurum & opes supra pietatem æstimantis. Hæc Sedis Apostolicæ, sacræque Gentis injuria commovit Gregorium, qui solidus cautè potius, quam per iram exarmare furias Improborum, necessarium censuit, disiectis hæreticorum viribus animisque, ad se pertractos consociare Catholicos; nihil opportunius concordiam adversus impetum hæresis: legavit ergo Ratisponam summa cum potestate Joannem Moronum, Purpuratorum antiquissimum, experientiâ rerum, & gratiâ, apud Cæsarem, aliosque Germaniæ Proceres florentem, eoque maximè hisce turbis, temporibusque componendis idoneum; jussitque Nuntios ad eum omnia, quæ in Germania agitabentur, deferre, ut agnitus rerum status consilium, remediumque suggereret. Neque fefellit Gregorij spem Moronus; qui statim solertiâ, sagacitatēque usus, mentem Cæsaris eò flexit, ut nihil de Religione novum statui sineret; Præ-

terea

terea Catholicis persuasit, ut ardentius, arctiusque agerent, ostentarent vires ac potentiam, nec cederent, se palam contestarentur, se de Conventu discessuros, si quid Maximilianus Catholicæ Religioni incommodum Hæreticis attribueret. Ergo Cæsar Catholicos magis, quàm Sectarios veritus, constanter depulit, quæ scelestè Sectarij moliebantur; neque tamen inde necessarijs pecuniæ adminiculis fraudatus fuit; quæ negare nemo ausus est, quia' pari omnes auctoritate, egere potius Maximiliani gratiâ, quàm minas intentare posse, videbantur. Tantùm potuit solertia Moroni, ad conspirantia hæreticorum studia infringenda; Adiuvit quoque rem suspicio Saxonis, & Brandenburgici, qui cùm essent Lutherianæ sectæ addicti, Calviniano furori invidabant, reclamabátque, metuentes, ne Lutherum Calvinus abdicaret. Sic divisa Hæreticorum mens, Catholicæ Religioni serviebat, consilio Providentiæ, quæ suis Hæresim telis conficit; docétque, facile casuram Sectariorum molem, si Catholici non dissiderent.

C A P. XXXII.

Coloniensis Ecclesiæ famam statumque tuetur.

Comes Salentinus cum invitatus ad Coloniensis Ecclesiæ principatum elatus fuisset, post plures in ea dignitate militari habitu gestos annos, Religionis Catholicæ studio, & æquitatis servandæ amore, gratus omnibus & conspicuus, tandem animum appulit ad uxorem ducendam, non illecebrâ matrimonij, sed familiæ tuendæ propagandæque ad posteros cura; Jamque Romam pergebat, ut impetratâ à Gregorio deferendæ dignitatis facultate, connubium ab infamia, sermonumque licentiâ vindicaret; Sed Venetias attingens, rogatus à Maximiliano est, ut Ratisponam se conferret, Cætuque Principum interesset, cui obsecutus, & interfuit Conventui, & Religioni Catholicæ pro dignitate favit, profuitque. Interim hominem qui erat ei à consilijs, Romam destinavit ad Pontificem, qui graviter accepit, deseri eam dignitatem: sanctius esse

esse Archiepiscopi nomen, quàm ut traduceretur ad Conjugij spem, sed quia Comes mollioris genij erat, ac offensionibus obnoxii, ne abalienaret à Sede Apostolica piam alioqui ac optimè merentem ejus voluntatem, per Nuntios, & Cæsarem, conatus est eum ab incepto abstergere: agnosceret, se Imperi Principem, ac Septemvirem: sederet in altissimæ scena dignitatis, cui præcipua Terrarum capita inviderent: posse familiam, genúsque Majorem per alios retineri: Cur ignobiliorem assumeret vitam, vel inglorius, vel ignotus alibi futurus? Meminisset tot jam annis percepta Ecclesiæ stipendia, è quibus contractum in reliquam ætatem serviendi onus: coerceret impetum novæ cupiditatis, quæ plerumque iniquo exitu expletur, sed cùm ille propositi tenax, nullam amaret cunctationem, atque (uti ferè agitantur, quicumque hoc æstu feruent) properaret impotenter ad capeffendas nuptias; Gregorius, gnarus, hujusmodi transitus novis rebus opportunos esse, suavit ei, ut Ernestum Bavarum Adiutorem adoptaret,

ret, scripsitque Portio Nuntio, ut Coloniā profectus Ernestum proveheret: si suapte sponte Archiepiscopus suo munere cederet, non spectare Canonicos, sed ad Pontificem, renunciare, quis locum ejus arriperet; liceret tamen Portio, consilium in tempore capere, ac rem agitare pro loci necessitate; Is minore discrimine ad Canonicos eligendi negotium detulit; ratus, metu & irā occupatos animos, non tam Sedi Apostolicæ, quàm ambitioni gratificaturos; neque displicuit Gregorio, qui oderat discordiam, pessimum reipublicæ venenum. Quatuor certabant, Austriacus Rodulphi frater, Antonius Argentorati Episcopus, Gebhardus qui successit, & Ernestus Bavarus. Rodolphus Cæsar, mortuo jam Maximiliano, fratrem extollebat; Sed comperto, Canonicos haud libenter Austriacis fascibus subiectum iri, studia in Ernestum Bavarum convertit; Antonius spe largitionum, aliisque artibus benevolentiam captabat, sed Hæreticis gratus, suspectus Catholicis; Gebhardus verò ingenii dexteritate, morumque lenitate.

gratio;

gratiosus, non festinavit ambitionem prodere: sed compertis aliorum difficultatibus, tardiùs reliquis innotuit, eoque efficacius: Ernestum denique commendabat non modò Cæsar, Hispanus, Saxo, Dux Cliviensis, Joannes Austriacus, aliique, ac præcipuè Albertus parens, qui causâ cadere, ignominiosum rebatur, sed etiam Gregorius, ratus ob familiæ pietatem, potentiâque, hisce temporibus illum per quàm utilem, sustulitque auctoritate Apostolicâ, minoris quàm par erat, ætatis, & si quod occurreret, aliarum rerum impedimentum. Ergo Ernestus dignitatis ac spei securus videbatur, sed repentè, quorundam arte, aliò conspirantibus suffragiis, electus est Gebhardus, non sine Alberti Bavari dolore, ac ira, qui seu fraudem comperisset, seu hominis ingenium nosset; testatus, Coloniae serpentem ali, Canonicorum electionem irritam volebat, & quamquam Gregorius æstimaret Alberti iudiciu, metûmque induisset, arcanâ præsagientis animi anxietate, tamen incitatus Altempsii Purpurati promissis, sperânsque fore, ut Gebhardus se

memorem beneficij, gratúmque præberet Pontifici, à quo dignitati admovebatur, & fidei Catholicæ servantissimum, ejus gratiâ ornabatur, Pontificia potestate eum humaniter approbavit. Sed non rarò spem eventus fallit; & callida fingendi ingenia vel prudentissimos decipiunt; quamquam non modo Gregorium sed universam Germaniam hic decepit: Nam tecta indoles amplitudine dignitatis plerumque fit deterior.

C A P. XXXIII.

Gebhardum deturbat è sede Coloniensis Ecclesia.

ITaque Gebhardus electus Archiepiscopus, & Septemvir Coloniensis, tam bene Catholici hominis ac religiosi Antistitis personam sustinuit, ut nuncupatus fuerit Germaniæ Borromæus, sed paulatim larvam deposuit. Antea utebatur consuetudine Agnetis Mansfeldiæ, nec pudicè nec rarò; utque accidit hujusmodi cupidine accensis, dignitas haud cohibuit consuetudinis illecebram, sed auxit majore flammâ simul & ignominiâ. Evulgata demum
pravi

pravi commercii fama , Agnetis fratres perculit , qui & hæresi & militiâ feroces , seriò Gebhardû monuêre , abstineret omnino sororis consuetudine , ne tandem eum pœniteret facti. Inde seu criminis excusatione, seu veritatis ex prompto arcano, innotuit, Gebhardum ante dignitatem spondidisse Agneti nuptias, quarum colore familiaritatem velabat, frustra increpante vulgo. Itaque Mansfeldij fratres Gebhardum acriùs urgent; nuptias celebraret, quarum spe sororem aluerat; unicum atrocioris famæ remedium hinc peti posse; neque Mansfeldiæ familiæ ingratum fore; Ille quâ metu ferocioris gentis, quâ amore blandientis fœminæ, quâ etiam spe plenus futurum, ut per Augustanum Conventum, Episcopis liceret Ecclesiâ simul, & uxore uti; certum constituit tempus ad deliberandum, seu potiùs ad maturandum scelus, quo adveniente, Colonienſis Ecclesiæ ærario expilato, ut haberet infamiæ dotem, sese clam civibus per fugam subtraxit, nuptiisque cum Agnete contractis, sacrilego thoro pretium fecit, ac fidem, proscriptâ per Edi-

etum religione Catholicâ , adprobatâ
Confessione Augustanâ , & advocatâ ope
Casimiri Palatini, Lantgravii Hassiæ, alio-
rûmque Dynastarum A catholicorum ,
quorum è nuda consilióque pependit,
insigni nequitia & infelicitate. Porro
Gregorius hæc audiens , intimè cruciatus
animo fuit , infando exemplo periculosa
Ecclesiæ tempora conturbari : digressum
paulò antè voluntarii , sed liciti connubii
specie , ex Ecclesiæ Colonienfis sinu Sa-
lentinum , nunc impuro ausu , ex ejusdem
Ecclesiæ gremio , ad prophanas veritâsque
nuptias properâsse Gebhardum. Quid
Hæretici non cogitarent , si hæc Catholici
molirentur ? an vi coërcendus tanti sce-
leris patrator ? Sed armis , provincijs , ani-
misque adesse Germaniæ plures Princi-
pes , qui ut hæresim , sic scelera protege-
rent ; armatam imminere tempestatem ,
ex qua Religionis & Germaniæ extrema
calamitas. An conniveret , & segni pa-
tientiâ extorqueret pænitentiam sacrilegæ
audaciæ ? verùm talibus flagitijs aut nul-
lam , aut seram adijci pænitentiam ; quis-
quis tam apertè ad nefas grassatur , velle,
pudore

pudore posthabito, contumaciâ inclarescere: libidinem ejus genij esse, ut nunquam resipiscat, habeâtque pro novissima fortuna implacabilem libidinis amorem: frustra expectari, ubi è mora nullum remedium. Ergo minimè cunctandum ratus, Minutium, qui erat à secretis Bartholomei Portij Nuntij, misit eò cum Pontificijs mandatis: adiret nomine Pontificis Archiepiscopum Trevirenses, rogaretque, ut aspectu suo, ac reverentiâ similis dignitatis Gebhardum à scelere abduceret, revocaretque in sinum Ecclesiæ: interdum frigescente flagitij calore, posse incendium imminens restingui; sed ille seu periculi metu, seu difficultate rei conterritus, missis ad Gebhardum Gregorij literis, maluit subterfugere periculum, quàm experiri hominis audaciam, propiùs accedendo. Minutius autem ubi allocutus Trevirenses fuit, ejusque metum didicit, Coloniam se contulit, ibique Ducem Bipontinum, & Henricum à Saxonia, cum Protestantium legatis reperit, qui occasionem hæresis propagandæ nacti, & gnari, orbatam

Antistite, ac pessimo exemplo commotam Urbem, haud difficulter ad novas res incitari, vehementer Senatum Coloniensem promissis, minis, prece sollicitabant, ad arripiendam libertatem, quam vocant, Conscientiæ, vel certè ad aliquod Templum Hæreticis, ac æmulis Catholicorum attribuendum; unde ingens, & extremum Religionis excidium; nam Hæresis more veneni serpit, inficitque reliquum corpus, si particulæ inhæserit. Mox inspectâ tristiori Urbis imagine, confusâ plebe, incerto Senatu, Bonis trepidantibus, Malis per ludibria terrorémque insultantibus, uti erat ingenio atque arte ad prudentiam eloquentiámque paratus, publicè Senatum compellavit; redditisque Gregorij literis, magnificè Colonienfium Civium in Catholica Religione colenda tuendâque constantiam laudavit; ne sinerent inviolatam erroribus Urbem, & virginali quadam pietate præditam corrumpi, haud sine risu hæreticorum, quorum insidijs minisque terreri, ineptum; expugnari, miserrimum: præstò esse, ac sub aspectum, tot Germaniæ, Galliæque

Urbes,

Urbes, provincias, ditiones, hoc turbine semel afflatas, semper prolapsas: sequerentur mores & animos Majorum, quorum imagines & genus retinebant: fiderent Gregorio Pontifici, cui amor & curæ erat Coloniae felicitas: nihil ab eo prætermissum iri, quo & mala propelleret, & optata remedia afferret: experirentur ejus benevolentiam, aliquid efflagitando. Gratissimis auribus excepta fuit Minutij oratio, præsertim ostentatâ Gregorij benevolentia; quæ non per inania verborum, sed per opera & beneficia jam Germaniæ innotescebat; Senatûsque gratijs Gregorio actis, duo censuit esse ab eo deprecanda, quibus Urbis tuendæ, firmandæque Religionis spes nitebatur, ut Sacerdotum vita componeretur, & Academiae studia foverentur, penè languentia; Et promissâ Gregorij ope, Minutius tantum erexit omnium animos, ut non modò nihil in Urbem pravi moris accesserit, sed Bipontinus ejusque clientes odio fuerint, ac injuriæ obnoxij, plebè adversus eos concitatâ. quod sane factum præclaram Urbis pietatem testatur, quæ

rumpuntur, cùm quid inconsultiùs aut præstiteris, aut omiseris.

Verùm altissimæ prudentiæ majus documentum prodidit, quo rem difficultatibus perplexam facilè, felicitérque confecit; monito per Henricum Gallorum Regem, fratre Francisko Valesio, ne Gebhardo ex Belgio faveret; rogato Philippo Hispaniæ Rege, ut Alexandri Farnesij copias in Belgio decertantes, ad præsidia Coloniensis Ecclesiæ, immitteret: extimulato Cæsare, aliisque Catholicis Principibus, ut quas possent eidem suppetias ferrent; aliud paravit munimentum, penitus Gebhardo adversum, & necessarium Catholicæ causæ; quippe animadvertens validiori fulcimento Coloniæ res egere, suasit Ernesto Bavaro ut eò se conferret, Ecclesiæque Coloniensi adesset auxilio, & imperio. Ita opposita Ernesti potentia Gebhardum fregit; Igitur Franciscum Oranum Romanæ Rotæ XIIvirum, (quem ad Austriacum destinabat, ut acta publica adversus Apostatam Antistitem ritè conficeret) misit ad Guilielmum Bavarum, pietate ac studio rei


Catholicæ insignem, quò pelliceret Ernestum fratrem ad Coloniam petendam, eamque aspectu & subsidio recreandam. Atque hoc etiam pertinet ad prudentiam Gregorij, non ad Albertum confugientis, fortasse adhuc Coloniensibus iratum, ob neglectum filium. Nitebatur contra Ernestus, repulsæ memor, & conscius periculorum; olim debuisse Antistitem se nominari; Cur in tanta rerum clade adscisceretur, certus malorum? metuendum sibi potius, quàm sperandum, inclinatis aliò animis Civium: manere adhuc veteris injuriæ vestigia. quid, si denuò repelleretur? certè ægrè recipi, semel exclusum. Sed hortatu Gulielmi, ac etiam præcibus Parentis Alberti, religiosissimi Principis, qui privatæ injuriæ publica Religionis commoda ante ponebat, nec non auctoritate Gregorij, & Philippi Hispani, id ipsum efflagitantis permotus, ac insuper confirmatus literis Minutij, seriò sanctèque testantis, ipsum Coloniam & amari, & optari, in iter se dedit, Coloniàmque pervenit mutatâ vestis specie, vitans mortis pericula, hæreticis ubique
per

per insidias & ferociam adversa struentibus; siquidem agitatâ rumoribus legationis famâ, Joannes Casimirus Palatinus, Gebhardi fautor, non erubuit, per summum scelus Principe indignum, Austriaco legato, ejusque comitibus Malaspinae ac Bonhomio necem moliri, non occultis tantum, sed apertis dolis. Ergo nihil audente Legato, ne iram Protestantium subiret, coactus est Malaspina Coloniam proficisci, alio habitu, quo insidias & arma Casimiri eluderet, ignotus ore, vitæ securus. Interim Coloniae turbæ oriuntur, ambitione quorundam dignitati inhiantium, & cùm Salentinus Comes ac Federicus Saxo arma adversus Gebhardum cepissent, Nonnulli, ut invidiam Gregorio conciliarent, quasi extolenti Austriacam potentiam, quæ uti summa, ita timori erat, jactitare vulgò cœperunt: hæc à Salentino parari, ut placeret Gregorio, qui tacita destinatione Andream Austriacum ad Gebhardi locum vocabat, specie legati, sed potestate Antistitis; At falsa innox vanescunt. Minutius enim hæc seri cœpta statim compressit, expo-

sito Gregorij sincero studio, cujus pretium aliud non erat, quàm Civium salus, & brevì palàm fore, quò tenderet sincera Pontificis voluntas, redditâ Urbi suâ formâ; Demum omnia quievêre adventu Ernesti, qui benignus alloquio, promptus ingenio, solers opere, traxit Cives in amorem sui, & spem publicæ securitatis. Non tamen quiescebat Gebhardus, sed magis insolescens, sumptâ hæretici hominis personâ, imploratis Germanorum, Anglorum, ac etiam Gallorum auxilijs, lectâ Belli sede propè Coloniam, arma & metum intentabat. Itaque Gregorius statuit contumaciam plectere, ut esset ultionis exemplum, qui nolebat esse pudoris: advocatôque Purpuratorum Senatu, rogatisque sententijs, & usus Apostolicæ severitatis fulmine, Gebhardum Colonix Archiepiscopum, Romani Imperij Septemvirum, ad impuras nuptias repudiâtâ Ecclesiæ Catholicæ consuetudine, atque ad Hæreticorum opem & placita aberrantem, nec facti pœnitentem, sacrâ omni dignitate spoliavit, privatûmque societate Catholicorum, de Ecclesiæ sinu, & gradu movit.

movit. Mox de exuto dignitate Gebhardo, Pontificias literas exaravit ad Colonienſes; hortatus Canonicos, ut quamprimum ad novi Antiftitis comitia accederent, miſitque jacti anathematis exemplar ad Minutium, adjectâ vi plurimâ pecuniâ, quâ pro rerum eventu uteretur, ac præterea Ernestum Bavarum impedimentis abſolvit, quibus vetabatur, ob aliarum Eccleſiarum adminiſtrationem, Colonienſem Infulam accipere. Vt autem famæ Auſtriaci legati conſuleret, cujus ope, conſilioque res conficienda erat; reddito diplomate, permiſit, ut ire Coloniam ſi abnueret, mitteret Bonhomium Nuntium, qui demum eò cum literis Pontificijs miſſus, inſtitutâ ſolemni ſupplicatione, promulgatâ in Gebhardum Pontificiâ ſententiâ, ejus Clientibus exauſtoratis, indixit Comitia, & ſimul quadraginta horarum preces in Templo Societatis Jeſu; ac ſuperis mortalibusque grato ſucceſſu dum hæc conficiuntur; illa quoque abſolvuntur, electo Ernſto Bavaro Coloniz Antiftite, qui & munimento & ſolatio rebus tam triſtibus fuit. Ac-

cessit ipse Minutiũs primũ ad Gregorium, deinde ad Philippum Hispaniæ Regem, & bene gestæ rei nuntius, & flagitaturus suppetias adversus Gebhardum arma parantem; Gregorius autem approbatâ statim Ernesti electione, missisque ei sexaginta aureorum millibus, ac promissis alijs quadraginta millibus, animos addidit ac vires, adversum Sectarios, qui diu pugnâre pro Gebhardo, sed victi demum ac fracti didicere, sumpta adversum Pios arma nec speciola esse, nec utilia. Na Gregorius Protestantium conspirantem frementemque impetum profligavit, eorum votis conatibusque Romanum Imperium eripuit, Sedis Apostolicæ majestatem, ac robur Pontificiæ potestatis sustinuit, auctâ Religionis famâ, & incusso Sectarijs, pravisque Principibus terrore, Veterum, Sanctiorumque Pontificum constantiam æquavit, & suam prudentiam armis consiliisque invictam approbavit.



C A P. XXXIV.

Rodulphum Cæsarem ad Obedientiam præstandam sollicitat.

AUstriacus Rodolphus, Rex Romanorum designatus, Romam se missurum Legatos, qui obedientiam de more testificarentur, sæpius promiserat, distuleratque, incertum quâ causâ; extincto demum Maximiliano Imperatori succedens omnium opinione, consuetudine ac officio functurus censebatur; sed moras necebat; suspensâ Romanâ Aulâ, quæ malè interpretata diuturnam Cæsaris cunctationem, sentiebat, haud posse à Pontifice in Cæsarem publicæ benevolentiae argumenta exhiberi, sine jactura pontificiæ dignitatis, cui decus & reverentia ex Catholicorum Principum, ac præsertim Cæsaris, obedientiâ. Attamen Gregorius, qui omnia ad pacem concordiamque referebat, & sanctiori prudentiâ res Generis humani metiebatur, non minùs consilio, quàm dignitate reliquos mortales

mortales anteire solitus, non certare cum Cæsare, sed vincere Cæsarem voluit, destinatus ad eum Annibale de Capua, postea Archiepiscopo Neapolitano, qui nomine Pontificis & solatia doloris deferret, mortuo Parente, ac officia gratulationis, quod potitus Cæsareo solio fuisset absque turbis, & invidiâ æmulorum; Ad hæc eum commoneret, ut Catholicæ fidei propugnandæ, augendæque instaret: memor esset Imperatoriæ, ac Austriacæ pietatis: cum Polono quiete ac amicè ageret, ne ludibria bellorum experiretur, nemini magis vitanda, quàm Cæsari, quem plerique id temporis attritum vellent, infirmumque viribus, ut sublato Imperij Romani metu, singulorum fortuna intumesceret. Hâc ergo Gregorij humanitate allectus Rodolphus, ut facilè commoveretur animi Principum, agnitâ Pontificis benevolentiam, præter ordinarium ac Romæ immorantem legatum, duos extraordinem ad Gregorium legavit, Philippum Flochum Imperij Principem, & Joannem Tonnerum, ejus olim præceptorem. Sed huic quoque legationi sua intervenit mora;

ra, ea præsertim de causa, quòd legati non attulissent Decretum de Rodulpho electo Romanorum Rege jam sancitum, nec formulam solemnem sacramenti, quo Ratisponæ is Ecclesiæ Romanæ se devinxerat. Et quamquam legatos ad oscula pedum, privatúmque colloquium admisit, amantis potiùs, quàm dominantis Pontificis specie, haud unquam tamen adduci potuit, ut publicè eos exciperet, nisi veteri consuetudini Cæsar consentiret; Ne tamen deterrimi quique (uti accidit in aulis) discordias sererent, ac certamina, quasi tuentes jura Principum, ortaque inter Cæsarem, Pontificémque simultate, infensior esset Apostolicæ Sedi Germania, latinis literis suâ manu perscriptis, Rodolphum est hortatus, ad Sedem Apostolicam religiosè venerandam, ne si Christi Sedem fraudaret honore, Cæsaris solium desereretur à Deo; contemptu Romanæ Ecclesiæ, non stare, sed cadere Romanum Imperium; quibus literis perlectis Cæsar, & Decreti verba Romam misit, ac se Obedientissimum Ecclesiæ filium professus est, placato Gre-

gorio,

gorio, qui retinens veteris moris & dignitatis, etsi alia desiderabat, tamen ne publicum gaudium, cujus mora odiosa est, retardaret; electum à Septemviris approbavit Ecclesiæ Imperatorem, audiit publicè ac per majestatem legatos, eosque remisit cum muneribus ad Cæsarem, cui semper favit quòd Catholicos homines, ritusque fovebat: quippe hoc rebatur, esse Cæsaris, non tam fines imperij, quam Ecclesiæ mores tueri.

CAP. XXXV.

Ad Angliam liberandam fortiter incumbit.

A Nimadverterat Gregorius, Elisabethæ Anglorum Reginæ artibus, Christianum Orbem turbari, Galliam seditionibus, tumultibus Belgium, Germaniam dissensionibus, cunctas fere provincias hæresibus ac ruinis oppleri, adeoque nihil posse Catholicos Principes moliri, pressos intestinis discordijs, ac externis bellis, quæ ferebantur ope, astuque Elisabethæ, sibi timentis, & ne timeret, omnium dominatione-

minationem conturbantis, quamquam sagacitate animi dum lædebat consilijs, verbis blandiebatur, ac præsertim Hispano, qui harum artium minimè ignarus, dissimulare malebat, ne ludibrio esset: irâ in tempus dilatâ. Itaque Philippum incitat: necessariam in Anglos expéditionem adornaret: sic Belgio consultum tri, hoste vel sublato, vel depresso; sic Hispaniæ præsidium parari, ac Religioni: sic errantes, afflictosque Catholicos in Anglia futuros incolumes: &, quod intererat ad gloriam famamque, sic palàm fore, haud impunè Hispano illudi. Neque Philippus abnuìt, arcanâ indignatione Reginæ infensus; sed ne Hispanæ potentiæ æmulos nova expeditio in suspicionem, & ex suspicionem in sædus ageret, cupere, ut Sedis Apostolicæ nomine, sub Pontificijs signis bellum, tanquam adversus Religionis hostem gereretur: semilitem & pecuniam suppeditaturum. Joannes Austriacus rei gerendæ præfici-tur: Gulielmus Alanus & Franciscus Inglefridus in Belgium mittuntur; explorarent animos, Angliam, & Hiberniam, ad
arma

arma pro avitâ Religione capienda, si fortuna adesset, concitent. Nicolaus Sanderus in Hispania consisteret, & cum Ormaneto, Pontificio Nuntio, Philippum instrueret: decretæ, ac evulgatæ à Pio V. pœnæ in Elisabetham, rursus statuerentur: educeretur è carcere Maria Stuarta, & nuberet Joanni Austriaco: sic jure posse Regnum repeti, ac invadi, nisi redderetur: vel certè Comitis Utintonij frater ad Regni sceptrum adscisceretur: aliâque etiam in deliberationem venêre, quæ confecta Rempublicam Christianam gravibus ærumnis exemissent. Sed Hispani, classe dilatâ in extremam anni partem, uti navigationi, ac victoriæ opportunior, Ormaneto & Anglis frustra reclamantibus, aliò distrahere vires adacti sunt; quippe novas res in Africa agitavêre Mauri, unde metus Hispanis: præterea in Belgio pecuniâ deficiente, plura evenêre tristia, quæ impulêre Philippum, ad sua potiùs tutanda, quàm aliena aggradienda. Atque ita clarissima & penè necessaria expeditio quàm avide tentata, tam ingloriè evanuit. Neque Gregorius pro-

proposito destitit, aut irâ aut dolore anxius; sed Providentiæ innixus, quæ omnia in sapientiam vertit, illud tantummodo indoluit, non rediturum tempus victoriæ, quæ modò prona erat; nam quamvis postea potentiore classe Angliam Hispanus invaserit, tamen conatus ex vano fuit, classe miserandum in modum disjectâ; neque enim fortuna semper favet; sed antequam vim Gregorius adversus Elisabetham pararet, benevolentiam intenderat, à qua auspiciati Pontifices solent, debentque; nimirum audito, Elisabetham, ob suppetias Rupellanis adversus Gallum latas, Gallicæ ultionis tela formidantem, cum Albano Duce Belgij Moderatore, ac Hispanis, de negotiorum commercio ac pace convenisse, benignè clementerque per Regem Hispaniæ monuit, ut Ecclesiæ se redderet; læta omnia speraret; salvâ, & auctâ regni potentiâ pietatem coleret: ipsos quoque Reges Religione discerni. Sed illa hæresim & licentiam reputans instrumenta potentiae, impleverat animum cupidine ac imagine majestatis, ut sola regnaret, sine Deo ac Ecclesiâ.

CAP. XXXVI.

Scotiam, ejûsque Regem, Hæreticorum potestati eripere tentat.

TAnta autem exarsit libidine regnandi hæc fœmina, ut non modò in Anglos Catholicos bacchata fuerit, tanquam Majestatis hostes; sed Mariam Scotiæ Reginam Catholicam, ut æmulam oderit, captamque per fraudem ac dolum in carcerem detruserit, abominando posteris scelere; utque spem successionis probæ Catholicis eriperet, sagaciter simul ac impiè studuit, Jacobum Mariæ filium, qui destinabatur hæres tam Scotiæ, quàm Angliæ, & Hiberniæ, imbuere Calvinii erroribus, nam pueritiâ corruptâ seritur in omnem vitam impietas. At Gregorius de hoc Elisabethæ scelere monitus, ab Jacobo Betonio Archiepiscopo Glasquensî, contrà niti, ut Jacobum puerum ex Hæreticorum manibus artibusque in Catholicorum sinum deportaret. Itaque ad Carolum Lotharingum Mariæ avunculum,

culum, hac de re literas dedit tam studiosè,
ut illi non solùm necessaria sponderit
pecuniæ subsidia, sed adfirmaverit, obla-
turum se universum Sedis Apostolicæ
patrimonium, quò constaret, Regnorum
salutem, pretium esse censûs Apostolici.
Neque repugnavit Lotharingus, neque
abnuït Carolus Galliæ Rex, qui gloriæ
sibi ducebat, Regium puerum alere in
Gallia. Sed occumbente Carolo, &
paulò post Lotharingo, quamvis multa
tentârît Gregorius, deferri aliò puer non
potuit. Interim Elisabetha, ut puerilem
Jacobi indolem altiùs incitaret ad hære-
sim, odiùmq; Catholicorum Principum,
admovit ejus consuetudini viros callidos,
quorum lenocinijs, verbisque delinitus,
de Religione, deque Principibus Catho-
licis malè sentire cæpit, pronâ semper ad
praviora documenta pueritiâ. Quod ubi
accepit Maria ejus Mater, cui non tam
Regni, quàm prolis jactura dolori erat, in
ipso carcere retinens majestatis, & soler-
tiæ, arcessivit è Gallia Obignium, virum
& sincerè Catholicum, & Principi con-
sanguineum, qui eum ad sese paulatim
per-

pertraxit, indole agnitâ & sagaciter flexâ. Sed versus erat Scotiæ status, nam plerique nobiles non tam principem volebant, quàm Principis nomen, ut quò Rex debiliior, validior nobilitas esset; Plebs etiam hæresi jam licentiæque assueta; vergebat ad deteriora seditionum; Et in primis Præconum Calvinianorum impudens vox subvertit vulgus, ut nemo non timeret, promiscuâ ignaviâ & formidine, ideòque Obignius & Catholici cautè potiùs, quàm acriter agere. Hæc Gregorius cùm haussisset auribus, & gnarus, difficiliorem esse Principum educationem, quò magis ætate adolescunt, ut ingesta Regio puero pravitatis semina aboleret, ac ruenti Scotiæ occurreret, Archiepiscopo Glasquensi significavit, sibi haud placere Regis discessum: fortasse Regni rationibus expedire, si Rex Scotiam aspectu suo contineret: verendum, ne Rege absente Scotia in deterius iret, ac extuto pudore omnino à Religione ac Rege descisceret; regiæ pueritiæ provisum iri, adjuncto viro & pio, & prudenti, qui teneram mentem imbueret constantibus documentis: investigarent
liberan-

liberandæ Scotiæ adjumenta; senunquam
ope ac auctoritate defuturum. Gestire læ-
titiâ Obignius, per cepta tum Gregorij,
tum Philippi voluntate; statimque rescri-
psit: Haud aliter, quàm armis, posse in
Scotio Fidem Catholicam restitui, & in-
valuisse Hæreticorum furorem, qui non
nisi vi & bello cohibetur; Catholicos
promptissimos fore ad rem & vitam pro-
fundendam: Et quid feliciùs aut glorio-
siùs, quàm pro Religione ac Deo cadere?
Mox accitis Huntleiæ Comite, & Seto-
nio, cujus sistum Gregorius educari in
Romano Seminario jusserat; expositis-
que Gregorij mandatis, eos Luteriam mi-
sit, ubi re deliberatâ cum Nuntio Pontifi-
cio, Alano, Archiepiscopo Glasquensi, &
Francisco Guisio Mariæ Stuartæ Sobrino,
id consilij conceperunt: Guisius in Sco-
tiam trajceret cum copijs: Hiberniæ in-
colæ Catholici foverentur: demum uni-
versa exercitûs vis in Angliam incumberet:
à Scotia tamen auspicandum, quæ pro-
prior & promptior fausto successui; sed ce-
leritate victoriam niti: morâ omnia eva-
nescere. Iamque expeditio conficienda

I erat,

erat, cùm repentinè orto de pecuniâ expeditioni necessariâ certamine, quartam sumptuum partem offerente Gregorio, nec reliquos in se sumptus recipiente Hispano, abiit occasio asserendæ Scotiæ; quippe vulgatâ horum consiliorum famâ, Elisabetha ex improvîso delegit homines, qui Regem è venatu redeuntem, imparatum, destitutûmque militum præsidio, per vim caperent; captûmque in arcem coniecêre, specie liberum, re vera captivum. Agnovit mox Gregorius moræ damnum, quod inculari potuit, reparari non potuit. Aliâ tamen viâ aggressus est abducto Principi consulere, Gallorum Rege Henrico exorato, ut Scotiæ, ejûsque principis patrociniûm susciperet; intelligeret Elisabethæ artes: everteret fraudes, quæ vicinioribus regnis cladem minabantur: non expedire Gallicis rebus, tantam ejus vim & potentiam. At Obignius Principis casu, & magis inconstantia trîstis, insidiis&que hæreticorum appetitus, in Galliam secessit, concessitque paulò post vitâ, vir nobilitate clarus, sed clarior prudentiâ & Pietate, quo extincto spes Scotiæ omnis cecidit.

cecidit. Inter hæc Henricus instante Gregorio, Meneviliū & humanæ & sacræ literaturæ scientissimum, ad Principem misit, ut ejus animum pertentaret allicerétque ad meliorem, dignamque Rege fortunam, quod sanè Menevilius præstitit, sed cūm haud liceret Catholicos mores, ritūsque usurpare, neque Pueri mens fortiter constaret, in Galliam redijt, ne suæ aut pietatis aut famæ suspectus esset, dum alienæ frustra consulit. Atque ita in sinu hæresis conquievit, contabuitque optimæ spei Princeps, Catholicâ stirpe ortus. Unde Catholici & Guisus rem armis omnino aggrediendam censuerunt, ne gloriaretur Elisabetha fraudibus, illuderétque Orbi Christiano; quod cūm Gregorio significâssent, atque hic Philip-pum ad arma sollicitasset, respondit is, se favere Gregorij studio, sed vereri, ne Catholicorum armis ad Principem hæresi jam aspersum, abducendum immissis, Elisabetha magis in Catholicos insaniret, odio & ultione: Prius ab hæresi abduceretur Rex, quàm à Regni carcere, neque se abnuere deliberata, sed impedimenta

sublaturum, immò apparaturum ea, quæ expeditioni necessaria. Hæc Philippi dicta cum perlata essent, se quoque vereri, inquit Gregorius, ne deperditâ occasione, irritus conatus futurus esset: plurima posse intervenire, quæ non modò rei obtinendæ fortunam, sed spem eriperent; utendum sorte, quæ obuia victoriam pollicetur. Neque ultrà repugnavit Philippo, ne argueret invitum, eoque offenderet, suæ contentus conscientiam charitatis, cui si Iacobus Rex accomodasset sese, in libertatem assertus, haud præclaram indolem corrupisset. Sed nescio quo fato, quæ meliora videntur Generis humani consilia, rarò perficiuntur.

C A P. XXXVII.

Hibernia vindicanda opem impendit.

NON abs re fuerit hic ea jungere, quæ ad Hiberniam pertinent, Angliæ principatui conjunctam. Inde Romam accesserat Iacobus Giraldinus, qui cupidus Patriæ ex Elisabethæ tyrannide vindicanda,

dæ, Gregorium rogarat, ut manum por-
rigeret: addictam Sedi Apostolicæ insu-
lam haud relinquendam ludibrijs hæreti-
corum, quibus omnis vis adversus Eccle-
siæ studiosos. Hominem Gregorius per
benigè accepit, ac Hispano Regi com-
mendatum, Ulyssiponem misit, ut ex illo
portus solueret in Hiberniam armatus;
& quamquam modica initia se præbe-
bant, statuerat, auctis auxilijs ea fovere,
rémque ad exitum perducere; Hispanus
autem Rex Gregorio gratificatus operâ
Ioannis Silvæ, quo: utebatur consiliorum
administro apud Lusitanum, navem in-
struxit Giraldino bellicis apparatus, non
tamen militibus idoneam, quos addere
minimè libuit, ne inhoresceret, ac invi-
diam conciret, nulli expeditioni utilem.
Hisce modicis viribus, ac insuper paucis
lectis militibus accinctus Giraldinus, in
Hiberniam enavigavit, sed antequam pa-
triâ potiretur arenâ, naufragio jactatus
fuit, ac mox Navi spoliatus à Naclero,
spe ac voto excidit. At Gregorius, qui
non successu bene cæpta metiebatut, co-
gnito Giraldini casu, alia paravit subsidia.

Degebat Romæ Thomas Stucleus Anglus, qui promptus linguâ, & aspectu decorus, olim in Hispaniam concesserat, ibique simulato Catholicæ Religionis amore Principum benevolentiam captaverat, ac præsertim Ioannis Austriaci, à quo Romam missus, eâdem arte Gregorium cepit: crebrò jacere de Anglicana expeditione sermones: insectari verbis illatas Catholicis injurias: miserari eorum fortunam: nihil prætermittere, quod fictæ pietati fidem apud Gregorium faceret. Itaque visus est Gregorio maximè idoneus huic expeditioni, ille annuit & jactantius suscepit. At mox simulationis manifestus fuit. Etenim non modò fama percrebuit, fuisse ab eo præmonitam. Elisabetham de expeditione, sed Lusitaniâ attingens, unde cum Giraldino in Hiberniam discedendum erat, Navim, quam acceperat à Gregorio, sexcentis militibus & immensâ bellicæ rei copiâ munitam, uti suam obtulit Sebastiano Lusitaniæ Regi. in Africam profecturo, qui militum peritiam admiratus, navim & milites cum Stucleo secum in Africam adduxit, ubi Stucleus meritis dedit

dedit simulationis pœnas, & à barbaris, quibus itæ, & à suis, quibus odio erat, cæsus. Sic miser illudit sibi, dum illudit Gregorio, qui reputans incerta mortalium, etsi gravissimè sentiret jacturam Italico-
rum militum, in Africa miserè pereuntium, tamen omnia posthabuit charitati, quæ loco præmij ac solatij est in rebus adversis; Itaque Iacobo Giraldino rem omnem gerendam mandavit adjunctis tribus è Franciscana familia comitibus, quorum prudentiâ adjuvaretur; neque is spem fefellit, namque in Hiberniam transgressus, mirantibus hostibus, nec obsistentibus, erexit palàm Vexillum Crucis, Catholicæ Religionis insigne; mox habitu Nautæ succinctus, ad validam Arcem accessit, accitumque Custodem ad dediti-
onem compulit; & occupata arce, alios in spem milites comparavit, pecuniâ, & novis ex Hispania viribus firmatus à Gregorio, jam successibus læto, & apertam expeditionem anhelante. Accessit quoque ad Iacobum, unâ cum Desmonix Comite Ioannes Giraldinus frater, & ipse famâ illustris ob fortiter fusos accisosque Anglos; Sed

fortuna invidit cæptis, Iacobo extincto, qui victor ad suos rediens, repentè glande petitus, piè constantérque cecidit. Vir sanè memorabilis, cui si primùm credita fuisset expeditionis cura, fortasse jam Hibernia in tuto esset. Hisce auditis Elisabetha, sibi timere, indignari suis, avaritiam, & ex avaritia ignaviam incusare; neque tamen audebant Nobiles arma pro Regina sumere; tanta erat vel Giraldinorum fama, vel in Elisabetham invidia. Insulæ demum Præfectus stimulatus ira Elisabethæ, suique nominis infamiâ, collecto exercitu castra movit in Ioannem Giraldinum, penes quem, Iacobo fratre sublato, vis erat Catholicorum. Pugnatum à Giraldino acriter, quamquam dum iusto audentior in castra Præfecti erumpit, non sine suorum damno repellitur, tamen auctus viribus, & audaciâ valentior, cecidit strenuè, in Anglos cladem, ac terrorem circumferens, oppidis quæ captis, quæ trepitantibus. Et sanè debellatum foret, si Gregorij conatibus aliorum auxilia respondissent: sed ferè corrumpuntur extrema victoriæ, dum necesse est alienâ ope pu-

pugnare, ac vincere, nam suis quisque rebus indendit.

CAP. XXXVIII.

Lusitaniae consulit.

Lusitania non minùs indole, quàm gloriâ rerum gestarum, commendat suos incolas Orbi terrarum, ac Religioni Christianæ, cujus jura in Indias transmisit navigatione Reipublicæ faustâ, & piâ, & hac de causa in primis amorem Gregorij meruit, qui non modo ad Barbaros Mahometis alumnos Africâ depellendos subsidia pecuniæ ex Ecclesiæ censu Regi supeditavit; sed conatus incommoda, & prava Regni exempla amovere, egregia pro Lusitanis præstitit: operam dedit, ut justitiæ utroque in foro fieret satis; Hebrææ legis occulti, Christumque mentiti sectatores coërcerentur, seu fœnore, pravisque lucris Rempublicam pessumdarent, aut simulatis natalibus Christianos deciperent: Rex, potestatem Episcoporum ne usurparet, ac Episcopi, Pontificis Romani vi-ces ne adsumerent: Censuræ & Ecclesiæ

pænæ veneratione, ac metui essent, quas idcirco è suggesto à Concionatoribus laudari iussit, tanquam divinæ fulmina ultionis, quæ magis feriunt, quò magis temnuntur. Sed potissimum industria Gregorij certavit in componenda Regni successione, quæ multorum Principum incitabat spem, & cum spe certamen animorum, Europâ sollicita, & cui faveret, incertâ. Itaque hoc primum apud se statuit, quòd Romano Pontifici, morum & factionum diversos homines, instar Iudicis, ac Parentis audienti, semper præstandum est; Nulli parti se adijcere, sed pari affectu approbare omnes: quæ pertinent ad religionem, sedulo curare: prophana negotia, nisi aut pietatis, aut reipublicæ damnum immineat, post se habere, ac infra majestatem Pontificis, cui major reverentia ex contemptu profanæ rei: nec raro evenire, ut dum transit in partes vel consultò, vel casu, partem dignitatis, ac famæ deperdat, quam augere in promptu erat, æquâ & rectâ in omnes voluntate, nam Parentem dicimus, cui erga filios omnes amor. Vitâ functo Eduardo, Regij sanguinis,

guinis, & ingenij Principe, ac Sebastiano Rege extra spem sobolis dominante, Ioannes Andreas Caligarius præpostero, ac intempestivo sedandi regni studio, seu aliâ causâ tactus, Gregorio exposuerat; Post Sebastianum ac Henricum fore nullam in Rege eligendo molestiam, si Antonio Gregorius faveret, qui offensus hoc dicto: Deum, inquit, sollicitâ prece obsecramus, ut extincto Principi beatitatem, superstiti autem Regi diuturnam ætatem impertiarur: cæterùm hæc studia sint eorum, ad quos pertinent; nostra enim haud esse modò debent. Ex quibus verbis conijcitur, quàm composita, & recti tenax fuerit hac in re Gregorio mens, quam apertius prodidit, cùm fatali cupiditate Africæ occupandæ Sebastianus accensus, Ludovicum Consalvium Societatis Iesu, ab aspectu, & gratiâ amovisset, ac negligeret Henricum, quòd uterque Africanam expeditionem, dissuaderet, plenam discriminis, & incertæ sortis: minore certè discrimine Africam, quàm Lusitaniam relinqui; Gregorius laudato Henrico, Sebastianum avertere ab huiusmodi ausis, ac domi re-

rinere contendit: periculosa plenum opus
alex, alienas oras aggredi: partos trium-
phos aliquando, vel dedecori, vel damno
fuisse, neque enim vincitur incruento præ-
lio, maximè apud Barbaros, quid si Reg-
num deferendum sit incerto successore,
turbis obnoxium, & in partes distractum:
haud sineret modicâ gloriæ aurâ vel se, vel
Regnum in tempestatem abripi, ac nau-
fragium. Contrâ ille: Pericula vitæ, ac
Regni, temnenda Regi, ut pietas propa-
getur; Magnum Christianæ Religioni in-
crementum ex Africa domita: velle se ire,
quò Religionis, & Numinis studium vo-
cabat; Et cur Majores haud imitaretur,
qui magnam, & abditam Asiæ partem
Christo subjecerant? Heroicum esse, pro
Deo vitam, & Regnum amittere; quam-
vis nec vitæ, nec Regno timeret, nam pia
consilia Deus approbat, adjuvatque. Sed
aliter Superis visum. Sebastianus in Afri-
ca cecidit, luctuosa Lusitaniæ clade, & in-
signi Principum documento. Sebastiano
igitur cæso, & conversis ad novas res
omnium animis, Gregorius in Lusita-
niam misit Alexandrum Frumentum, ut
nomine

nomine Pontificis adesset rebus Lusitanis, quas turbari, vel externis, vel intestinis artibus, haud arduum; reperitque Henricum coronâ susceptâ Regno initiatum; At ille Nuntium libenter haud excepit, quasi vel minimè necessarium, vel importunum Legati potestati, quâ ipse pollebat; sed monitus à Gregorio, non simul convenire Legato, & Regis auctoritati, Nuntium admisit, amavitque uti Gregorij & Sedis Apostolicæ administrum. Verùm ob incerta successionis, & dominatum Henrici jam senis, brevè transiturum, sollicitâ Lusitaniâ, conventusque trium Ordinum agitante, Gregorius seriò præcepit Frumento, abstinere prorsus negocijs publicis; perscriberet tamen ad se consilia, & inclinationes animorum, studia, vires & quidquid interveniret, non quod esset harum rerum cognoscendarum avidus, sed ut causâ ad ipsum delatâ, æquitati faveret, ac justitiæ cui non bene satisfi, nisi omnia nôris. Misit quoque Antonium Saulium, qui de Sebastiano mortuo Pontificium dolorem exponeret apud Henricum, quem etiam deterreret à nup-

nijis, quas ei seni effeto, Sacerdoti, ac Purpurato quidam suaserant; neque Gregorius, interrogatâ Peritorum conscientia, fas esse censebat, eas nuptias concedere, quæ pessimo exemplo Ecclesiæ obessent, & nullâ prole Lusitaniæ proderent: quæ enim sobolis spes nubente sene curis, & annis fesso? acquievitque Gregorio Henricus, & pietati maximè addictus, & abhorrens nuptiarum, ætate jam ad septimum supra sexagesimum annum provectâ, Saulioque discedenti dono dedit adamantem, quem Sebastianus Rex ferre sueverat, trium millium aureorum pretio insignem, ut magnitudine doni ostenderet quàm sibi grata, & utilis admonitio accidisset. Insuper Gregorio urgente, quædam abolevit, quæ videbantur Ecclesiæ immunitati adversa.

Interim lis fervere de successione, cui quatuor inhiabant: Antonius, quem supra memoravimus, Ranuntius Farnesius-Catharina Brigantina, & Philippus Hispaniæ Rex, & veritus Gregorius, ne per vim, & arma res ageretur, unde ingens Christiano Orbi calamitas, quâ literis
manu

manu suâ promptis, quâ legationibus seriò monere, ut pacatè per jus, & æquitatè fori res transigeretur. Henricus verò quâ senio, quâ sollicitudine, angustissque rerum fatigatus, in morbum mortèmq̃ue incidit; reliq̃tâ prudenter administrandi tuendique regni curâ quinque illustribus Viris, Georgio Almeida Archiepiscopo Ulyssiponenſi, Francisco Salæ, Ioanni Tello, Ioanni Mascharenæ, Didaco Loppio Sosæ. Hi ad Gregorium confugerunt, deprecati, ut juri, non bello litem ſucceſſionis crederet, quò tandem innotesceret hæres regni, nullius irâ & invidiâ, & Gregorius tum eorum precibus commotus, tum suapte sponte pacis tuendæ cupidus, legavit eò Alexandrum Riarium Bononiensem Purpuratum, scientiâ juris & negotiorum præcellentem, jussitque Regem Hispanum adire, viratâ morâ, per quam optima consilia vanescunt; sed impeditus itinerum difficultate, ac pestilentia, seriùs accessit, quàm debuerat. Hispanus autem rerum potitus, ad omnia firmandæ Lusitanix munimenta intendit; cùmque ei præfecisset Albertum Purpur-

puratum, & sororis filium, quò eum sublatâ omni controversiâ, Lusitani reverentiùs acciperent, poposcit à Gregorio, ut eâdem, qua Henricus fuerat ornatus, Legati dignitate Albertum cohonestaret, allatis rationibus, quibus haud Gregorius assentiebatur, ratus, discreta esse debere sacram & prophanam potestatem, & periculosum Ecclesiæ auctoritati, uni omnia, præsertim in novo Regno committere; tandem victus precibus per biennium repulsis, ac indulgens Philippi meritis, in Sedem Apostolicam, rem ad Senatum Purpuratorum retulit, expositis Regis rationibus, & commendatis Alberti moribus, quibus ornari quodammodo dignitas videbatur. At Senatus etsi propensionem Pontificis intelligeret, obstitit; Aulæ Romanæ paucas provincias, & minora lucra superesse; si Lusitaniæ hoc tribueretur, haud posse Poloniæ, Galliæ, Germaniæ denegari: neque simul coire Regis, ac Pontificis auctoritatem: At Gregorius certus, nec Regem offendere, nec Senatum, ad biennium hac dignitate Albertum duxit posse uti, adjectis tamen ei ex Aula Ro-

Romana, ut vocant Collectore, ac Datario, qui negotia & lucra cognoscerent; placuitque beneficium, & Senatui, quia breve; & Regi, quia concessum.

CAP. XXXIX.

Belgicis rebus sedandis studet.

Ioanne Austriaco Belgicis rebus imposito, ut salvâ Religione, paci prospiceret, timuit Gregorius, ne pacis nomen obesset Religioni, & quamquam spectata Joannis pietate, spei propior quàm metui erat, tamen adversus pericula minimè segnis, in Belgium misit Philippum Segam, qui solertiâ & fide par negotio erat; mandatorum summa fuit: caveret, ne quid sinceræ Fidei per pacis conditiones detraheretur: curaret, ut ad Ordinum Conventum proximè habendum, probatæ, non suspectæ pietatis homines accederent: Zelandia, & Hollandia, vel Catholicis moribus informarentur, vel armis premerentur; Antistites Apostolicæ Sedi obsequerentur; Ordines quam-
pri-

primum ad Pontificem Oratorem destinarent : demum apud Austriacum Britannicam expeditionem urgeret, non aperte, nè suspiciones, irasque aggereret, sed per abdita sermonum; verum antequàm Segæ adveniret, Pacis leges & ab Austriaco subcriptæ, & approbatæ consensu Theologorum Lovaniensium fuerant; quapropter nihil ausus tentare, ne quid glisceret novarum rerum, Fæderatorum animis suspensis potius, quàm compositis ad pacem, in ea se vertit, quibus Austriacum animaret, munitæque, exploratis Adversantium consilijs, & oblato ei quinquaginta millium aureorum subsidio, ex præscripto Gregorij, qui pecuniam adversus Britannos destinatam, in Belgij defensionem contulit. Certè dum cognovit, nihil secundùm vota Catholicorum petagi, & Orangium omnia moderantem, conjunctis cum Elisabetha, & Daniæ Rege viribus, obstare publicæ tranquillitati; à qua illis & hæresi metus: & præterea comperit admonitiones, literasque Pontificias, quas per Segam ad Ordines transmiserat, fuisse prompto verborum fa-

favore, ac specie quadam reverentiæ, sed nullâ morum, animorûmque inclinatione acceptas, non aliud censuit superesse componendo Belgio, quàm vim, & bellum; ageret seriò, constantérque Austriacus, & citò insolescentes vires opprimeret, & nunc instandum armis, dum Ordines alieno ære pressi, sejuncta in factiones nobilitas, agri cultore deserti, fessæ bello Provinciæ, & milites earum auxiliares aliò conversi; ac in primis Elisabetham oppugnandam, unde Belgis exitium. Atque ut id altiùs Hispano persuaderet, jussit eumdem Philippum Segam in Hispaniam proficisci, ut Ormaneti loco insisteret Regis auribus, consiliisque; nam quæ propiùs audiuntur, altiùs animo sedent. Paulò pòst rebus turbationibus, ac intremescente Fœderatorum audaciâ, quosdam delegit Purpuratos, inter quos Antonium Perenotium, & Madrutium, qui Belgij adjumenta cogitarent; deque eorum sententiâ alium statuit in Belgium ablegare, qui de Belgica quiete unâ cum designatis à Cæsare hominibus differeret, consilio satis prospero, sed fœde-

ratis

ratis ingrato. Verùm in expectatus rumor afflixit Gregorium ; attonitâ non minùs Europâ , quàm Româ ; Mathiam Archiducem , Rudolphi Cæsaris fratrem (stimulantibus Elisabethâ , & Orangio , qui Austriacam potentiam in partes , ac mutuas iras tractant , eoque debiliorem volebant) susceptâ Fæderatorum curâ , adversus Hispanum Regem , ac Joannem Austriacum , prælia , & discordiam moliri , Belgio præesse , ac favere armatum hostibus ; nec aberat suspicio Cæsaris , quasi dominatum ad Belgas invehentis : sed hic , se inscio , inconsultoque , hæc professus fieri , suspicione famam exemit ; At redeamus ad Gregorium , qui motu inopinio perculsus , abstinuit meditato , donec pateret , quem Hispanus Rex in hac rerum improvisa scena gestum faceret ; neque tamen Regem deseruit , sed interpellato precibus Numine , ea exhibuit amicitiae officia , tum apud Austriacos Germaniae Principes , tum apud Hispanos , quibus irarum causas extingueret , non foveret ; fortiterque institit Regi , ut sapienter , non ex ira ageret ; neu acrius in Matthiam insur-

geret :

geret: intercidente veniæ spe, intercidere pudorem: ad prudentiam pertinere, si nescio quid pertinere, si nescio quid permittas: ne cuncta amittas: aliquando, & fortasse modò conivendum. Post hæc Cæsar, conscio Philippo, quorum alter suspiciones, alter tumultus abolere cupiebat, suavitè Gregorio, ut rebus afferret per se qualecumque remedium; at is absque Cæsare nihil certus aggredi, primum solemnī supplicatione edictâ, propositâque mortalibus nozarum veniâ, more Jubilæi, ac fufis ipse ad Apostolorum sepulchra triduo precibus; divinam poposcit opem, quâ humanæ vertuntur res; deinde per silentium, & arcanum (nam tutum quidquid ignorum) allegavit ad Cæsarum Ludovicum Madrutiū utrique, tam Cæsari, quàm Regi charum, omisso tamen Legationis nomine, quasi Tridentinam Ecclesiam, & domestica inspecturum, ac sponte profectum. Ubi Madrutiū Cæsarem adiit, statutus est locus, nempe Colonia, in qua Pontifex, Cæsar, Hispaniæ Rex, ac Belgæ, per destinatos homines, collatō-
que

que consilio de rebus deliberarent, et si optabat Pontifex, ut Cæsar ipse adesset, ac Philippus Rex accederet propiùs, quò reverentiâ Majestatis præcluderet aditum difficultatibus, ac prælenriâ festinationem afferret. Pontifex ergo Ioannem Baptistam Castaneum designavit; Philippus Carolum Aragonium Terrænovæ Ducem, Cæsar vero Archiepiscopos Coloniensem, ac Trevirenses, Episcopum Herbipolitanum, & Theutonici Ordinis Moderatorem; addidit etiam Comitem Schwarzenburgum, aliòsque è Principis Cliviensis aula gratiores, quia Belgio vicini. At suos Belgæ homines miserunt ferriùs, quàm Orangij, & Isabellæ artibus impediti, quàm allekti promissis Francisci Valesij, qui à Casimiro Palatino, aliis que incitatus jactabat, sese ab Hispanis Belgas vindicaturum. Neque prætermisit Gregorius, vehementiores ejus spiritus cohibere, misso ad eum Fabio Mirto, monitis Henrico fratre Gallorum Rege, ejusque matre Catharina, impulsisque Venetis, ut Ioannis Michaëlis operâ Gallorum impetum retardarent, vel aliò converterent.

Cùm

Cùm ergo Nuncius Castaneus, Carolus Aragonius, aliique delegati homines Coloniae convenissent, habitâ ad superiores conciliandos supplicatione, in quâ medius inter Septemuiros Nuntius incessit, demum ad Consilia ventum est: sed statim patuit, Batavos nolle paci consentire, nam ea petebant, quæ & Religioni & prudentiæ adversabantur, ac in primis, ut quam quisque vellet sectam profiteretur, extra metum, publiè in majoribus Urbibus, privatim in reliquo Belgio: non aliter Belgio consultum iri, quàm concessâ promiscuæ Religionis libertate, quæ alibi permixta haud Belgis deneganda. At Nuntius, cui post Aragonium hæc suadere conabantur, audita validiùs repulit, quo sanctiorem sustinebat personam: Mala, & incommoda Belgarum, quibus tam atrociter dolebant, Religionis è contemptu oriri, & magis crescere, quò magis Religio contemnitur: publicæ felicitatis haud esse certius munimentum, quàm sinceræ Fidei Sacramentum: frustra ostentari Belgio remedia, nisi unicæ & Catholicæ quidem Religioni servia-

tur;

tur; adverterent clades Urbium populorumque ex eo profectas, quod impune fuerit interdum vagata Civium mens, ad prava & incerta sectarum: tangi Romanum Pontificem commiseratione jactatae gentis, cui subuenire paratus erat, sed allatis remedijs, non illatis gravioribus malis atque in hanc rem se destinatum: posse quidem ut graviora effugiantur, leviora quædam mala permitti; at nequaquam ea, quæ per se deterrima, obruunt demum extremâ clade populos: caverent ab oratio, cui dum obsequuntur, seipsos perdunt, ac posteritatem; sed obfirmatis libertatis imagine animis, nihil persuaderi potest; atque hoc arcano nitebatur Orangius; ut incensi perviciâ Ordinum Hispani, & reliqui, Cætum tandem dimitterent exclusa pacis spe, ac auctâ belli cupiditate; ideoque Ioannem Nassovium fratrem Coloniae jussit consistere, ut Ordinum delegatos adversum Catholicorum dicta muniret, tanquam potituros victoriâ, si persisterent petendo. Et sanè Orangij voto respondit eventus, nam datis conditionibus, & per querimoniam,

niam, ac injuriā rejectis ab Ordinibus, primum in Philippum, mox in Gregorium jactæ fuerē voces plenæ contumeliā; Philippum, in extrema devenisse, Gregorium assentiri Philippo, & Belgicæ genti ultionem suppliciumque intentare: nihil demum confici posse; neque Paci, neque Regi serviendum, nisi cujuscumque sectæ studia arbitrio relinquantur, ac genio; Quibus auditis, omnes tum Pontificis, tum Cæsaris, ac Regis violari majestatem censuerē; sed antequam cætus dimitteretur, ultimam clementiæ fortunam tentârunt, oblatis alijs conditionibus, per quas omnia concedebantur, præter Religionis libertatem; usquē adeò concordiam, & pacem omnes amabant; sed his etiam per arrogantiam, impudentiāque ab hoste repudiatis, ne inita pro quiete consilia gliscerent in semina discordiarum; cætu tandem soluto unusquisque ad sua rediit, non sine ingenti Gregorij dolore, qui pacatum Belgium optabat, ut inde Hæreticos, Barbarosque premeret, adjutus Philippi Regis ope, quæ id temporis summa erat. nisi Belgij tumultibus distracta fuisset,

Tantum interest ad Christianæ Religio-
nis dignitatem, ac incrementum, nullam
quati, turbarique Provinciam. Recrea-
vit tamen animum Gregorius spe, cognitis
præclaris rebus ab Alexandro Farnesio
gestis, cui gratulatus, honoris & virtutis
ergo, ensen ac pileum Imperatorium
dono misit, ut essent non minùs Pontifi-
ciæ monumenta benevolentiae, quàm
Farnesiae munimenta fortitudinis.

XL.

*Dissensiones, ac iras Principum
tollit.*

PRæter gravissima Bellorum incendia,
quibus restinguendis Gregorius, sese
impendit, plures exarsere veluti flammæ,
quæ in tempore non compressæ, accensuræ
videbantur discordias si non æternas, certè
luctuosas; & hanc præcipuam Gregorij
laudem censuerim, demere fomenta inju-
rijs, lenire iras, omnium commoda inter-
pretari, nec alio quàm æqui respectu duci;
& hac de causa confidenter Gregorij o-
pem miserrimus quisque advocabat, nec
aude-

audebant Potentiorum animi adversus debiliores insolescere, gnari, Gregorium esse Generis humani Rectorem, qui nec gratiâ, nec vi flecteretur, sed justitiæ consulere, è qua oritur concordia. Et ne prolixâ narratione, uti assolet, fastidium gignatur, paucis plura hujus rei documenta complectar; etsi alia quædam initio Pontificatûs retulerim. Primum quia nemo alienas turbas peritè sedat, qui suas amat; illud cavit accuratè Gregorius, ne ulli mortalium irasceretur sui causâ; dissimulare acceptas injurias, condonare damna, frangere dissensionum vires, non æmulari diversis studijs, oblivisci offensarum, abstinere malefactis, ac omnem denique motum cujuscumque sive ultionis, sive abalienationis, cohibere, loco Pontificiæ magnitudinis ducebat; idèoque nemo prorsus extitit, cui vel dolori, vel damno fuerit, quamquam non semel, nec ab uno violatus, nisi tamen vel Religionis, vel justitiæ periculum ingrueret; namque tueri pietatem, æquitatèmque, quibus nititur humana felicitas, nemini debet esse fraudi, aut molestiæ. Cùm ergo Gregorius suas

nec iras, nec turbas amaret; promptius alienas submovebat, instar parentis: Rudolphum Cæsarem absterruit, ne Stephanum Bathoreum invaderet: Valesium etiam gravissimè arguit, molestias Hispano inferentem: & hac potissimum causa oderat Elisabetham Reginam Britanniae: eique arma, & ultionem adornabat: quòd principatus, & regna Catholicorum discordijs, ac seminibus calamitatum imbueret. Hispano institit, ne vim Lusitaniae faceret: Alphonso Ferrariae Duci, ulturo gratissimi hominis cædem, parata militum manu, præcepit, ne faceretur negotium Lucensibus, qui missis Vincentio Parentio, ac Benedicto Bonvisio, ad Gregorium rem detulerant. Cæsarem extimulavit, ut certantes de ditione Montisferrati Mantuanum & Nivernensem, quamprimum confectâ lite componeret, ne metu belli trepidaret Italia. Venetos Hierosolymitanis Equitibus iratos, occupatis eorum proventibus, ob navim Venetam ab eis præreptam, ac etiam turbatos, quòd causâ tritemium Melitensem, Othomani rebus.

insul-

insultantium, ipsi ab Othomano vexarentur, Cypro captâ, & tentatâ Cretâ, reconciliavit, his navim, illis proventum reddere jussis. Consuluit Neapolitanæ Urbi in Proregem tumultanti, ob Fabium Marchesium, ab eodem in carcerem conjectum, alio colore, revera quòd ipsi restitisset, donum Populi, non populi nomine ad Regem mittenti; & cùm Prorex oblequi sibi utilia monenti abnueret, Regem admonuit, qui animadverso periculo, accitum in Hispaniam eundem Proregem tam severè increpuit, ut miser exciderit gratiâ, & vita: Composuit excitatas iras inter Henicum Galliæ Regem, & Gallici Regni Antistites, ob novum pecuniæ subsidium, quod ille ad æs alienum jam contractum dissolvendum efflagitabat, Antistites abnuebant. Franciscanos, qui ab Observantia cognomen trahunt, tum Gallos, tum Hispanos, inter se dissentientes (arte Christophori Caposontij, qui fretus Regis Henrici gratiâ, successorem adoptare pro arbitratu cupiebat) religiosè conjunxit, Caposontio cohibito, & Ordini; Præsede omnium suffragijs delecto, Fran-

cisco Gonzaga. Orta Mediolani inter Regios Administros, & Carolum Borromæum certamina composuit, eumque tam accuratè Philippo commendavit, ut is Borromææ familiæ Aaronam arcem, quam Miles Hispanicus occupaverat, restituerit, & Sanctissimum Virum hoc etiam nomine plurimùm amaverit, quòd à Gregorio laudatus. Polonis quodammodo indignantibus, eorùmque Rege Stephano conquesto, quòd Hispanus ad ipsum literas daret majestatis plenas, tanquam Poloniæ regnum temneret, armis, virtutibus, & nobilitate dives, quamvis remotum, ideòque pluris æstimandum; impetravit ab Hispano, ut benigniùs, humaniùsque ageret, datis alijs literis, quibus laudatâ tum Regis pietate, tum Regni magnitudine, suam Polonis benevolentiam approbavit. Stephanum autem Poloniæ Regem hortatus est, ad Austriacos amandos, colendosque, sublatâ dissensionum nube, quæ Solem felicitatis obturbat; arma in hostes Catholicorum, non in Catholicos verteret; quod sane spondit, ac præstitit, paratus, (ut Gregorio gratifica-

ficaretur,) & Catholicæ Fidei serviret, non modò arma, sed vitam ponere, præclaro regiae mentis experimento. At Gregorij labor in eo maximè fuit. ut natas inter Gallum, & Hispanum suspiciones aboleret, quippe atrociores, ob diversa animorum, Nationumque studia, & facilè erepturas in bellum Religioni perniciosum, ac optatum Hæresi; præsertim id temporis, cùm Franciscus Valesius in Belgium adversus Hispanos se contulit armatus milite, ac minis, & Catharina ejus mater Antonio suppetias ac naves, Duce Philippo Strozio, submisit; Ergo ut fortiùs malis occureret, Horatium Malaspinam è Germania reversum, ad Henricum allegavit, qui verbis Pontificijs Henricum moneret, ea, quæ offensura Hispanos, aliorum invidiam incitabant, ac præsertim Francisci fratris Belgicam expeditionem, & suppeditata Antonio auxilia; neque Rex hisce auditis irasci, sed respondit: Franciscum haud potuisse coërceri, ne in fratrem insurgeret, mulò minùs cohiberi, ne Hispanos invaderet: illud scirent Hispani, ipsos jam Belgio excessuros fuisse,

si Henricus Francisco adfuisset. Rece-
pisse quidem in fidem Antonium exulem,
sed innato Gallicæ pietatis genio : arma
verò, & auxilia non parata adversus Phi-
lippum, sed pro Catharina Medicea, quæ
Lusitaniz regno per vim à Philippo de-
jecta, vim jure intentabat. Cæterùm
moneret Philippum Pontifex ut abstine-
ret alieno ; neque aliter arma quietura.
Similia prompsit Catharina, sed querenti
indignantique propior. Quæ ubi rescijt
Gregorius ; statuit morâ impetum frangere ;
& certè videtur mitigâsse, nam Henricus
ad Philippum perscripsit, se invito hæc à
suis agi ; si quos caperet, morte plecteret.
Sed hinc nova & ingens querelarum ira-
rùmque procella ; fuscâ enim, ac pro-
fligatâ ab Hispanorum Duce Sanctacru-
cio, Philippi Strozzi classe, nobilia Gallo-
rum capita gladio, ignobilia suspendio
multata fuerunt, miserando spectaculo ;
cujus atrocitatem simul ac ludibrium in-
dignatus Rex, gravissimis apud Gregori-
um quereleis inculavit Hispanum, per im-
mania illudentem sibi ; Et verebatur Gre-
gorius, ne ira bellum gigneret, ac demum
vul-

vulnus supra remedium foret: quocirca
 nisus est per beneficia lenire furorem,
 Regi & Catharinæ si quid cupiebant, gra-
 tificatus; & in primis Catharinæ votis
 indulgit, cujus è consilijs pendebat Hen-
 ricus; Optabat illa, cùm omnia referret
 ad potentiam, Francisco filio jungere Hi-
 spani filiam, sed ditione vel Neapolitanâ,
 vel Mediolanensi, vel Belgicâ dotatam,
 ut foret perenne pacis vinculum, rogavitq;
 Gregorium, ut id Philippo persuaderet.
 Assensit Pontifex, atque ut rem sibi cordi
 esse ostenderet, hac de causa ad Philippum
 allegavit Fabium Albergatum, nobilitate
 generis, mentis prudentiâ, doctrinæque
 magnitudine clarissimum.

CAP. XLI.

*Hierosolymitanorum Equitum di-
 scordiam componit.*

SEd nulla magis, quàm Hierosolymita-
 næ, seu Melitensis familiæ dissensio,
 prudentiam Gregorij nobilitavit. Joannes
 de Cassiera Gallus, Ordinis Magnus Ma-
 gister, & supremus Moderator, ætate

quidem gravis, at corpore, animoque firmus, quippe octogesimum natus annum, viros, & nobilitate, & militari robore famaque insignes coercerebat severo imperio, paratus adversum refractarios; unde ingens illi ex severitate odium, quo adacti Equites incusare ejus senium, ut impar praelecturae, ac imperio: poscere alium, qui aetate florentior personam ejus gereret; & cum Joannes obsisteret, iram praecipites Maturinum Leschum vulgo à celebritate roboris dictum Romegasium, tumultuarijs suffragijs ad regimen, imperiumque attollunt; demum abdicatum Joannem, sive futuri metu, sive securitatem nanciscentes, coniiciunt in Carcerem, tresque ad Gregorium homines designant, Ludovicum Sacavillam Gallum, Cosmum de Luna Hispanum, & Bernardinum Capicium Italum, qui facinus excusarent, imputarentque Joannis senio, quasi is ineptus regimini, ijs moribus uteretur, quibus omnes offensi; at Joannes quàm ignominia, quàm ira turbatior, ne silentio, & patientiâ illatam sibi injuriam approbaret; duos quoque Equites, Franciscum

Gul-

Gulmanum Hispanum , & Sebasciam Gallum Romam amandavit, ut Pontificem ad defensionem accenderet: se Romæ causam dicturum: proinde aliquem mitteret, qui perturbatam Ordinis fortunam sustineret, ac regeret: Acerbissimè tulit Gregorius hanc clarissimæ deque Christiana Religione optimè meritæ Gentis discordiam, cui componendæ statim Pontificiam vim commodavit, ne discordia ruinam afferret. Igitur misso ad Melitam Gaspare Vicecomite, postea Archiepiscopo Mediolanensi, iussit eductum carcere Magnum Magistrum, & pariter Romegasium, ad se Romam accedere, quæ novarum rerum avida simul & arbitra, verientem Romegasium ut ambitionis reum, eoque inglorium destitutumque comitatu, & benevolentia spectavit, Joannem verò seu senij, seu carceris commiseratione, solemnî pompâ, lætitiæque excepit, & Gregorius eum benignè audiit, cùmque lacrymas perorando fudisset, solatus est: Haud esse innocentia timendum: se curaturum, ut sua factum poena sequeretur, & afflictæ probitati sua es-

sec gloria: mox Romegasio præcepit, ut Joannem ceu Ordinis Moderatorem adiret, coleret; donec lite confectâ, de cujusque dignitate dijudicatum foret. Parui ille, sed invisus aulæ, animoque tristis paulò post occubuit, cujus funus exacto mense Joannes secutus est, dum more patrio, immemor deficientium ex ætate virium, dat liberaliter è vena sanguinem. sic cecidere duo, eximia Hierosolymitani Ordinis lumina; uterque incertæ documentum fortunæ, alter ambitione, severitate alter; Extincto igitur Joanne de Cassiera, ingens cura incessit Gregorium, quippe Insulæ Othomano minitante, Equitibus in factiones divisis, nec ad obsequium pronis, verebatur, ne quid funestum, dolendumque accideret, si comitia haberentur; Melitâ præsertim debilitatâ præsidijs, nec armamento instructâ; Igitur eo missis Ferdinando Majolino, & Gregorio Nibbio, vetuit inconsulto Pontifico agitari comitia, ac Melitam à quocumque adiri. Mox deliberavit, ubi agitanda, cumque Româ præferrent aliqui, tanquam Urbem Pontificiæ voluntati obnoxiam, prætulit
ipse

ipse Melitam, ne ritum morémque inverteret; inversis moribus non tolli, sed ali discordias. Et cùm posset ipse specie abolendæ dissensionis, Ordinis Principem creare, atque ad se novo arcano referre tantæ dignitatis initia, nullo pacto aliter passus est illum eligi, quàm ex consuetudine; útque averteret rixas, & odia hominum ex affectu, studioque, faventium; tres tantùm nuncupavit qui urnæ ac suffragijs committerentur, Franciscum Panissium Avenionensem, Franciscum Muretonium, & Ugonem de Loubenx Verdalam, qui demum omnibus, hoc est sexdecim eligentium suffragijs, dignitatem indeptus est. Et quamquam Gregorius propenderet in Panissium, nec Hispano suspectum, quia Pontifici subiectum, nec ingratum Gallo, quia Avenionensem & præterea modestiâ, & pacis amore probatum; tamen per quàm libenter gratulatus est Verdalæ, qui misso Fulvio Puccio, & obsequium detulit, & gratias egit de summa in Ordinem benevolentia, deque servata disciplina. Mox rei certiore fecit Hispanum, qui poterat irasci, quòd Gallos

huic dignitati destinâſſet: cujuſcumque Patriæ ſint hujus Ordinis Principes, ab Hiſpano pendere Inſulæ Domino; ſe id Galliæ dediffe, offenſiones vitantem, ac nova Ordinis discrimina. Denique cognitâ per Purpuratos Joannis mortui cauſâ, eum, uti vitæ integrum, innocentemque abſolvit, atque à prudentia, & pietate commendavit: falſo & calumniâ, & carcere circumventum. Multavitque Equites, ablatâ, quâ pollebant, abdicandi Magni Magiſtri poteſtate, ne deinceps neceſſitatis remedium abiret in licentiam. Neque tamen imminuit, ſed auxit in Ordinem benevolentiam, aſſertis ejus privilegijs, in Gallia, Luſitania, Sicilia, etiam Inſtituto Societatis Jeſu Collegio, quo pietati conſuleret, pro pietate militanti.

CAP. XLII.

*Auguſtanum Conventum in Sedis
Apoſtolicæ officio continet.*

PAULò antè memorare hæc debui, ſed narrationum ſeries aliud ſuaſit, ne diſtracta moleſtior eſſet, ac inutilior; &
hiſtoria

historia non tam annis, quàm rebus gestis constat; quippe quæ spectant eodem, magis conjuncta juvant. Rudolphus Cæsar post suscepta Romani Imperij insignia, statuerat Augustam Germaniæ, Imperijque procures accersere, tum ad reparanda Germanorum negotia, ex turbis Belgicis imminuta, tum ad flagitanda auxilia adversus Othomanum, qui pactis cum Persarum Rege inducijs, Hungariæ, Romanòque Imperio imminere avidius quòd afflictis discordiâ, & hæresi Provincijs vires deessent, animique, ad hostem repellendum, milite armisque potentiores. Sed Hæretici, Gens assueta tumultibus, atque errorum tenax, inde consilium cepere, exorandæ per arrogantiam, & minas, Religionis profitendæ, corrumpendæque conscientiæ libertatem, ac præsertim eam rationem vivendi, quâ proventus, beneficia, honorésque Ecclesiæ quibuslibet hominibus, seu sacris, seu prophanis conceduntur, promiscuâ largitione, quò magis vetitâ, eò magis gratâ: & augebant eorum audaciam Rudolphi trepidatio, & invalida viribus potestas, Hispani robur in
Belgio

Belgio attritum, aliâque Catholicæ Religionis incommoda. Ergo censuit Gregorius, sibi pro retinenda Catholicæ rei disciplina laborandum, quò magis hæreticî ad deteriora ferebantur, eoque legavit Ludovicum Madrutium Purpuratum, & claritudine stirpis, & rerum Germanicarum scientiâ, ac in primis Cæsaris gratiâ florentem. qui optimum ratus, Principum animos voluntatésque statim captare, ne ad Hæreticos inclinarent, accurata scriptione prompsit incommoda, & damna, quibus Germania affecta fuit, ac pænè pessumdata ob auditos, exauditósque in reliquis conventibus sectarios: eos more Serpentum, etiam cum blandiuntur, venena inspergere: nisi deprimerentur, audacter insurgere, depressos vanescere. Et licet Gregorium, Legatûmque terrent plurima, sed præsertim Catholici pauci, & discordes, tamen fortiter adversa sustia vicerunt, Gregorius fufis ad Deum precibus, & perscriptis ad Catholicos Principes literis, & Legatus, animum Cæsaris, & Principum solerter captando; gratiâ enim & benevolentîâ vincuntur Principum

caput animi potius, quàm metu, & minis, nihilque magis cavendum in cætibus, conventibúsq; Hominum, quàm asperitas morum, cui nihil prosperum, quia semper invidiosa. Vix inchoato Conventu, Archiepiscopus Magdeburgensis, cùm esset Septemviri Brandeburgensis filius, eoque spei securus, sibi tanquam Germaniæ Primati Antistiti, ut sedendi locus attribueretur, postulavit. Sed Legatus intellectâ rei gravitate, acriter, solertérque contrâ certavit, allocutúsque singulos tum Principes, tum Antistites Catholicos, ut ille conventu abscederet, effecit. Si Catholici hâc victoriâ usi fuissent, Protestantium fregissent audaciam, quæ semper vilior est, dum spernitur, repelliturve; quippe inter alios Julius Herbipolitanus Antistes, causam fidei, ac Sedis Apostolicæ propugnavit constanter, ac magnificè. Joannes Trevirensis Archiepiscopus, & Septemvir, postulavit, à Gregorio suæ auctoramentum dignitatis, & publicè sacro Pallio cohonestatus à Legato Pontificis Romani, ejus tum auctoritatem, tum majestatem, supra reliqua Antistitum capita

pita commendavit ; Cæteri altioris Ordinis Principes, ac præsertim Gulielmus Bavarus, palàm professi Catholicæ Religionis defensionem, terrori fuère hæreticis, ac in primis ipse Rudolphus Cæsar in privato, ac secretiore Principum confessu, arguit quosdam politicis potiùs rationibus, quàm Pietati servientes, & tacto Imperatorio pileo, disertè, apertèque testificatus fuit, malle se de capite abijcere diadema, si cum Religionis Catholicæ damno illud sibi gestandum esset. Quæ Gregorio nuntiata, summam attulere lætitiâ, quòd insolescentibus Hæreticis, major Ecclesiæ, Sedique Apostolicæ esset reverentia. Sed repentè seu ignaviâ Catholicorum, seu suarum desperatione rerum Hæretici, nefarijs vocibus in Gregorium, Rudolphum, & Legatum exardescere, Antistites Septemviri, ac Legatus contrâ eloqui: Eò Sectariorum evasisse audaciâ, ut illo in confessu impunè ac audacter Orbis Principibus, Pontifici, & Cæsari insultarent; constare Gregorij erga Germanos amorem, Sole, ac luce clariùs; duci quidem illum divinæ studio gloriæ,

gloriæ , & Pontificijs curis agi , ut malis,
hæresibûsque mederetur , at mederi non
atrociter, sed leniter, & ex Juris præscripto.
Licere Sectarijs vastare Ecclesiam , Ger-
maniam quater, Orbem universum pes-
sum dare, cur non liceret Gregorio eum-
dem tueri, sustentare , ac servare? haud
esse consentaneum rationi , Lupos fremere,
ac sævire, Pastorem autem connivere.
Quæ audiens Rudolphus, metuensque
turbarum, perceptis subsidijs, dilatusque in
alia tempora de Religione consilij, mate-
riam subtraxit sermonibus , ex quibus non
ratò tumultus; Dimisitq; Conventum, ne
ferueret in seditionem, nec Religioni, nec
reipublicæ utilem. Cum autem rumor
efferverisset, Rudolphum inter ac Hispani
filiam agitari connubium; Gregorius per
Legatum suasit Cæsari , ut tempore uisus,
Italix majestatem Cæsaream commodar-
et, ibique à Pontifice, vel Bononiam ac-
cessuro, Imperatorium diadema , more
veteri acciperet; Neque abstinuit ille, sed
famâ nuptiarum evanescente, spes quo-
que tam præclaræ obtinendæ consuetu-
dinis abiit. Atque hic liquet, quâ con-
stantiâ

stantiâ Grégorius veteres Ecclesiæ mores, & retinuerit ipse, & retinendos insinuârit Principibus: quippe stat Ecclesia, re-tento veterum more.

C A P. XLIII.

*Alia præstat in Germania, & Belgio,
Religioni Catholicæ utilia.*

Felicianum Ninguardam in Germa-niam misit, quo Fidei Catholicæ, vel periclitani, vel labefactatæ, vel etiam de-jectæ, ubique consuleret; qui fretus Gre-gorij auctoritate, in Carinthia, in Tirolis, aliisque locis, plura vel sinceræ Fidei, vel probis moribus adversantia abrogavit, alia composuit, non pauca emendavit, citra invidiam, metumque, quia extra vim, & ultionem; nam cum gemina sit compri-mendæ hæresis & nequitia ratio, vel vio-lenta per arma, vel suavis admonendo; posteriorem Grégorius probavit, gnarus, auctoritatem sæpius clementiâ niti, & qua-dam agendi dexteritate: meminissent æ-ternæ animorum jacturæ, quæ certa erat am-

amplexantibus hæresim, aut nequitiam;
non eligenda jucundiora, sed utiliora.

Carolus Archiducem Austriæ, ob
pecuniæ difficultatem, & injecto immi-
nentis Othomani terrore, in summas an-
gustias Hæretici conjecerant; ut vel assen-
tiendum Hæreticis foret iniqua reposcen-
tibus, aut præ inopia denegatis subsidij,
cedendum irrupenti Othomano. At
Gregorius hoc comperto, illi metum, hæ-
reticis audaciam dempsit, procuratâ eidem
aliunde pecuniâ, ac etiam ex Pontificio
ære missis quinquaginta aureorum milli-
bus; Quo subsidio recreatus Carolus, ac
etiam instructus Nuntij Malaspinæ præ-
fentiâ, qui jussu Gregorij Carolo aderat,
munimenta parare adversus Othomannū;
exilia denunciare Hæreticis; Probis, &
Catholicis viris credere ministeria mo-
rum, literarumque; fortiter minas re-
pellere; audaces multare constanter.
Atque ita conterriti Hæretici manus tan-
dem Carolo dederunt, qui obsecutus
Gregorij consilio, sustentatâ religione,
potentiam quoque sustentavit.

Versabatur Viennæ Josue Opitius,
ger-

germana Lutheri proles, qui succinctus ope Nobilium Lutheranorum, & in primis cujusdam Ludimagistri perniciosis concionibus, turbabat Urbem libertatis avidam, & novis sermonibus intentam, Admonuit Gregorius, instigavitque Rodulphum Cæsarem, ad pestem ab Urbe depellendam; at Nobiles absterrebant minis, graviorum metu malorum, promissis, & oblatis pecuniarum adminiculis, ac præsertim Consiliarij, dissensionibus ferendis tempora & locum nacti; Neque Rodolphus illis consentiebat, quâ Gregorij monitis, cui gratificari avebat, quâ insitæ pietatis stimulo incitatus, quâ etiam Ernesti fratris, aliorumque Catholicorum verbis, & ne timorem metumque præferret, quo nihil famæ Principum infensus. Inter hæc, casus pro remedio fuit. Solemni pompâ de more circūferebatur per Urbem Eucharistia, Cæsare, ac Proceribus, deducentibus cum repentinè orta ex modico turbatio, & ex turbatione tumultus; omnibus vel in fugam vel ad arma dilapsis, ac præsertim Hæreticis, qui ad quatuor millia coiere, terrorem ac metum ostentantes;

Cæsar

Cæsar tamen spreto tumultu, institit pompæ impavidâ pietate, ac reverentiâ : frustrâ indignante Opitio. Re vulgatâ, Gregorius severioribus literis, tumultum, Providentiæ vocem interpretatus, Cæsarem impulit ad audaciam ulciscendam, ne inulta foret exitio; Sic tandem Opitius, ejusque clientes Viennâ, Austriacâque ditione ejecti, graviore multandi pænâ, sed ancipite, variâque factionnm Urbe, satius est ostentare, quàm inferre graviora supplicia.

Cùm Princeps Clivienfis, seu metu, seu pacis studio propenderet ad vota, precésque subjectorum, qui libertatem amantes, proniora ad hæresim, quàm ad Catholicam, fidem ingenia præsetulerant, Bartholomæo Portio misso, eò adduxit, ut denegato Confessionis Augustanæ usu, non modò postulationibus iniquis haud consenserit, sed sponderit Gregorio, ejus consilijs se obsecuturum, cupiens non tam subjectorum, quibus imperandum est, quàm Ecclesiæ, cui patendum, gratiam aucupari.

Plura alia egit Gregorius, quæ si vellem

lem expromere, haud finem narrationi facerem. Duo tantùm afferam, quorum alterum in Belgio, alterû in Germania præstitum. Monitus fuerat à Philippo Hispaniæ Rege, novas in Academia Lovaniensi, de igne purgante, de charitate, de libera hominis arbitrandi facultate, à Michaële Bajoferi opiniones, quæ in tanta hæresum coluvie, quibus & Belgium, & Germania scatebant, facilè incommodâssent Ecclesiæ, fatis afflictæ. Sed ne ignem accenderet, per silentium, & quietem rem transegit, destinato ad Michaëlem Bajum Francisco Toletum Societatis Jesu, qui sine turba & ira eum allocutus, jactisq; sermonibus, paulatim eò provexit, ut testaretur, haud probè fuisse pronuntiârat; cæterum se haud alia opinari, & affirmare, quàm ea, quibus Romana, & Catholica Ecclesia assentitur. Mox ipse Bajus, & cum eo reliqui Academiae Professores, conceptâ sacramenti formulâ in ea verba jurârunt. Sic discussum ingens Ecclesiæ discrimen: & Gregorij prudentia edocuit Posteris, non tam minis aut scriptionibus; quibus compugnantur, & avida ultionis feriuntur ingenia,

ingenia, quàm placido Charitatis & prudentiæ stylo deleri labes errorum; saltem haud exercenda esse opinionum tela, quæ neglecta, vel non ostentata obtunduntur. Ut autem Gregorius alacriùs excitaret Academiae industriam, ad sapientiam, Religionemque fovendam, ingentis pecuniæ vim illi attribuit. Et sanè præclarissima Principum, Pontificumque ars est, aurum dare, ut sapientiam referas; quippe docti viri nisi foveantur, cum inopia luctantur, & ex inopia, Sapientiæ contemptus.

Hoc in Belgio, sed in Germania alterum. Joannes Palæologus Natione Græcus, patriâ Chiensis, post desertum Religiosi Ordinis sacramentum, in scelera & nefaria dogmata præceps, in carcerem sæpè conjectus, semper evaserat; sub obitum denique Pauli IV. elusit Romanam in Sacro tribunali custodiam: & in Galliam, mox in Germaniam pervasit; gratissimus Urbibus, Principibusque, seu quia Græcis artibus excelleret, seu dæmonis arcanâ ope adiutus. Nihil adeò absonum, vel veritati, vel religioni erat,

L

quod

quod ipse non facillè persuaderet. Demum profectus Viennam, vinculis mancipatur, jussu Rodulphi Cæsaris, à quo Gregorius statim petijt ut facinosorum hominem redderet Sacro Tribunali, cujus reus erat: capite damnatum à Pio V. Pontifice, haud posse vivum incolumemque detineri. Fremuère Principes Protestantes, adversus Gregorium, & suadebant Rodolpho, ut falleret Pontificis spem: Haud fas esse, Romam è Germania reum deportari. Quid Romano Tribunali cum Germanico carcere? At Cæsar Gregorio maluit obsequi, tradiditque Nuntio Palæologum, qui Romam adductus, cum jam flammis iniiciendus esset; versâ mente abdicavit errores, ac publicè pœnitentiam pœnæ conjunxit. Usque adeò Religionis tuendæ constantia, pervicaciam frangit obstinatæ mentis.

CAP. XLIV.

Motum Salutarum cohibet.

ROgerius Bellagarda, seu ambitione, seu irâ in Henricum III. Galliarum Regem,

Regem, seu Principum circum dominantium studijs, auxilijsque incitatus, Salutias occuparat, Carolo Birago Præsidente fugato, se Carmagnolam abdens, adversus Regis impetum; Statimque sub ejus umbra, & patrocinio, efferbuit hæresis sceleribus immista. Gregorius, qui & Italicæ quieti, & Religionis securitati invigilabat, anxius, eam turbari oram, quæ totius est Italiæ janua, ac propugnaculum, primò perscriptis ad Bellagardam literis, non per iram & minas, sed leniter, ac cautè, nunc rogantis, nunc hortantis specie, admonuit, ut ne tam calamitatũ ferace Europâ, Italicæ quieti invideret, neu iram Populorum in se armaret: sapienter, & piè ageret; quâ Pontificis lenitate victus ille, facinus excusavit, non odio Regis, aut Religionis patratum, sed hostium, & insidiarum necessario metu; se nunquam hæresibus aut favisse, aut fauturum, sed Catholicam fidem tueri, ac regiam, Pontificiâque benevolentiam appetere. Deinde Gregorius Principes consuluit, ut eorum consilio, ac auxilio adiutus, citiùs incendium opprimeret, & operâ Anselmi Dandini

Nantij usus, Henricum in suam pertraxit sententiam; & sancivit cum Venetis fædus, quo conjunctis copijs novi conatus comprimerentur. At percontatus operâ Ferdinandi fratris, Franciscum Mediceum Magnum Hetruriæ Ducem, quid ille censeret de hac flamma, cùm audisset, à Gallis & Sabaudis excitari, necessariûmque esse ei sedandæ, Pontificis cum Venetis, & Hispano fædus; timensque, ne ipse suscitaret incendium, dum repellit; consiliûm à tempore mutuatus est; suspensâ deliberatione, donec innotesceret, quid Gallus, & quid ultra Bellagarda molirentur. Consiliûm probavit eventus; nam paulò post Bellagarda Henrico reconciliatus, & Salutijs præfectus, quæ promiserat Gregorio, sanctè præstitit; Hæreticis inde pulsis, & Societatis Jesu Hominibus, ad hæreses arcendas, tuendamque pietatem, Carmagnola & Salutijs advocatis; imò coram testibus expiatâ apud Sacerdotem conscientiam, ut apertum Fidei Catholicæ testimonium afferret, dum Pontifici, Cæsari, cæterisque Catholicis Principibus studet, morbo

bo pressus occubuit. Usquè adeò reverentia Gregorij apud eum valuit, qui nulli mortalium cedebat; nimirum benevolentia, & humanitate potius, quàm terrore ac minis Pontifex Principes capit. Reliquit Rogerius hæredem Cæsarem Bellagardam, qui paternæ pietatis æmulus, ac reverentiæ, Gregorio spopondit, se Apostolicæ Sedi addictū fore, ac sanguinem, vitæque Catholicæ Fidei, si locus daret, litaturum. Regebat ipse quoque Salutias, putabátque, se illius tractūs dominum, cū revera præfectus esset, ideo Henrico Regi Salutarum possessionem repetenti, offerentique Carmagnolam, maluit obistere, quàm obsequi, stimulatus in primis à Petro Anselmo, nefario homine, qui per turbas potentiam quærebat. Sed coactus à Sabaudo cedere, venienti pro Henrico Vallettæ Salutias dedit, intentus tamen ad occupandam Carmagnolam, quâ captâ, terrori erat. Sed ejus custodiæ impositus Volveria, miles Catholicus, & pius, qui non nisi Sabaudo, aut Gregorio eam tradere decrêrat, & impetus infra spem, ac possessionem

nem fuit. Interim rogatur Gregorius, ut ea loca vel expedito milite occuparet, vel accomodatâ Henrico pecuniâ, acciperet. Et incertus sententiæ; nam periculosum eas oras relinquere, quibus hæresi infectis, Italia inficeretur; at emere tali pacto, haud placebat; an quia difficulter ea tenentur, quæ locata in sinu multorum Principum suspicionem, ac metum præbent? demum respondit, sibi potius arridere pacis, & concordiæ consilia; Tradherentur ea loca ijs, quibus jure ac per æquitatem deberentur. Verùm inter hæc extincto Philiberto Sabaudix Duce, successor Carolus Henrico gratificaturus, litem sustulit, Carmagnolâ ei promissâ, non sine ira Cæsaris Bellagardæ, ac Petri Anselmi, qui multorum Principum auxilijs freti, res novas meditabantur. Sed Pontifex Italicæ paci consulens, immodica tentamenta compressit, Principibus monitis, ne anguem alerent, cujus veneno ipsi primùm afflarentur. Atque ita Bellagarda & Anselmus deserti auxilijs, Henrico ac Paci consensere; non sine summa Gregorij laude, qui hoc facto pro-

prodidit, sibi non ignaviâ, sed necessitate pacem probari, dum arma movere non timuit, ut pacem firmaret.

CAP. XLV.

Sabaudia prospicit.

SUcceſſerat Philiberto Carolus, indole ſmajor, quàm ætate; Et cùm plurimum referat, Sabaudix Ducem Italiæ fines & propugnacula tenentem, Catholicæ Religionis amore, Sedisquæ Apoſtolicæ reverentiâ imbui, ne quid ſinat ſubrepere in Italiam pernicioſum, aut quieti aut pietati, Gregorius veritus inſtantiam ætatis, quæ non raró decipit, quamvis Carolus eximium præberet Religionis ſpecimen; & comperto, conſilijs pravorum hominum ei offerri nuptias cum Sorore Regis Navarræ, fæminâ hæreſibus ante omnes deditâ, juſſit Vincentium Laureum Nuntium ad Carolum adire: Si fæminam Catholicam amaret, cuicumque nuberet; ſi hæreſi corruptam, omnino abſterneretur; plerôſque principatus corruptos per fæminas, quibus haud cre-

dendum: blandiri eas, & nocere: insuper Hæreticos hac affinitate abusuros: Hispanum, & Gallum quoque desertos, ac neglectos à Sabaudis, posse irasci. His cognitis Carolus, & perceptâ Gregorij voluntate; haudquaquam se ait, velle cupere quicquam, aut Principi Catholico impar, aut ingratum Gregorio, cujus à consilijs pendebat. Mox Gregorius Catharinam, posteriorem Hispani Regis filiam, jussit Carolo proponi, quæ si Carolo probaretur, suaturum se Hispano, ut ei nuptui traderet. Non respuit ille, ac suadente Gregorio Philippus, qui firmare avebat Italicam ditionem Caroli spe, ac potentiâ, libenter tradidit, gnarus, inesse Carolo regiam mentem. Sic eluso Hæreticorum conatu, confectæ sunt nuptiæ, quibus Vincentius Laureus jam purpurâ clarior, nomine Gregorij gratulantis interfuit. Sed novus animi impetus Carolum egit ad bellica consilia: Siquidem multorum hortatu, qui ex bello, rebûsque turbidis lucrum & præmia sperant, adductus, bellum indixit Gulielmo Mantuæ Duci, recupe-

cuperaturus Montisferrati ditionem, quam ad se pertinere censebat, Itaque militibus à Petro Anselmo copiarum ductore instructis, jam invadere loca, terrorem jactare, possessioni inhiare, Sed Gulielmus impar viribus, ac necessitatem armorum timens, ex qua vel jactura possessionis, vel ingens ærarij detrimentum, & hoc exhausto minoribus Principibus certa calamitas, ad Gregorium confugit, qui suapte sponte proclivis ad Italicæ gentis quietem, Carolo meliora persuasit; haud esse id temporis, quo ubique bella fervebant, vexandam Italorum pacem: sua servare, non aliena invadere, tutius; nam turbidis temporibus pari sorte aliena occupantur, amittuntur sua: non esse vicinis Principibus suspicionem ingerendam, mentis aut cupidæ, aut inquietæ: Vicinum tolerandum, qui sit debilior, & infra tuas vires, & quem terreas; ne accedat alius viribus validior, quem timeas. Ergo Caroli Ducis consilia, omissio Mantuano, conversa sunt ad oppugnandam Genevam, hæresum, hæreticorumque perfugium. Sperabat Rhætorum auxilia, &

opem Henrici Galli, qui sponddit literis manu regiâ exscriptis, redditâ à Sabaudò Carmagnolâ, se huic expeditioni præstò futurum, quâ collectâ militum vi, quâ subsidij. At Gregorius prudentiâ & futuri metu anceps, ubi hæc audiit, approbare quidem conatum, Religioni ac Italiæ per commodum, verreri se tamen, ne dispar voto exitus Caroli famam, quæ primis conatibus valida est, corrumpere; eique rationes scripsit, quibus victoriæ diffideret, an Gallus revera opem sponddisset? an Helvetij fautori? Neque Gregorium fefellit eventus. Et Carolus, quâ Henrico obstante, quâ destitutus auxilijs, destitit obsidione; Gregorius autem Carolum solatus est; æquo animo ferret jacturam: & loco victoriæ caperet documentum: non alienis, sed suis rationibus metiendos esse conatus: alienis, & nullis viribus niti, idem prorsus esse; cum Henrico tamen questus est acriter, cum non modò regiæ dignitati illusisse, regio verbo spreto, sed Religioni Catholicæ: cui sectariorum patrociniū prætulisse, quid erat, nisi fidem regiam accom-

accommodare Sectarijs, denegare Catholicis? At ille factum excusavit: se majorum insistere vestigijs: consultum à se Catholicæ rei. Et fortasse non minus verè, quàm magnificè respondit, quippe Gregorius ipse pertinuit, ne Genevæ obsidio Italiæ clades foret; hæreticis ad ultionem è Gallia ruentibus; & eó magis id credidit, quòd paulò ante iratus Philiberto Sabaudò, qui Bellagardam fovebat, unâ cum Rhætis idem Henricus conspirârat ad Genevam defendendam; gnarus, Italiam sibi patere; Atque idcirco abstinendum armis, ne in præsens læta perniciem demum afferrent. Sabaudus autem magnâ Gregorij benevolentia, subtraxit se consilij, quæ præcocia semper cum invidia, non rarò cum exitio, ad poenitentiam properant; & paratus obsequi, excelsâ illâ mentis vi Gregorium coluit, eique gratificatus, ad Pontificia litora custodienda, suas destinavit triremes; ac Sacris initiatos homines, vectigal solvere vetuit, solutumque restituit. Tanti Gregorium fecit magnanima Caroli Sabaudi indoles, cui adultæ, ac maturæ nihil aliud

defuit, in summa gloria, quàm Gregorij consilium.

CAP. XLVI.

Kalendarium, & Martyrologium emendat.

Difficillimum, ac sæpius à Pontificibus tentatum opus, Gregorius quoque aggressus fuit, atque absolvit, insigni Generis humani, Ecclesiæque Catholicæ commodo; sacrorum videlicet fastorum correctionem, & stabilem anni normam; ad quam dies Paschalis revolveretur, certâ, nec aberrante periodo. Siquidem primum Ecclesiæ Catholicæ arcanum est, suos ita celebrare ritus, ut à Judæorum cæremonijs distent, ac præsertim diem illum, quo Christus redivivus, humanæ salutis trophæum, victor erexit, tam sanctè venerari, ut nec temporis spatio convenire possit cum anniversarijs solemnibus Judæorum. Præterea constituto Paschali die, tanquam fundamento & cardine Christianæ pietatis, certiùs, ac sanctiùs festi dies, ritùsque peraguntur. Idcirco lege

Nicæni

Nicæni Concilij statutum fuit tempus, quo Pascha seu Christi resurgentis dies, anniversario animorum studio recoleretur. Sed præstituto tempore, paulatim vel ex mora lapsuque dierum, vel ignorance hominum immutato, verendum erat, ne errore magis glisciente, ac neglecto remedio, Respublica Christiana plurimum perturbaretur; nam ex ordine pax, ordo ex tempore. Itaque Gregorius, cui nihil difficile videbatur, quod erat reipublicæ commodum, necessariūve, adscito viroꝝ Mathematicis præsertim doctrinis insignium cætu, decrevit, hoc volubile temporis monstrum, Ecclesiæ periculosum, omnino tollere. Et favit consilio Providentia, quæ non rarò differt felicem rerum exitum, ut nobiliter. Et sanè haud unquam clariùs confici hæc nova temporis ratio potuit, quàm auspice Gregorio, cui obsequi, Principes incrementum majestatis censebant, ideòque laudare omnes, & complecti, quæ sanciebat. Rem ita breviter confecit. Omissâ incertarum opinionum nube, quæ potiùs obstruit, quàm reserat lucem veritatis, duos legit

eximios viros, Vicentium Laurentum, & Christophorum Clavium, quibus perpendendas dedit Aloysij Liliij hac de re commentationes, & hisce inspectis, ac ferè probatis, rem eò pertraxit, ut destinatum à Nicæna Synodo Paschalibus solemnibus tempus restituerit, subtractis decem diebus, ac certis dierum intervallis in postera tempora, quàm sublati, quàm adjectis. Mox ad Principes, Academiâsque terratum missâ emendatorum fastorum normâ, exploravit ingenia, & voluntates: admonerent, siquid ingratum, aut aberrans; hæc non tam auctoritate, quàm consilio perfici. Cùm autem pari voluntate omnes consensuque in ejus consilium conspirâssent, jussit Mensi Octobri anni à parta salute 1582. decem dies abscindi; atque ita quintus ejusdem Mensis dies dictus est decimusquintus. Deinde libello edito, quo restituti ratio temporis continebatur, & in Provincias evulgato, capere omnes hâc formâ uti; quamquam Germania, alibique reclamatum ab Hæreticis, quibus libido repugnandi, pro studio veritatis est; sed paulatim elusis,

supe-

superatísque difficultatibus, & prodigijs rem approbante Deo, ipsi quoque Secretarij manus dederunt, ac opportunum, necessariúmque censuêre, quod odio, invidiâque damnârant. Quin imò Græcæ Nationis, opínionísque homines, tantâ emendato Kalendario, in Romanam Ecclesiam, Gregoriúmque exarsêre benevolentíâ, & obsequio, ut Hieremias Constantinopolitanus Patriarcha ad Latinos se verterit, ac subiecta sibi agmina populorum Romano Pontifici conciliâsset, nisi fraus, & ambitio quorundam Hieremiæ obstitissent, an potius arcano Providentiæ, alia tempora expectantis?

Kalendario composito, Sacros quoque Sanctorum fastos, & Romanum, quod vocant Martyrologium, accurata doctorum virorum industriâ recognovit, ne sibi ipsi pietas imponeret: sublatis, quâ inanibus, quâ falsis historijs; & adjectis ex vero narrationibus, pluribúsque Sanctorum nominibus, quæ jacebant ignota. Res accidit memoratu digna. Dubitabatur, an Felix, hujus nominis Secundus Pontifex Maximus, inter Nomina sancto-

- timo-

testimoniâ & religione venerabilia retinendus esset: quippe nonnullorum Scriptorum testimonio, ejus fama pietatis in suspicionem venerat. Et jam ex Albo Sanctorum expungendus erat; cùm Romam Mediolano accessit Vir, veterum historiarum peritus, qui ex antiquis membranis d dicerat, Romæ in foro Boario, inter Templum Pacis æternæ, ac Delubrum Antonini, & Faustinæ, eò loci, ubi Sanctorum Cosmæ & Damiani memoria venerationi est, ingentem vim pretiosæ suppellectilis abditam esse. Spes lucri, cupidinem scrutandi accendit; ac indulgente Gregorio, terram fodit; quæ effossa arcam obtulit, in qua latebant cineres Felicis Secundi Pontificis; & hic venerando prænomine Sanctus appellabatur. Gavisus Gregorius, & Felicis memoriam fastis consecratam reliquit, & reliqua Sanctorum ossa unâ reperta, præclaris locis commendavit, ac in primis Abundij, & Abundantij, quæ in Templum Nominis Jesu splendide, magnificèque invec̃ta, pretioso monumento augent templi majestatem, Ita Gregorij studia in Superos,

ros, Ecclesiámque fovebat, & commendabat Deus.

CAP. XLVII.

Japonum legatio.

IAponia, Orientis insula, toto divisa Orbe, ac in angulum rejecta, nunquam magis, quàm in tanto rerum, temporúmque, ac hominum conflictu Ecclesiæ se approbavit, expers Christianæ lucis. Hanc primus in eam Franciscus Xaverius è Soc. Jesu invexit; mox alij ejusdem Societatis homines sustinuère invec̃tam, aut auxēre quā patientiæ, quæ apud Japones loco auctoritatis est, quā doctrinæ studijs evulgato superstitionis dolo, Ethnicorúmque Sacerdotum fraude reiectâ; unde fama veritati, & decus. Ventum est demum ad Gregorij tempora, qui comperto apud Japones religionis progressu, eò Pontificias curas vertere, benignioribus literis Nobiles animare, excitare Collegia, aurum & munera mittere, omnibúsque præsidij firmare pietatem, & jacta Religionis semina excolere; quibus paulò pòst fructus

ſus respondit uberrimus. Itaque Japones, quorum indoles ad virtutem, generosusque spiritus proclivis, censuere, grati animi studio, tantam Gregorij benevolentiam, beneficentiâque certo monumento venerari, & Légationem destinant, eò gratiorem futuram, quò minùs expectatam, & nunquam visam. Bongi Rex Franciscus, Protasius, Arimæ, ac Bartholomæus Omuræ Princeps, Mantium Jto, ac Michaëlem Cinga, regij sanguinis adolescentes destinavere, adjunctis Juliano Nacaura, & Martino Fara juvenibus, indole ac nobilitate summis. Hi omnes, comitantibus Homīnibus è Soc. Jesu, itinerum, rerumque peritis, ac navi Lusitanæ commissi, Nangasachio Japoniæ nobili Urbe solverunt; profecti primùm Amachaum, mox Malacam, demum Goam, post innumeras viarum ærumnas triginta mensibus toleratas, attigere Ulyssiponē, novo spectaculo attonitam, & exultante exceptique magnificè ab Austriaco Alberto Lusitaniam moderante, inde Matritum progressi, habitu, animoque Japonico adiere Philippū Secundum, Hispaniarum

rum Regem , qui majestate & ingenio gravis , præclarâ illa specie commotus , in amplexus ruit Rege dignos , indulstq; majestate posthabitâ , totus amori , & benevolentia. Matrîto in Italiam discessere , Romam versûs. Jâmque spectatâ Florentiâ , propiores erant Pontificiaë ditioni ; Ergo Gregorius lætitiâ expectationeque sollicitus , re ad Purpuratos relata , jussit ad se litterarum regiarum perferri exemplar , ut sanciret excipiendi rationem , inspecto Legationis modo , cui , cûm nihil deesset , solemni ac publicâ pompâ , more regionum Legatorum , eos excipere statuit , atque eò splendidius , quò periculosiore , ac longiore itinere ad Sedem Apostolicam primûm venerandam adveniebant. Juberetur Celsus Viterbiensis , Orae Præses , Pontificios fines ingressis cultum comitatémque adhibere ; mittantur obviam geminæ Equitum levis armaturæ turmæ , ac eximia Romanæ Aulæ gens , ut major advenientibus Majestas : Sed vexatâ Juliani valetudine , tardior erat Romam accessus , quem accelleravit Gregorius geminatis tabellarijs , an conscius

sciùs instantis fati ? Accessêre tandem
XI. Kalen. ad Urbis portas, vario tum
eorum, tum Quiritûm sensu. Illi sum-
mopere lætari, recordatione immensi iti-
neris : ante oculos patere Romam tot vo-
tis, tot laboribus quæsitam : jam posse
frui Religionis Christianæ primario thea-
tro : jam Gregorij vultum habitumque
intueri, ejusque pedibus advolvi, ac veluti
portum tam arduæ navigationis subire ;
illam esse Urbem, quæ olim terrarum
Regina, nunc animorum domina, implet
famâ & admiratione sui Orbem terræ
universum. Quirites verò confluere cer-
tatim ad ignoti oris spectaculum : mirari,
externos tamque distantes potuisse, toties
mutato Cælo, stupente quodammodo
naturâ, & Oceano sollicito, Romam
appetere incolumes, & constanter : lau-
dare Japonum pietatem, incusare aliarum
gentium ignaviam : hunc esse amplissi-
mum Gregorianæ Charitatis fructum ?
Quibus temporibus, nisi Gregorij, desti-
nâsse Providentiam inauditam omnibus
sæculis, inexpectatamque Legationem ?
Urbem ingressi, cùm dimittere comita-
tum

tum vellent, quo modestiæ exemplo magis innotescerent, tubarum sono, totiùsque Romæ plausu deducti fuêre ad Domum Professam Societatis Jesu, ubi & quieti nox concessa. At interim Gregorius omnis moræ penè impatiens, amore desiderium stimulante, expectare diem, & Ecclesiæ gloriosum, & sibi petoptatum, quo vetera Oracula approbabantur, & Roma tanto spectaculo recreata, suam agnosceret fortunam: Non metu armorum, non spe præmiorum, accedere supplices Populos, Principesque, Romanis olim ignotos & inaccessos, tantùm Ecclesiam, ac Pontificem veneraturos. Affulgente die instructa est legationis pompa, præ alijs ornatissima. Ibant legati Japonici habitu Japonico, gravi & modesto, equis pulcherrimis injecti, Mantins inter duos Archiepiscopos, ac duos inter Episcopos Michaël & Martinus: sequebatur flos nobilitatis: spectabat suis effusa sedibus Roma, & præ spectaculi amabilitate lætitia lacrymæ. Regiam, uti vocant, aulam ingressi, atque ad Pontificium solium ducti, prælatis manu Principum literis, ad
pedes

pedes Gregorij procumbunt, osculâque pedibus infigunt, obsequia Majestati delaturi, quos Gregorius inclinâtâ maiestate, quam illi venerabantur, & redditis pro osculis amplexibus, exundante lacrymis gaudiisque vultu, non semel, sed bis singulos recepit in Pontificium sinum, quæ nova charitati species non minùs admiratione Quirites, quàm Japones voluptate affecit. Mox per interpretem Mantius primùm: deinde Michaël exposuere causas, & momenta legationis; quæ eò spectabat, ut suorum nomine Principum Gregorio, Christi Vicario, ac supremo Ecclesiæ Catholicæ Moderatori, perpetuam ac fidelem obedientiam præstarent; & cùm respondisset Pontifex graviter, sed paucis; ac humanissimè, literas reddidère, quibus recitatis, habita est latina oratio, à Gaspare Consalvo Societatis Jesu, commemoratâ Regum Japoniæ observantiâ in Sedem Apostolicam & Christianâ constantiâ, tum laudato Gregorij studio in Catholica fide propagandâ, Japoniæque juvandâ: responditque Antonius Boccapadu-

padulius eorum prædicatâ pietate , quòd veri Numinis cultum professi per Romani Pontificis obedientiam , saluti consuluisse. Post hæc iterum ad oscula pedum admissi; demum confectâ legatione, in Ædibus Vaticanis excepti convivio fuère à Philippo Boncompagno, unâ cum Guastavillano Purpuratis, & Jacobo Boncompagno. Inde à Gregorio acciti, de moribus Jacobo Boncompagno. Inde à Gregorio acciti, de moribus Japoniæ, de progressu Religionis, aliisque interrogati, summam attulère voluptatem, uti nova, & vera, ac propria narrantes; à quo dimissi, accessère ad templum Vaticanum, Apostolorum cineres & tumulum salutaturi, ac denique domum reducti sunt, Româ fruente, ac vix credente. Unum tamen defuit spectaculi celebritati, ac lætitiæ; nam semper lætis rebus aliquid inest molesti: præsentia scilicet Juliani, qui tentatus morbo, ac viribus invalidus, domi manere jussus est à Gregorio: privatis, eoque tenerioribus sermonibus recreatus, & aliâ die in Senatum advocandus. Atque ultimum id fuit decus, & gaudium

Grego-

Gregorij morituri: Providentiā jucundum, ac pæne triumphale mortis genus adornante homini, cujus vita pro Religione, pro charitate, pro æquitate certavit.

C A P. XLVIII.

Mors Gregorij.

SUſceptâ Japonum legatione Gregorius, dum magis ad reipublicæ comoda procuranda incenditur, pergitque omnia ad omnium felicitatem referre, Catholicæ Religionis, pietatisque firmato & aucto cultu: principibus populisque Sedi Apostolicæ conciliatis: pace inter Christianos compositâ: bello in hostes Christianorum instructo: hæresibus depulsis: attritis scelerum viribus: Concilio Tridentino provinciis insinuat: Apostolicæ Sedis, quâ auctoritate assertâ, quâ jure vindicatæ, quâ censu amplificatæ: Sapientiâ & bonis artibus locupletatis: institutis omnium Nationum Collegijs: annonâ sustentatâ: commendatâ & retentâ in tribunalibus æquitate: optimis moribus ubique vel restitutis, vel servatis: maje-

majestate demum ac amore, quæ præcipuè Romani Pontificis dotes esse videntur, in eâdem Sede (quod difficillimum est) conjunctis, repentè ad perennem gloriam, uti piè creditur, evocatur à Deo.

Aderat anni tempus vernum, ventorum, dierumque varietate incertum: aderat quoque Christiani tempus jejunij, quod ipse per summam abstinenciam, nihil sibi indulgens, exigebat: aderat insuper gravissima Octoginta quatuor annorum ætas; & quâ alimentorum austeritate, quâ humidis temporibus, ac etiam senij frigore, laborare tussi cæpit, & distillatione, ac demum Non. April. lentiore febri, ac molestâ fatium inflammatione; nihil tamen solemnis abstinenciæ, quotidianique laboris intermisit; Die autem insecuto, qui Dominicus erat, peracto secretiore in ara Sacro, Pontificij quoque Sacelli solemnia, quæ Purpurati celebrabant, religiosè spectavit; insuper posteriore die Senatum, seu Consistorium manè coëgit, vespere Hispanum Oratorem audivit, aliosque causarum acta afferentes; sed adveniente Martis die viribus

debilior, & fatigatus laboribus, ac etiam morbi molestiâ fessus, quæ acrius urgebat, quò magis abdebatur, viribus & corpore toto, præter morem languescens, lecto decubuit, ac solemne jejunium aliquantulum remisit, ex imperio medicorum, quibus paruit obsequentior, quò fuerat in retinenda abstinentia constantior; at exortâ Mercurij luce, cum videretur meliùs habere, quadam remissi jejuniij pænitiâ ducebatur, interrogavitque charitate sollicitante, cui aliena potius, quàm sua incommoda, sollicitudini & curæ sunt; an remisisset Juliani Japonis morbus: Hinc Medicis spes. Verùm accedente horâ, quâ ægris viribus adhibenda erant fomenta, accessit quoque Michaël Mercatus, vir doctus & prudens, & Gregorio assidere solitus. Hic explorato venarum pulsu, & animadverso sudore, quem vocant diaphoreticum, intellexit spiritum labi, emori vires, &, quod extremum est, at præstantissimum seu amicitiae officium, seu obsequium, eum admonuit imminentis fati. Gregorius hæc decretoria verba excepit constanter

stanter, mox novâ quâdam & mirâ vi
sefe erexit, ac memor, haud minùs dece-
re, Pontificem sedentem mori, quàm
Imperatorem stantem, sedit, Cœlum su-
spexit, tanquam metam fugientis vitæ, ac
approbaturus Deo ultimum mortalitatis,
cœpit signo Crucis frontem, pectus, &
reliqua corporis munire; & quamquam
vires desererent, nunquam eum hæc non
modó animi, sed oris & gestuum pie-
tas deseruit. Petijt Evcharistiam, sed
veriti, qui aderant, ne mors antecederet,
censuere oleo sacro perungendum, quo
dum imbuitur, & totus in Deum anhelat
oculis, voce, animo, Catholicæ Religio-
nis mysteria testificatus, & nunquam in-
termittens efformare Crucis signum, ut
qui vicem Christi gesserat vivens, moriens
quoque crucem gereret, tranquillè ac
suaviter expiravit, 4. Id. April. anno salu-
tis 1585. relicto ex vita pro testamento
mortalibus hoc documento: Feliciter eum
vivere, ac mori, cujus vita ad aliorum
felicitatem se composuit. Vixit ætate
longissimâ, prosperâ ferè valitudine, pro-
superiore semper fortunâ, & quod rarissi-

num, summâ Populorum benevolentia,
& veneratione Principum, Posteritati op-
tandus admirandusque. Ferunt (quod
tunc sermonibus, postea typis celebratum
est (sub idem expirantis momentum,
cûm haud morbus innotesceret, sanctissi-
mum Virum è Franciscana familia in con-
finio mortis versantem, repentè excla-
mâsse: O ter felicem Gregorium Pon-
tificem, cujus spiritus rectâ in Cælum
ab Angelis defertur! Sic Gregorij, & vi-
ram adprobavit, & gloriam vulgavit Deus.
Sed Romæ ingens luctus, & ubique ter-
rarum dolor, quasi amisso Ecclesiæ Catho-
licæ, ac Generis humani parente. Primûm
omnium lacrymis, vocibus, scriptionibûs-
que, mox de sublimi loco à Stephano Tuc-
cio insigni Oratore, laudatus fuit coram
Purpuratis, iusta persolventibus, quæ præ-
ter morem ad quinque dies contracta
fuêre, instante Sanctiore hebdomadâ, an-
quia inchoata Romæ pompa exequia-
rum, in reliquo terrarum Orbe absol-
venda erat? nam revera ubique paren-
tatum est ei, qui fuerat omnium parens.
Staturâ erat corporis erectâ, & procerâ,
oculis

oculis cæruleis, naso in aquilinum vergente, specie ad venerationem, imperiūque composita. Pontificem amares, Principem crederes; certè Henricus III. Gallorum Rex, dum Pontificum signas inspicit, palàm dixit; In Gregorij vultu se Principis imaginem agnoscere. Et meritò, nam Gregorius non modò Optimi Pontificis, sed etiam veri Principis imago fuit Benefaciendo.

LAUS DEO.

INDEX CAPITUM.

1.	C reatur Pontifex.	pag. 20
2.	E cclēsia status hoc tempore.	21
3.	Gregorij consilia in Pontificatu.	22
4.	Res gestæ initio Pontificatūs.	24
5.	Promovet Christianorum fœdus in Turcas.	26
6.	Studium juvanda Gallia.	29
7.	Suscipit obsequia Principum.	31
8.	Sedat controversias & discordias.	33
9.	Ædificia publica.	36
10.	Studium liberalitatis in omnes.	40
11.	Ærarij cura.	45
12.	Res Urbanas & Pontificiam ditionem componit.	48
13.	Ecclesiam auget religione & auctoritate.	51
14.	Hæreticos arcet ab Italia.	56
15.	Benemeretur de Principibus.	58
16.	Ecclesiæ jura tuetur.	61
17.	Annum sæcularem celebrat.	64
18.	Genuensium res componit.	67
19.	Avenionensem tractum tuetur.	76
		20. Cui-

20. Curat, ut optimus Polonia Rex eligatur.	79
21. Gallia favet, ac prospicit.	87
22. Germania opitulatur.	98
23. Germania Principes beneficijs & benevolentia profequitur.	108
24. Praesidia parat adversus Othomanum.	117
25. Hispania favet ac prospicit.	122
26. Sueciam ad fidem Catholicam adducere contendit.	131
27. Graciam & Orientem sublevat.	136
28. Bohemia regno consulit.	144
29. Cavet, ne Rex Romanorum eligatur, veteri more non servato.	149
30. Causam Toletanam absolvit.	154
31. Hæreticis iniqua medicantibus in Conventu Ratisponensi obsistit.	158
32. Colonienfis Ecclesie famam, statumque tuetur.	162
33. Gebhardum deturbat è Sede Colonienfis Ecclesie.	166
34. Rodolphum Cæsarem ad Obedientiam præstandam sollicitat.	179
35. Ad Angliam liberandam fortiter incumbit.	182
36. Sco-	

36. Scotiam, ejusque Regem Hæreticorum potestati eripere tentat.	186
37. Hibernia vindicanda opem impendit.	192
38. Lusitania consulit.	197
39. Belgicis rebus sedandis studet.	205
40. Dissensiones ac iras Principum tollit.	214
41. Hierosolymitanorum Equitum discor- diam componit.	221
42. Augustanum Convēntum in Sedis Apostolicæ officio continet.	226
43. Alia præstat in Germania, & Belgio, Religioni Catholica utilia.	232
44. Motum Salutarum cohibet.	308
45. Sabaudia prospicit.	243
46. Kalendarium & Martyrologium e- mendat.	248
47. Japonum Legatio.	255
48. Mors Gregorij.	260


FINIS.











BI

X